

LOS HECHOS

Túini Espíritu ã jũúwát pínah yeó jáapdih Jesús ã jéihya naáwát

¹⁻²Teófilo, weém, Lucas, meemdíh wã jwúub daác wahna caá, páant muntih. Wã jwíh daácni náodih Jesús ded pah ã chājatdih, ded pah ã bohéatdih, jeáboó ã púuh laab béjatjidihbut wã naóh péanap be.* Nin baácboó jum jwuhna, Jesús ã bohénitdih ñionit, cāacwādh ãih doonádih átát naáwát túutap wut jī. Pánihna, ã púuh laab béjat pínah jātih, ã naáwát túutnit ded pah ī chājat pínahdih Túini Espíritu ã wēpatjīh queétdih át wutap wut jī.

³Jesús cruzboó ã wunat táttimah, ã jwúub boovatjidih ī jéihyat pínah niijná, cuarenta yeó jáap pohba, dawá láa ã bohénitdih át jwúub jígohop wut jī. Pánih jígohni, “Dios nihat cāacwā ī maáh ã jumuchah, caandíh ded pah caá cāacwādh jepahat náahap”, queétdih ãpī niij naáwáp wut jī.

⁴Biíc láa Jesús ã bohénit biíc dih jeémpna, queétdih nin pah át niij naáwáp wut jī:

—*Túini Espíritudih yeebdíh wã wahbipna caá’, wã íp ã niijnídh Jerusalén tútchidih ñi pã jwuhúú. Caán ã niijnídh yeebdíh wãát naáwáp be.**

⁵Juan yeebdíh mahjīh ã daabánap jī. Obo-hjeéhtih, wã íp yeebdíh Túini Espíritudih wahna, caán daabáát panihni ã wēpat yeebdíh búdí ã wãhbipna caá, át niijíp wut jī.*

* **1:1-2** Lc 1.1-4 * **1:4** Lc 24.49 * **1:5** Mt 3.11; Mr 1.8; Lc 3.16; Jn 1.33

Jesús jeáboó ãt púuh laab béjat

⁶ Biíc yeó jáap Olivo jee jína Jesús ã bohénit biícđih ã jumuchah, caandíh nin pah ãt niij úubh joyóp wut jĩ:

—¿Maá, Romano maátadih yohnit, buu jwiít judíowã jwĩ maáh ma waadmí niít? ãt niijíp wut jĩ.

⁷ Páant ã niijíchah joinít, Jesús nin pah ãt niij jepahap wut jĩ:

—Jwĩ íp ã ñíoni yeó jáapđihjeh weemđih maáh ã waadábipna caá. Caán yeó jáapđih yeéboó jéihnit pínah nihcan caá.

⁸ Obohjeéhtih, Túini Espíritu yeebđih ã waadáchah, Dios ã wēpatđih ã wūhbipna caá. Caán wēpatjĩh Jerusalén tútchidih moón, nihat Judea baácdih moón, Samaria baácdih moón, yuúpboó baácnadih moondih yah buca wĩh túini doonáđih ñi wēp naóhbipna caá, ãt niijíp wut jĩ.*

⁹ Páant niij péanit, jeáboó Jesús ãt púuh laab béjep wut jĩ. Caandíh ã chéi en ñuun ñúhuchah, mah tólihdih yap púuh laab béjna, ãt buadáh bejep wut jĩ.*

¹⁰ Páant Jesús ã púuh laab béjehah, ã chéi en ñuun ñúhuchah, chéne ángelwã baabní yégueh duonít Jesús ã bohénitji cātíh ãt jígoh ñuhup wut jĩ.

¹¹ Pánih jígoh ñuhnit, queéđih nin pah ãt niij úubh joyóp wut jĩ:

—¿Yeéb Galilea baácdih moón, dépanihna jeáboó chéi en ñuh tigaá ñi chāj? Caán Jesús, jeáboó púuh laab béjni, ã púuh laab béjatji pahjeh tih ã jwúub dei jūóhbipna caá, ãt niijíp wut jĩ.

* **1:8** Mt 28.19; Mr 16.15; Lc 24.47-48 * **1:9** Mr 16.19; Lc 24.50-51

Judasjidih jwáub túut nũmni pínahdih ã ñíwat

12 Jesús ã naáwát túutnit Olivo jee jímant jwáub dei bejnit, Jerusalén tútchina ã jwáub juibínap wut jĩ. Caán jeé Jerusalén pebhitjeh ãt jumap wut jĩ.

13 Jwáub juibínit, queét chahboó ã jumni tólihdih ãt púuh laab béjep wut jĩ. Nin caá queét ã wātna: Pedro, Juan, Santiago, Andrés, Felipe, Tomás, Bartolomé, Mateo, biih Santiago Alfeo wáuh, Simón Celote wūt jumni, Judas biih Santiago wáuh ãt jumap wut jĩ.*

14 Queét oncewãjeéh, biquína yaádh, María Jesús ãn, mi weh biíc dih, míc wáacnit, ãt jumap wut jĩ. Nihat biíc yoobó jenah joinít, Diosdih búdí ãpĩ úúbúp wut jĩ.

15 Biíc yeó jáap Jesúhwã caán tólihdih míc wáacnit, ciento y veinte ãt jumap wut jĩ. Páant ã jumachah, Pedroboó queét cãtíh ñũh nit, nin pah ãt niij naáwáp wut jĩ:

16 “Wã déewãá, Dios jon jãtíh ã niijãtji pah bũũ ã yapna caá. Túini Espíritu Davidjidih ded pah Judasji ã yapat pínahdih ãt naóh daacát túutap tajĩ. Judasji beé Jesús dih teonit pínahdih ã waáwáp jĩ.

17 Pãnih chãjni pínah jwĩjeéh Jesús ã tewatdih chãjni ã jumap yah be”, ãt niijíp wut jĩ.

18 Judasjiboó Jesús dih ã tewat pínah naáwát jíib dih ã jwáubaíhichah yahna, queét sacerdotewãboó ãt teocap wut jĩ. Pãnihna, caán jíibjĩh bainí baác dih ãt jíib chãjap wut jĩ. Caán baác dih Judasboó míc jõp wái wãnniji wálahnit, dúuc jéen bejna, ãt páah yoh ñajap wut jĩ. Pãnih páah yoh ñajna, ãih wudah ãt

* 1:13 Mt 10.2-4; Mr 3.16-19; Lc 6.14-16

búuh yoh bejep wut jĩ. Āih jónóp tōpna nihat āt bac peét bejep wut jĩ.

¹⁹ Judas ā yéejatji jíibdih nihat Jerusalén tátchidih moón ĩt jéih beedép wut jĩ. Pánihna, caán ĩ jíib chājni baácđih Acéldama wūt ĩt búudhdup wut jĩ. “Acéldama”, niijná, “Meép jumni baác”, niijná ĩt chājap wut jĩ.*

²⁰ Túttimah, nin pah queédđih Pedro āt jwúub niij naáwáp wut jĩ: “Jon jātih ĩ daacátji pahjeh tibeé Judasji ā yapap be. Davidji ā daácni Salmos ĩ niijni tólihdih nin pah āt niij daacáp tajĩ:

‘Ā tewatji yohni ā jumna naáh, niij daácnit, *(Sal 69.25)*

Biíh ā tewatjidih jwúub túut nuumnít, ā tewe naáh’,
āt niij daacáp tajĩ. *(Sal 109.8)*

²¹⁻²² “Páant ā niij daacátjidih jéihnit, Judasjidih jwúub túut nuumní pínahdih jwiítđih bidat caá náahap. Juan Daabánijeéh jumnit biquína Jesúsjeéh ĩ bejep jĩ. Ījeéh jumni bíicđih níwat caá náahap, jwĩjeéh ā jumat pínah niijná.* Jesúsjeéh jwĩ jumuchah, jwĩjeéh páant péeni, Jesús ā púuh laab béjatjidih jwĩjeéh ennidihbut níwat caá náahap.* Páant jwĩ níwichah, Jesús ā jwúub bootjidih jwĩjeéh naóhni ā jumnipna caá”, Pedro queét Jesúhwāđih āt niijíp wut jĩ.

²³ Páant ā niijíchah joinít, chénewāđih ĩt níwip wut jĩ. Bíic José Barsabás wūt jumnidih ĩt níwip wut jĩ. Caán Justo ĩ niij wūt ejni wut jĩ. Biíh Matías wūt jumnidihbut ĩt níwip wut jĩ.

* **1:19** Mt 27.3-8 * **1:21-22** Mt 3.16; Mr 1.9; Lc 3.21 * **1:21-22**
Mr 16.19; Lc 24.51

24-25 Queétdih ñíonit, Diosdih nin pah ït niij wáábup wut jĩ: “Maá, nihat cáacwã ï jengah joyátdih ma táí jéihna caá. Judasjidih túut nuumní pínah, nit chénewã jwĩ ñíonitdih, ded meém ma náahnidih jwiítdih ma júutá. Jesúsdi cádahni Judasji iiguípna át bejep taga. Caandih túut nuumní, jwiit Jesús ã naáwát túutnit biíc dih jumni pínahdih ma júutá”, Diosdih ït niijíp wut jĩ.

26 Páant niijnájuh, bidat túut niijná, ï ñíwat naanádi ït púudanap wut jĩ. Matíah naá ã jwíh buúg jéenechah, caánboó Jesús ã naáwát túutnit on-cewãjeéh át waadáp wut jĩ.

2

Túini Espíritu ã wēpat queétdih ã wāhat

1 Pentecostés wāt jumni yeó jáapdi* nihat Jesúhwã biíc mūdih ït jwáub miic wáac juyúp wut jĩ.

2 Neohjuh búdí johlit yáaat panihni jeámant jūóhni, ï jumni mūdih át yeéj yáanap wut jĩ.

3 Nihat ñih wao cháh tū oopát tōpna panihni át jígohop wut jĩ.

4 Pánihna, Túini Espíritu queétdih ã waadáchah, ã wēpatjĩh bitáh wéheatna ï beh jóica naáhjĩh ït wéhe jwíhip wut jĩ.

5 Caán láa, nihat baácna bej peétnitji judíowã Dios ã wutatdih jepahni, Jerusalén tútchina ïtát wáac juyúp wut jĩ.

6 Pánihna, japboó yáanachah joinít, Jesúhwã ï jumni mūná dawá ït miic wáac juibínap wut jĩ. Pánih juibínit, cáacwã yoobó ï wéheatnajĩh Jesúhwã

* 2:1 Lv 23.15-21; Dt 16.9-11

ĩ wéhenachah, beh joiná, joí wúhi bejnit, nin pah ít míc niíj wéhenap wut jĩ:

7-8 —¿Dépanih tigaá nit Galilea baácdih moon yúhna, jwĩih wéheatnajĩh ít túi wéhenachah, jwĩ beh joí?

9 Nihat jwĩih wéheatnajĩh bũũ wéhena caá ít chãjap: Partia baác, Media baác, Elam baác, Mesopotamia baác, Judea baác, Capadocia baác, Ponto baác, Asia baác,

10 Frigia baác, Panflia baác, Egipto baác, África baác, Cirene tátchi, Roma tátchidih moonbát jwiít jwĩ jũmũp.

11 Biquína judíowã jwĩ jũmna caá. Bitá judíowã nihcannit yuhna, Dios naáwátdih bohénitbũt jwĩjeéh ít jũmna caá. Bitá Creta quewadiah moón, Arabia baácdih moonbát jwĩjeéh ít jũmna caá. Pánihna, nitboó ít wéhenachah, jwiít nihat jwĩ beh joiná caá. Queét jwĩih wéheatnajĩh Dios ã wẽp chãjatdih naóhna caá ít chãjap, ít míc niijíp wut jĩ.

12 Páant niíj joí wúhi bejna, ít ennidih ít joinídihbũt ded pah ã yapatdih ít jéihcap wut jĩ.

—¿Nit dépanih tigaá bitaíh wéheatnajĩh Dios ã wẽp chãjatdih ít túi wéhe? yeéb ñi jenah joyóchah, queétjeh ít míc niijíp wut jĩ.

13 Obohjeéhtih, bitá ñjeéh jũmnit nin pah ít niijíp wut jĩ:

—¡Dépah nit cheha náahdih babh máihnit, wéhena caá ít chãjap! ít niíj deoh naáwáp wut jĩ.

Pedro cãacwãdih ã naáwát

14 Pánihna, Pedro once Jesús ã naáwát túutnit biícidih ñũhnit, cãacwãdih nin pah át niíj naáwáp wut jĩ: “Wã déewãá, biíh baácmant jũóhnit,

Jerusalén tútchiboó jumnitbut, b_{uu} ã yapatdih jéihyat túut niijná, nin wã naáwát pínahdih ñi túi joyoó.

15 ‘Queét máihnit caá’, ñi niij jenah joyát yoobópdih nihcan caá. Jwiít judíowã cheibitjeh jwĩpĩ máihcan caá. B_{uu} cheibitjeh las nuevejuh caá. Páñihna, jwĩ máihcan caá.

16 Dios jon jãtìh ã niijátji pahjeh b_{uu} ã yapna caá. Dios naáwát dih naóh yapani Joel nin pah át niij daacáp tajĩ:

17 ‘Péeni yeó jáap tóah jũwúchah, nin pah ã yapbipna caá: Wĩih Túini Espíritu ã wēpatdih nihát cãacwãdih búdí wã wãhbiipna caá, b_{uca}. Páñihna, ñi weh, ñi weh yatábut wã naáwát dih ì naóh yapabipna caá. Jáap beh tóahnit oo júmat jígoat panihnidih ì enbipna caá. Behnit ì oo júm_{uchah}, queédih wã naóhbiipna caá.

18 Weemdih teo wãhñit neoná, yaáhdihbut wĩih Túini Espíritu ã wēpatdih búdí wã wãhbiipna caá. Queébut wã naáwát dih ì naóh yapabipna caá.

19 Wã wēpatjĩh úm náah jumnidih jeáboó baácboobút wã wahachah, ñi enbipna caá. Baácboó meép panihni, iigát panihni, t_{uu} jei páñihni ã jumbipna caá.

20 Jeáboó yeó d_{ur}úát dih ã túut n_{uu}mbípna caá. Chei bóo widhbut meép panih d_{uuni} ã túut n_{uu}mbípna caá. Páant ã yapbipna caá, ñi Maáh Cristo ã jwúub dei jũóhni yeó jáap pínah jãtìh. Caán yeó jáapdih nihát cãacwã ì en wúhi bejbipna caá. Páñihna, oboh jumni

yeó jáap ã nihcan niít buca. Yéejnitdih úum náah jamni yeó jáap jumna yuhna, yéejat yohnitboodih caán yeó jáap túini yeó jáap ã jumbipna caá.

21 Ded jwĩ Maáhdih ã yéejat yohat túutni, caán iiguípna ã bejat déeji ã túi yapbipna caá', át niij daacáp tajĩ. *(Jl 2.28-32)*

22 “Yeéb wã déewãá, nindih wã naáwáchah, ñi túi joyoó. Jesús Nazaret tútchidih bóo Dios ã wēpatjĩh ã chãj júutap jĩ, caandih Dios ã wahatjidih cáacwã ĩ jéihyat pínah niijná. Yeéb caandih ennitji ñi jéihna caá.

23 Jesúsdih mawat náahna, ñi maátadih ñi wũhup jĩ. Pánih wãhñit, yeejépwãdih cruzboó ñi mawat túutap jĩ.* Dios jon jãtĩh caandih ã niijátji biíc yoobó ã yapap be.*

24 Obohjeéhtih, Jesús ñi maonijidih Diosboó át jwúub boanap tabe. Túttimah, ã jwúub wuncan niít buca. Chah wēpni jumna, wãnnidih yuhna, át jwúub boanap tabe, páant muntih. Pánihna, buu páantjeh báadhni caá.*

25 Davidjiboó jon jãtĩh nin pah Jesucristo ã jwúub boo pud júúwát pínahdih át niij daacáp tajĩ: ‘Wã Maáh wãjeéh ãpĩ jumna caá. Yeó jáap jumat pah Dios wã Maáh wã pebh ã jumuchah, enna, wã úumcan niít.

26-27 Dios, weemdih oina, wãnnit ĩ jumapboó wĩh caolidih ma yohcan niít. Wĩh bácahdihbut ma moopát túutcan niít. Páant ma chãjat

* 2:23 Mt 27.35; Mr 15.24; Lc 23.33; Jn 19.18

* 2:23 Lc 24.26

* 2:24 Mt 28.5-6; Mr 16.6; Lc 24.5

pínahdih jéihna, wã tái wēi naóhna caá. Míih jũmna, ẽmcanjeh, wã tái jũmbipna caá.

28 Pánihna, weemdíh jwũub booanít, wãjeéh ma jũmũchah, wã tái wēina caá', ăt niíj daacáp tajĩ. *(Sal 16.8-11)*

29 "Wã déewāá, jwĩ nũo Davidji ded pah ă jũmatdih yoobópdih wã naóhna caá. Caán ă wũnũchah, ıt yohop wũt jĩ. Caandíh ı yohni íitji páantjeh ă jũmna caá. Pánihna, 'Wíih bácahdih ma moopát túutcan niít', niíj daácna, caanjéh ăih pínahjeh ăt nihjican tagaá.

30-31 Davidji Dios naáwátđih naóh yapani ă jũmũchah, Dios caandíh nin pah ăt niíjíp wũt jĩ: 'Yoobópdih meemdíh wã naóhna caá. Ma jũima jwũub boonít, meém maáh ma jũmatji dée pah, nihát nin baácđih moondíh maáh ă jũmbipna caá', ăt niíjíp wũt jĩ.* Cristodih Dios maáh ă waadáát pínah, ă boo pũđ jũúwát pínahđihbũt nin pah ăt niíj daacáp wũt jĩ: 'Caán wũnnít ı jũmũpboó páantjeh ă jũmcan niít. ăih bácahbũt ă moópcan niít', David ăt niíj daacáp tajĩ.*

32 Caán Jesúsdih beé Dios ăt booanap be. ă jwũub booanidih jwiít nihát jwĩ enep be.

33 Caán Dios ă jéihyepmant bóo bũwámant jũmni maáh caá. Pánihna, 'Túini Espíritudih noónboó ma wahaá', ă ıp Dios caandíh ă niíjíchah, nin Túini Espíritudih ăt wahap taga. Bũũ jwũh Túini Espiritu ă chăjatđih ennit, joiná caá ńi chăjap.

34 Davidji Dios pehbboó ăt pũũh laab béjcap wũt jĩ. Pánihna, ăih pínah nihjican tagaá. Nin pah ă niíj

* 2:30-31 Sal 132.11; 2S 7.12-13 * 2:30-31 Sal 16.10

daácni Jesúih pínahji tagaá:

‘Wā Maáhdih Dios nin pah ã niij naáwáp be: “Wā jéihyepmant bóo b̄wámant ch̄úudnit, maáh ma jumúú.

35 Páant maáh ma jumuchah, meemdih eníhcannitdih wā yohbipna caá. Meém queétdih chah wēpni ma jumbipna caá”, ã niijíp be’, Davidji át niij daacáp tajī. (*Sal 110.1*)

36 “Pánihna, wā déewāá, nindih ñi táí jéihyee: Caán Jesús yeéb cruzboó ñi mao yohat túutnijidih Diosboó maáh ã waadánap be. Caán Jesússeh jwīpī pāini Dios ã wahni Cristo beé”, Pedro cāacwādh ãt niijíp wut jī.

37 Páant ã niijíchah joinít, bádí jīgah úumnit, Pedrowādh nin pah ít niij úúbh joyóp wut jī:

—¿Jwī déewāá, ded pah tigaá jwī chājbi? ít niijíp wut jī.

38 —Yeéb ñi yéej chājatdih cádahnit, táiniboodih ñi jwúub túut n̄umú. Páant ñi túut n̄umúchah, Dios ñi yéejatdih ã yohbipna caá. Pánih túut n̄umnit ñi jumuchah, Jesús ã wēpatjīh ñi daabáát túutú. Páant ñi chājachah, Dios yeebdih Táini Espíritudih ã wāhhipna caá.

39 Jon jātihjeh Dios yeéb pínahdih, ñi weh pínahdih, ñi jūimená pínahdihbut, nihat caán ã ñíonit pínahdih nin pah át niij naáwáp wut jī: ‘Nihat weemdih jepahnitdih Táini Espíritudih wā wāhhipna caá’, Dios át niijíp tajī,* Pedro queétdih át niijíp wut jī.

* 2:39 Is 57.19

40 Páant niij péanit, queétdih nin pah ãt jwúb niij wēp naáwáp wut jĩ, páant muntih:

—Nin baácđih moón yeejép ĩ chãjatji jíib Dios búđi ã peéh chãjbipna caá. Pánihna, queét pah ñi jumca bojoó. Ñi yéj chãjatđih cáđahnit, ñi túut numá. Páant ñi chãjachah, yeebđih ã peéh chãjcan niit, ãt niijíp wut jĩ.

41 Páant ã niijíchah joinit, dawá jepahnit, ĩt daabáát túutup wut jĩ. Pánihna, Jesúhwãjeéh caán yeó jáapjeh tres mil cáacwã chah dawá ĩt jumap wut jĩ.

42 Yeó jáap jumap pah queét jáap jepahnit Jesús ã naáwát túutnit ĩ bohénachah, ĩt túi joyóp wut jĩ. ĩih jeémáđih míic pãáh wãhnit, Diosđih wãhnit, biícđih ĩpĩ túi jumap wut jĩ.

Jesúhwã ded pah ĩjumap

43 Jesús ã naáwát túutnitboó Dios ã wēpatjĩh wannitđih ĩpĩ booa júutup wut jĩ, Dios ã wēpatđih cáacwã ĩ jéihyat pínah niijná. Páant ĩ chãjachah ennit, nihat ĩt en wãhi bejep wut jĩ.

44 Jesúhwã ĩih bíi déedih míic pãáh wãhnit, biícđih túinijeh ĩpĩ jumap wut jĩ.*

45 ĩih bíi déedih jíib chãj wãhnit, nihat biíh pah bóo wihcannitđih queét ĩ jumap yoobó ĩpĩ wãh wáacap wut jĩ.

46-47 Pánih chãjna, yeó jáap jumap pah Dioíh muná míic wáacnit, “Dios túini caá”, ĩpĩ niij wēi naáwáp wut jĩ. ĩih munáboobút míic wáacnit, biícđih ĩpĩ túi numah wēi jeémép wut jĩ. Páant ĩ chãjachah ennit, “Queét túinit caá”, nihat cáacwã

* 2:44 Hch 4.32-35

İpĩ míc niijíp wut jĩ. Pánihna, yeó jáap jumat pah bita jáap jepahnitdih táı ubnit, jwíih jepahnitjeéh Dios át waadánap wut jĩ. Jáap jepahnitbat İjeéh İt míc wáacap wut jĩ.

3

Jéih bejcannidih Pedro Juanjĩh İ booaat

¹ Biíc yeó jáap, cheyeh, las tres jumuchah, judíowā Diosdih İpĩ ubát horadih Pedro, Juanjĩh Dioih munná İt bejep wut jĩ.

² Yeó jáap jumat pah Túini Jēc wūt jumapdih ā chéenwā jéih bejcannidih İpĩ ub jubí chūd jwep wut jĩ. Jáap cāac jumnijeh caán jéih jibcanni átát jumap wut jĩ. Caan jēcdih chūd nit, caanjĩh waadnıdih dinero āpı ubúp wut jĩ.

³ Pánihna, Pedro, Juanjĩh caán munná İ waadát túut chājachah ennit, queétdih jéih jibcanni dinerodih át ubúp wut jĩ.

⁴ Pedroboó caandih ennit,

—Jwiıtdih ma táı eneé, āt niijíp wut jĩ.

⁵ Páant ā niijıchah joinıt, queétdih en behnit, “Queét bainı dinero weemdih İ wūhbipna caá”, caanjéh āt niıj jenah joyóp wut yuh jĩ.

⁶ Obohjeéhtih, páant ā niıj jenah joyóchah yuhna, Pedro caandih nin pah āt niıj naáwap wut jĩ:

—Weém dinerodih wā bıbohcan caá. Obohjeéhtih, caandih wūhcan yuhna, chah túinidih meemdih wā chājıipna caá. Jesucristo Nazaret tıtdıdih bóo ā wēpatjĩh meemdih wā booana caá. Ma ñah ñuhú. Ñah ñuhnit, ma yáac chūi bejeé, āt niijíp wut jĩ.

7 Páant niijnít, áih jéihyepmant bóo téihyadih teonit, caandíh át wái ñahanap wut jĩ. Páant á wái ñahanachahjeh, caán jéih jibcanniji áih wio wēpép nahna át jumup wut jĩ.

8 Pánihna, caán ñah ñuhnit, át yáac ch̄i bej jwíhip wut jĩ. Pánih yáac ch̄i bejnit, ñaáp táamp ch̄init, “Dios túini caá. Wã túi jéih bejna caá”, níj wēinit, Dioíh m̄udíh át waad béjep wut jĩ.

9 Pánih yáac ch̄i bejnit, “Dios túini caá”, á ni-ijíchah, nihat c̄acwã ít enep wut jĩ.

10 Caandíh ennit, “Caán Dioíh m̄ú Túini Jēcdih ch̄udni dinero úbhniiji caá”, ít níj jéihyep wut jĩ. Páant á jibichah ennit, caandíh ded pah á yapatdih ít en wúhi bejep wut jĩ.

Dioíh m̄uná Pedro c̄acwādh ā bohéat

11 Jéih bej canniji Pedrowādh ā teo ñun pēnachah, nihat c̄acwã en wúhi bejnit, Dioíh m̄ú Salomón á ch̄jat tútni coahjina ñáo ñah bejnit, Pedrowā pebhna ít míc wáacap wut jĩ.

12 Páant ĩ míc wáacachah ennit, Pedro nin pah queétdih át níj naáwáp wut jĩ. “¿Wã déewáá, dépanihna nindih ñi en wúhi bej? ¿Dépanihna jwiútdih ñi en ñun? ‘Queétboó Diosdih túi joinít jumna, ĩih wēpatjĩhjah nindih ĩ jéih yáac ch̄i bejat tútna caá’, ñi níj jenah joiná yuh caá. Obo-hjeéhtih, páant ñi níj jenah joyát yoobópdi hihcan caá. Jesús á wēpatjĩh beé caandíh jwĩ boonanap be.

13 Abraham, Isaac, Jacob jon jãtih moón jwĩ nuowā Diosdih ít túi weñep wut jĩ.* Caán Dios-jeh beé, caandíh teo wãhni Jesús á wut chah yáaat pínah niijná, nindih á jibanap be.* Yeébboó

* 3:13 Ex 3.15 * 3:13 Is 52.13-53.12; Fil 2.7-9

Jesúsdih en jãihnitdih wãhñit, Pilato caandíh nemat m̄umánt ã bacaíhichah yuhna, yeéb ã bacaat déedih ñi jepahcap be.

¹⁴ Pilato caandíh ã bacaíhichah yuhna, Jesús túini, tái chãjni ã jum̄chah yuhna, yeéboó caandíh ñi náahcap be. Pánih náahcan, cãac maonidih ñi bacaat túutap be.*

¹⁵ Jwiít dih tái ubni Jesúsboodíh yeéb ñi mawat túutap be. Obohjeéhtih, wãnnidih ï yohochah yuhna, Dios caandíh ã jwúub boonidih jwiít jwí enep be.

¹⁶ Pánihna, caandíh tái jenah joinít, nin ñi jéihni, ñi ennidih Jesús ã wēpatjĩh jwí boonanap be.

¹⁷ “Wã déewãá, yeéb jwí maátajĩh Jesús Dios ã wahní ã jum̄atdih jéihcan, caandíh ñi mawat túutap be. Páant ñi chãjatjidih weém wã jéihna caá.

¹⁸ Obohjeéhtih, jon jãtíh Dios naáwát dih naóh yapanit, ñi chãjat pínahdih nin pah ït niij daacáp tajĩ: ‘Cristo yeejép ã yapbipna caá’, ï niijátji pahjeh tibeé ã yapap be.*

¹⁹ B̄uu jwuh yeéb yeejép ñi chãjatjidih búdí jĩgahnit, táiniboodíh jwúub túut n̄umñit, Jesucristodih ñi jepahaá. Páant ñi túut n̄umúchah, yeejép ñi chãjatjidih Dios yeebdíh ã yoh wãh̄bipna caá.

²⁰ Páant ñi chãjachah, Dios ã wahniji Cristodih jwiít dih ã jwúub wah deyabipna caá, jwiít dih ã teo wáacachah, jwí tái weñat pínah niijná.

²¹ Obohjeéhtih, b̄uu Dios pehbhoó caá ã jum̄ jwuh̄ap. Dios nihatdih ã ámohat pínahdih jon jãtíh ã

* **3:14** Mt 27.15-23; Mr 15.6-14; Lc 23.13-23; Jn 19.12-15 * **3:18** Is 52.13-53.12

naáwátdih naóh yapanitdih át naóh daacát túutur wut jĩ. Pánihna, nihat ã naáwátjidih chãj péanit, Jesucristodih ã jwúub wah deyabipna caá.

22 Moisés nin pah át niúj naáwáp tajĩ: ‘Jwĩ dée Dios naáwátdih naóh yapani pínahdih jwĩ Maáh Dios yeebdih ã wahbipna caá. Weemdih ã jwih naáwát túutatji pahjeh tigaá caandihbut ã jwúub naáwát túutbipna caá.* Pánihna, ded pah ã niúj naáwát pínahdih ñi túi joyoó.*

23 Det caandih joicán, ã wutuchah jepahcannitdih Dios ã yohbipna caá. Dioíhwãjeéh queét ĩ jéih jumcan niút’, Moisés át niúj daacáp tajĩ.*

24 “Nihat Dios naáwátdih naóh yapanitji Samuel, ã bñdát túttimah moonbút nin yeó jáapnadih yapat pínahdih naóhna, Jesucristodih niijná ĩt chãjap tajĩ.

25 Jon jãtjih moón jwĩ ñowãjidih Dios át naáwáp wut jĩ. Pánih naóhna, Abrahamdih ã naáwátji pahjeh tih jwiútdihbut biíc yoobó naóhna át chãjap wut jĩ. Nin pah át niúj naáwáp wut jĩ: ‘Ma jumadih wã túi chãjachah, caánboobút nihat baácdih moondihbut ã jwúub túi chãjbipna caá’, át niijíp wut jĩ.*

26 Pánihna, jwiútbodih Moisés ã naóhnihi Dios wúúhdih jwiútdih judíowãdih át jwih wahap tajĩ, jwiútdih ã túi chãjachah, yeejép chãjnit jwĩ túut ñumát pínah niijná”, Pedro cáacwãdih át niijíp wut jĩ.

4

Pedrowãdih judíowã ĩ maáta ĩ jãhñat

* 3:22 Dt 34.10 * 3:22 Dt 18.15-16 * 3:23 Dt 18.19 * 3:25 Gn 12.3; 22.18

1-3 Páant cãacwãdih Pedro Juanjĩh ï naáwáchah, sacerdotewã, Dioíh m̃udíh wapnit soldadowã ï maáh, saduceowãbut Pedrowã pebhna j̃ibínit, ït joyóp wut jĩ. Páant ï joyóchah, Pedrowã nin pah cãacwãdih ït niij naáwáp wut jĩ: “Jesús ã wunat túttimah, ãt jw̃ub boo pud j̃úwúp be. ã boo pud j̃úwát dih jéihna, ãihwã jumna, jwiítbut jwĩ boo pud j̃úwát pínahdih jwĩ jéihna caá”, ït niijíp wut jĩ. Páant ï niijíchah joí íjnit, maátaboó cãacwãdih too pãa bejnit, Dioíh m̃udíh wapnit soldadowãdih Pedrowãdih ït j̃ibí tewat tútup wut jĩ. Cheyeh jumchah, túttimah bóo yeó jáardih queétdih úbh joíhna, nemat m̃úboó ït nemat tútup wut jĩ.

4 Judíowã ï maáta Jesúsdih ï náahcah yuhna, ãih doonádih joinít, “Yoobópdihi tigaá”, dawá ït niij jenah joyóp wut jĩ. Pánihna, Jesúihwã chah dawá jumna, cinco mil neoná ït jumup wut jĩ. Yaádhjeéh ï wehjeébut chah ït jumup wut jĩ.

5 Túttimah bóo yeó jáardih sacerdotewã ï maáta, bita judíowãdih waóhnit, Moisés ã wutatjidih bohénit biíc dihi ït míc wáacap wut jĩ.

6 Sacerdotewã ï maáh, Anás wut jumni, ã déewãbut Caifás, Juan, Alejandro, bita biíc dihi ït míc wáacap wut jĩ.

7 Pánihna, queét Pedrowãdih ï bid bojochah, soldadowã queétdih ït ub j̃ibínap wut jĩ. Páant ï ub j̃ibínachah, maáta nin pah ït niij úbh joyóp wut jĩ:

—¿Deíh wēpatjĩh tibeé yeéb caandíh ñi booa?
¿Déhe tibeé yeebdíh páant chãjat tút ni? ït niijíp wut jĩ.

8 Páant ï niijíchah joinít, Túini Espíritu ã wēpatjĩh Pedro nin pah ãt niij jepahap wut jĩ:

—¿Yeéb maáta, yeéb waóhnit,

⁹ Jéih jibcannijidih jwĩ táí chãjatdih ʘúbh joí en niít ñi chãjap?

¹⁰ Yeebdíh, nihat judíowādihtub nindih jéihyat caá náahap: Jesucristo ã wēpat beé nindih ã booanap be. Jesús Nazaret tútchidih bóo, yeéb cruzboó ñi mawat túttni, Dios ã booani, caán ã wēpatjĩh nindih jwĩ booanap be. Pánihna, bʘʘ nin ã jibichah, ñi enna caá.

¹¹ Dios naáwátidih naóh yapanit jon jãtĩh Jesucristodih naóhna, ‘Cãacwã ĩ náahcannidih Dios ã ñíobipna caá’, ĩt niij daacáp tajĩ.* Pánihna, Jesucristodih yeéb ñi náahcah yuhna, Diosboó caandĩh jwĩ maáh pínah át waadánap wʘt be.

¹² Caán Cristojeh tigaá cãacwã iiguípna bejnit déjidih táí ʘbni. Nin baácboó biĩh táí ʘbni pínah wiħcan caá. Caanjéh caá yéejat yohni ã jʘmʘp, Pedro át niijíp wʘt jĩ.*

¹³ Páant niij naóhna, Pedrowã bohécannit yuhna, ʘmcanjeh, ĩ wēp bohénachah ennit, ĩt joí wáhi bejep wʘt jĩ. Jesús ã bohéat pah ĩ wēp bohénachah enna, “Pedro, Juanjĩh yoobópdih Jesúsjeéh jʘmnit tigaá”, ĩt niij jéihyep wʘt jĩ.

¹⁴ Jéih jibcanniji boonit, Pedrowãjeéh ã jʘmʘchah, queét maáta Pedrowādiħ “Yeejép ĩ chãjna caá”, ĩt jéih niij naóh yaccap wʘt jĩ.

¹⁵ Pánih jéih naóh yaccan, maáta ĩ míic wáacat tólihmant Pedrowādiħ ĩt bac bej jwʘhat tútʘp wʘt jĩ.

¹⁶ Páant ĩ bac bejat túttimah, queétjeh nin pah ĩt niij míic wéhenap wʘt jĩ:

* 4:11 Sal 118.22 * 4:12 Jn 14.16

—¿Queétdih ded pah tigaá jwĩ chãjbi? Dios ã wēpatjĩh jéih jibcannijidih ït booanap taga. Nihat Jerusalén tãtchidih moón páant ï chãjatjidih ï jéihna caá. Pánihna, jwiítboó ‘Páant ï chãjcan beé’, jwĩ jéih niijcán caá.

17 Pánihna, Jesúih doonádih bitadih jwĩ bohéat tãtca boj jĩh, queét maátajeh ït míic niijíp wut jĩ.

18 Páant niij péanit, Pedrowãdih jwúub bid bojnit,
—Jesúih doonádih bitadih ñi jwúub naóhca bojoó, ït niijíp wut yuh jĩ.

19 Páant ï niijíchah joinít, Pedro Juanjĩh nin pah ït niij jepahap wut jĩ:

—Páant ñi wutuchah, jepahna nihna, Diosboodih yap yohna caá jwĩta chãjap. ¿Pánihna, dedboodih tigaá jwĩ jepahbi, Dios ã weñat pínah niijná?

20 Obohjeéhtih, jwiítboó jwĩ ennidih, jwĩ joinídidihbut jwĩ jéih jweéhcan caá, ït niijíp wut jĩ.

21 Páant ï niijíchah joinít, maátaboó nin pah Pedrowãdih ït jwúub niijíp wut yuh jĩ:

—Jesúih doonádih ñi jwúub bohénachah, yeebdih yeejép jwĩ peéh chãjbipna caá, ït niijíp wut jĩ.

Pánihna, cãacwãboó jéih bejcanniji ã túi bejatdih ennit, “Dios wēpni yoobát ã jumna caá”, ï niijíchah joinít, maátaboó Pedrowãdih jéih peéh chãjcanjeh, queétdih ït bacanap wut jĩ.

22 Jéih jibcanniji cuarenta jópchi bíbohni wut jĩ.

Jesúihwã ï úumcat pínahdih ï úubát

23 Pedro Juanjĩh bac bejnit, ï chéenwã pebhna jwúub juibínit, judíowã ï maáta ded pah ï niijátjidih queétdih ït naáwáp wut jĩ.

24 Páant ï niijíchah joinít, queét nihat biíc dih Diosdih nin pah ït niij úubáp wut jĩ: “Maá, meém

jeádih chājni, nin baácdihbut chājni, búdí m̄jdihb̄ut chājni, nihat báadhnitdihbut chājni caá.*

25 Túini Espíritu ã wēpatj̄ih jwī n̄uo Davidji, meemdíh teo w̄hni, nin pah át niij daacáp taj̄i:

‘Judíowã nihcannitboó jenah joicánjeh, Diosdih íjnit, ã j̄ihna yuh caá. Cristo ã chājat pínahdih ã j̄áhíhmina yuh caá.

26 Dawá nin baácdih moón maáta míc wáacnit, jwī Maáh Diosdih, ã wahní Cristodihbut en j̄ihna, Dios ã jenah joyátjidih ã yéejáihmi na yuh caá’, át niij daacáp taj̄i. (Sal 2.1-2)

27 “Páant tigaá nin t̄tchiboó Herodes, Poncio Pilato, judíowã nihcannit, judíowã bíícdih ma wahní Jesúsdi h mawat t̄utna, ã míc wáacap be.* Caán Jesús túi yoobópdih jamni, meemdíh túi jepahni ã jamuchah yuhna, caandíh ã mawíh jenah joyóp be.*

28 ‘Páant caá ã nihbip’, ma niijátji pah queét ã chājap be. Meém ma jéihyatj̄ih páant mat niij naáwáp taj̄i.

29 Pánihna, Maá, queét jwiít dih ‘Yeéb ñi jwáub bohéat peéh yeejép jwī chājbipna caá’, ã niijátjidih joinít, jwiít dih ma teo wáacá, jwiít meemdíh teo w̄hnit úumcanejeh, míh túini doonádih jwī wēp naáwát pínah niijná.

30 Jwiít dih ma teo wáacá, tubúp ch̄úhñitdih jwī boonanachah, cāacwã ã jéih chājca naáhdih Jesús ã wēpatj̄ih jwī chājat pínah niijná”, ãt niij w̄búp wut j̄i.

* 4:24 Ex 20.11; Neh 9.6; Sal 146.6 * 4:27 Lc 23.7-11; Mt 27.1-2; Mr 15.1; Lc 23.1; Jn 18.28-29 * 4:27 Is 52.13; Fil 2.7

31 Páant ï níj wúbúchahjeh, ï míc wáacni múú búdí át méménap wut jĩ. Páant ã méménachah, Túini Espíritu ã wēpat queétdih búdí ã wūhuchah, úumcanjeh Dios naáwátdih ït jwúub naáwáp wut jĩ.

Jesúhwã ï míc pãáát

32-33 Dios ã wēpatjĩh queét Jesús ã naáwát túutnit nin pah cãacwãdih ïpĩ níj naáwáp wut jĩ: “Jesús ã boo pud jūúwát túttimah caandĩh jwĩ enep jĩ”, ït niijíp wut jĩ. Queét nihatdih Dios búdí ã teo wáacachah, chah dawá Jesúsdi ït jepahap wut jĩ. Biíc yoobó jenah joinít, ïih bií déedih “Wĩih mícjeh caá”, ït niijcáp wut jĩ. Queét nihat ï bíbohat yoobó míc pãáhnit, ïjeéh jumnitdih ïpĩ túi teo wáacap wut jĩ.*

34 Pánihna, ded moh yéejnit ïjeéh ït wihcap wut jĩ. Det wápchi pínah baácđih bíbohnit, múđihbút bíbohnit, ïihđih ïpĩ jíib chãj wūhup wut jĩ. Caán jíibđih ub bejnit,

35 Jesús ã naáwát túutnitdih ïpĩ juibí wūhup wut jĩ. Páant ï ub juibí wūhuchah, teonit, queétboó ïjeéh jumnit moh yéejnitdih ïpĩ jwúub pãááp wut jĩ.

36 Biíc ïjeéh José wūt jumni át jumup wut jĩ. Jesús ã naáwát túutnit Joséđih Bernabé wūt ït búudhđup wut jĩ. ã wūt Bernabé “Cãacwãdih túi weña teo wáacni”, Griego wéheatjĩh niijná ït chãjap wut jĩ. Caán Leví juma, Chipre quewadih bóo wut jĩ.

37 Pánihna, caanbút ãih wápchidih át jíib chãjap wūhup wut jĩ. Pánih jíib chãj wūhñit, caán jíibđih Jesús ã naáwát túutnitdih wūhñit, bitadih át pãáát túutap wut jĩ.

* 4:32-33 Hch 2.44-45

5

Ananías ãjeéh bóli Safirajĩh ĩ yeeat

¹ Bitabut Bernabé ã chãjat pah ĩtih chãjĩhip wut yuh jĩ. Newé Ananías wut jumni, yad Safira wut jumnih wut jĩ. Queébut ĩih wápchidih jíib chãj wũhnt, caán jíibdih Jesús ã naáwát túatnitdih Ananías át wũhup wut yuh jĩ.

² Obohjeéhtih, ã jíib chãjna yuhna, bainíjuh ã wũhat pínahdih ubnit, nihat biĩhdih caanjéh át ámohop wut jĩ. Páant ã chãjachah ennit, yadbut mit jéihyep wut jĩ. Pánihna, bainíjuh ub bejnit, Ananías Jesús ã naáwát túatnitdih át juibí wũhup wut jĩ.

³ Páant ã yeeatdih Túini Espíritu ã jéihyanachah, Pedro Ananíasdih nin pah át niij jũihũup wut jĩ:

—Ananías, nemépwã ĩ maáh Túini Espíritudih meemdih át yeeat túutup wut. Pánihna, míih baácđih ma jíib chãj wũhna, caán jíibdih meemjéh mat ámohop wut.

⁴ Ma jíib chãj wũhat pínah jãtih, míih wápchijeh tigaá átih jumup ta yuh caá. Pánihna, míih jíib tigaá átih jumup. Páant, míih ã jumachah yuhna, ¿dépanihna oboh ma yee? Jwiĩtdihjeh ma yeecan caá. Diosdih caá ma yeenap, át niijip wut jĩ.

⁵ Páant ã niijíchahjeh, Ananíasboó át wun buugúp wut jĩ. Páant ã yapat doonáđih joinít, nihat báđi ĩt úumup wut jĩ.

⁶ ã wunachah ennit, japata áih bácahjidih yéguehjĩh pin, cáacdih yohopboó ub bejnit, caandih ĩt baad yóhop wut jĩ.

⁷ Tres horas túttimah, Ananías áaji ã wunatjidih jéihcan, Pedro pebhna caántbut mit waád juibínap wut jĩ.

⁸ Páant mi waád juibínachah, Pedroboó nin pah caántdih át niij úabh joyóp wut jĩ:

—¿Ñíih wápchidih ñi jíib chãj wãhachah, bóo nit beé yeebdíh ï jíib chãjap? át niijíp wut jĩ.

—Páant bóojeh tibeé jwiítidih ï jíib chãjap be, mit niij jepahap wut yuh jĩ.

⁹ —¿Dépanihna yeéb chénat pah Túini Espíritudih biíc yoobó ñi yee? Ma joyoó. Majeéh bóojidih baad yóh péanit, jwúub jũóhna, meemdíhbat míih bácahdih ï ub bejbipna caá, Pedro caántdih át niijíp wut jĩ.

¹⁰ Páant ã niijíchahjeh, caántbat mit wun buugúp wut jĩ. Pánihna, baad yóhnit japata caán mædíh jwúub waád juibínit, míih bácahjidi enna, caántjidihbat ub bac bejnit, newéih bácahji pebhna ub juibínit, ït baad yóhop wut jĩ.

¹¹ Pánihna, Jesúihwã, nihat bitabat caán doonádih joinít, búdí ït úumap wut jĩ.

Jesús ã naáwát túutnit wunnitdih ï booaat

¹² Jesús ã naáwát túutnit Dios ã wēpatjĩh dawá cãacwãdih ït booa júutap wut jĩ, “Dios wēpni ã jumna caá”, ï niiját pínah niijná. Queét Jesúihwã Dioíh mæ Salomón ã chãjat túutni coahjidih ïpĩ míic wáacap wut jĩ.

¹³ Bitã ï yéejat peéh chãjatdih úumna, queét pebhna bejcan yuhna, “Queét túinit caá”, cãacwã ïpĩ niijíp wut jĩ.

¹⁴ Neoná, yaádhbat, chah dawá Jesúsdi ït jepahap wut jĩ.

¹⁵ Pánihna, tubúp chũhñitdih Pedro ã teo jáha booaat pínah niijná, ï chéenwã queétdih ï lajatjĩh namá jwējdih ïpĩ ub juibí jwejep wut jĩ. Bitã ã mæj

jaibícanitboó booíhna, Pedroíh dadahjeh buug lájat ít náahap wut jĩ.

16 Jerusalén tútchi pehbbit jamni tútchinadih moón tubáp chũhñitdih, nemep jamnitdihbut ít ub jaibínap wut jĩ. Pánihna, queét nihatdih ít táí booa beedánap wut jĩ.

Jesús ã naáwát tútñitdih bita yeejép ã chãjat

17 Pedrowãdih dawá cãacwã ã péenachah enna, sacerdotewã ã maáh, ãjeéh jamnit saduceowãbut Pedrowãdih búdí ít íjip wut jĩ.

18 Pánih íjnit, Jesús ã naáwát tútñitdih teonit, nemat muúboó ít nemep wut jĩ.

19 Chei Dioíh ángelboó ã nemnitjidih át wãt bacanap wut jĩ.

20 “Dioíh muúná ñi bejeé. Caán muúná jaibínit, ded pah Diosjeéh ã táí jamat pínahdih cãacwãdih ñi táí bohénaá”, ángel queétdih át niijíp wut jĩ.*

21 Páant ã niijíchah joinít, baabáchah, Dioíh muúná waad béjnit, ángel ã niijátji pah cãacwãdih ít jwúub bohénap wut jĩ.

Caán yeó jáapjeh judíowã ã maáta míic wáacnit, Jesús ã naáwát tútñit nemat muúboó jamnitjidih soldadowã ã maátadih ítih ub jũúwát tútup wut yah jĩ.

22 Obohjeéhtih, nemat muúná jaibínit, queétdih ít bid jaicáp wut jĩ. Pánih bid jaicánjeh, maáta pebhna jwúub bejnit, nin pah queétdih ít niij naáwáp wut jĩ:

23 —Nemat muú jęc buujcánni yah beé. Caán nemni jęcdiwãpnit ã pãí ñuhna yah beé. Páant ã pãí ñuhuchah yahna, caán jęcdiwãtñit, jwĩ enechah, jwĩ nemnitji ã wihcap be, ít niijíp wut jĩ.

* 5:20 Jn 11.25; 14.6; Ro 6.4

24 Páant ï niijíchah joinít, Dioíh mæddíh wapnit soldadowã ï maáh, sacerdotewã ï maátabut ït joí wáhi bejep wut jĩ. “¿Dépah caá ï tóahbi queét pánihna?” queétjeh ït míic niijíp wut jĩ.

25 Páant ï míic niijíchahjeh, biíh ï pebhna juibínit, queétdih nin pah át niij naáwáp wut jĩ:

—Yeéb ñi nemnitji Dioíh mænná cãacwãdih jwáub bohéna beé ï chãjap be. Ñi enbi jwuhú oboh, át niijíp wut jĩ.

26 Páant ã niijíchah joinít, soldadowã ï maáh, áih soldadowãjĩh bejnit, Jesús ã naáwát túatnitdih ït jwáub tewep wut jĩ. Obohjeéhtih, cãacwãdih úmna, maonít déeji maocanjeh, queétdih ït teo bejep wut jĩ. “Nitdih jwĩ pñachah, cãacwãboó jwiít dihjeejĩh ï yohbipna nacaá”, queét soldadowã ït niij jenah joyóp wut jĩ.

27 Queétdih ub bejnit, Jesús ã naáwát túatnitdih maáta pebhna ït ub juibínap wut jĩ. Pánih ub juibínachah, sacerdotewã ï maáh queétdih nin pah át niij jũihñap wut jĩ:

28 —Yeebdíh tubit wutnit, ‘Jesús ded pah ã chãjatjidih ñi bohéca bojoó’, jwĩ niijíp yah be. Obohjeéhtih, páant jwĩ niijíchah yahna, yeébboó ni-hat Jerusalén tútchidih moondíh ñi bohéna caá. Jesús dih jwĩ mawatji waó jíb jwiít dih peéh chãjat náahna, pánih naóhna caá ñi chãjap, át niijíp wut jĩ.*

29 Páant ã niijíchah joinít, Pedroboó bita Jesús ã naáwát túatnit bíicdih nin pah ït niij jepahap wut jĩ:

—Diosboó jwiít dih ã naáwát túatap be. Pánihna, caandíh jepahnit jumna, ñi naáwát túatcatdih jwĩ jepahcan niít.

* 5:28 Mt 27.25

30 Jwĩ n̄owã ãpĩ wēini Dios Jesúsdih ãt boonap tajĩ. Caandíhjih tibeé yeéb cruzboó péoh dodhnit, ñi mawat túutap jĩ.

31 Jesúsdih ‘Caán túini caá’, niijnít, Dios caandíh maáh ãt waadánap wut jĩ. Pánih maáh waadánit, ã jéihyepmant bóo b̄wámant ãt ch̄udat túutap wut jĩ. Jwiit c̄acwã jwĩ yéejat peéh ch̄ajat déejidih táí ubni pínah Jesúsdih ãt jumat túutap wut jĩ. Jwiit judíowã jwĩ yéejatdih cádahnit, jwĩ túut n̄umúchah, jwĩ yéejatdih ã yohat pínah niijná, páant ãt ch̄ajap wut jĩ.

32 Pánihna, jwiitboó Jesús páant ã jumatdih ennitji, Túini Espíritu ã wēpatjĩh caandíh jwĩpĩ naóhna caá. Det ã wutdih jepahnitdih Dios Túini Espíritudih biíc yoobó ã w̄hna caá, queédih Pedro ãt niijíp wut jĩ.

33 Páant ã niijíchah joinít, chah íijnit, queét Jesús ã naáwát túutnitdih maáta ãt mao yohíhip wut yah jĩ.

34 Obohjeéhtih, Gamaliel, fariseowã poómpdih bóo, queédih ãt mao yohat túutcap wut jĩ. Caán Moisés ã wutdih bohéni ã jumuchah, c̄acwã caandíh “Caán táí ch̄ajni caá”, ãpĩ niijíp wut jĩ. Pánihna, caán Jesús ã naáwát túutnitdih soldad-owãdih ãt ub bac bej jw̄hat túutap wut jĩ.

35 Páant ã ub bac bej jw̄hat túttimah, maátadih Gamaliel nin pah ãt niij naáwáp wut jĩ:

—Yeéb wã déewãá, ñi maona chaáh b̄ca. Ñi táí jenah joi jw̄hú.

36 Teudajidih ñi náhninaá. ‘Weém c̄acwãdih táí waóhni caá wã jumap’, caanjéh c̄acwãdih ãt niijíp wut yah jĩ. Pánihna, dawá, cuatrocientos ãjééh ã

péenap yuh be. Obohjeéhtih, bitaboó caandíh ĩ mao yohochah, ãjeéh péenitji ĩ bej peét bejep be. Bũũ queéetji ĩ wihcan caá.

37 Túttimah, cãacwãdih ĩ jenah enat láa Galilea baác dih bóo Judas wũt jũmniĵi Romano cãacwã ĩ maátadih yohíhna, ãjeéhbut dawá ĩ péenap yuh be. Obohjeéhtih, bita caandíh ĩ mao yohochah, niĵat ãihwãbut ĩ bej peét bejep be.

38 Páant niijná, yeebdíh nindih naóhna caá wã chãĵap. Nit Jesúh doonádih bohénitdih páantĵeh ñi enah boĵoó. ĩ bohéat Dioh niĵcan, Teudaji ã bohéat bũudát pah ã bũud béjmina caá.

39 Obohjeéhtih, nin Dios ã bohéat yoobát ã jũmũchah, queétdih ñi jéih cádahat túutcan niit. Páant ñi cádahat túutna, yeéb Diosĵih míic maona caá ñita chãĵap taga, Gamaliel át niijíp wũt ĵĩ.

40 Páant ã niijíchah ĵoinít, “Yoobópdih tigaá”, maáta ĩt niij jenah ĵoyóp wũt ĵĩ. Pániĵ jenah ĵoinít, Jesús ã naáwát túutnitdih ĩt ĵwũub bid boĵop wũt ĵĩ. Páant ĩ ĵwũub waád ĵuibínachah, queétdih ĩt puñat túutũp wũt ĵĩ. Páant ĩ pũi péanachah, “Jesúh doonádih yeéb ñi ĵwũub bohéca boĵoó”, niij ĵũih péanit, queétdih ĩt beĵat túutũp wũt ĵĩ.

41 Páant ĩ beĵat túutũchah ĵoinít, ĩt ĵwũub bac bejep wũt ĵĩ. Jesúhwã ĩ ĵamat ĵiib, yeejép yapna, búdí ĩt weñep wũt ĵĩ.

42 Pániĵna, yeó jáap ĵamat pah Dioh mũúboó, ĩih mũunáboobút “Jesús Dios ã wahni Cristo ã ĵamna caá”, ĩpĩ niij naóh bohénap wũt ĵĩ.

6

Siete teo wáacnit pínahdih Jesúhwã ĩ ñĩwat

¹ Caán láa Jesúih doonádih bohénit ït dao béjep wut jĩ. Pánih dao béjna, Jesúihwã míicjeh jamna yuhna, ït míic jũihñap wut jĩ. Biquína judíowã jamna yuhna, Griego wéheatdih wéhenit ït jamap wut jĩ. Queétboó ïjeéh éemp wannit yaáhdih yeó jáap jamat pah ïih jeémát dih ï tái biic yoobó wũh jeémpcah enna, Hebreo wéheatdih wéhenitdih ït jũihñap wut jĩ.

² Páant ï míic jũihñachah jéihnit, Jesús doce ã naáwát túutnitboó bita ãihwãdih bid bojnit, nin pah ït niij naáwáp wut jĩ:

—Dios naáwát dih bohéat jwĩih tewat ã jamuchah, jeémát dih jwĩ jéih pãáhcan caá.

³ Pánihna, jwĩ déewãá, siete neonádih ñi ñíwíi, jeémát dih pãáhnit ï jamat pínah niijná. Bita queétdih ‘Táinit caá’, ï niijnít, Táini Espíritu ã wēpat búdí jamnit, tái jenah joinít dih ñi bidíi.

⁴ Obohjeéhtih, jwiítboó yeó jáap jamat pah Diosdih wúbhnit, ã naáwát dih jwĩ bohébična caá, ït niijíp wut jĩ.

⁵ Páant ï niijíchah joinít, “Júu. Páant tíi jwĩ chãjap”, nihat Jesúihwã ït niij jepahap wut jĩ. Pánihna, Esteban, Jesús dih tái jenah joiní, Táini Espíritu ã wēpat búdí jamnidih ït ñíwip wut jĩ. Bitadihbat ït ñíwip wut jĩ. Nin caá ï wãtna: Felipe, Prócoro, Nicanor, Timón, Pármenas, Nicolás. Caán Nicolásboó Antioquía tátchidih bóo judío nihcan yuhna, judíowã ï bohéat dih joiná, ïjeéh waadni ãt jamap wut jĩ.

⁶ Páant ï ñíonitdih Jesús ã naáwát túutnit pebhna ït ub juibínap wut jĩ. Queét ï ub juibínachah ennit, ï ñíonitdih teo jãhanit, ït wúbáp wut jĩ, Dios queétdih ã tái teo wáacat pínah niijná.

⁷ Pánihna, caán baácdih moón Dios naáwát dih chah dawá jéihnit ï jumuchah, Jerusalén tútchiboó jumnit Jesúihwã ït dao béjep wut jï. Sacerdotewãbut dawá túut numnít, Jesúihwãjeéh ït waadáp wut jï.

Bitá Estebandih ï tewat

⁸ Esteban, caandíh Dios búdí ã teo wáacachah, ã wēpatjñ dawá láa jwiit cãacwã jwï jéih chãjca naáhdih ãt chãj júutap wut jï. Páant ã chãj júutachah ennit, cãacwã Jesúih doonádih chah ït joíhip wut jï.

⁹ Obohjeéhtih, biguína judíowã ï míic wáacat mūdíh moón caandíh ït jãihñap wut jï. Queét Teo Wühnitji wüt jumni poómp ït jamap wut jï. Cirene tútchidih moón, Alejandría tútchidih moón, Cilicia baácdih moón, Asia baácdih moón ït jamap wut jï. Queét wut jï Estebandih jãihnit ït jamap wut jï.

¹⁰ Pánihna, Esteban Túini Espíritu ã wēpat búdí jumnit, táí jéihni jumna, ã wéhenachah joinít, queétoó caandíh bíic yoobó ït nihcap wut jï.

¹¹ Bíic yoobó nihcan, íjna, bita ï yee naáwát pínah niijná, ït jíib wühap wut jï. Páant ï yeeat túutachah joinít, nin pah ït níj naóh yacap wut jï: “Esteban Moisés ã wutatjidih Diosdihbut yeejép ã wéhenachah, jwï joyóp be”, ït níj yeenap wut jï.

¹² Páant ï niijíchah joinít, cãacwã, Moisés ã wutatjidih bohénit, bita waóhñitbut Estebandih ït íjip wut jï. Pánih íjnit, caandíh teonit, ï maáta pebhna ït ub bejep wut jï.

¹³⁻¹⁴ Queét ï yeeat túutnitji nin pah ï maátadih ït níj yeenap wut jï:

—Nin yeó jáap jumat pah Dioíh mūdíh, Moisés ã wutatjidihbut yeejép ãpñ wéhenap be. Nin pah

ã niijíchah, jwiít jwĩ joyóp be: ‘Jesús Nazaret tútchidih bóo Dioíh m̄udíh ã yohbipna caá. Moisés ã w̄tatjidihbut ã jw̄ub túut n̄mbípna caá’, Esteban ã niijíp be, ìt niijíp w̄t jĩ.

¹⁵ Nihat caanjĩh ch̄udnit Estebandih ì enechah, ãih móot ángelíh móot panih yeh iigni ãt jígohop w̄t jĩ.

7

Esteban ã míic jãh niiját

¹ Sacerdotewã ì maáh nin pah Estebandih ãt niij w̄bh joyóp w̄t jĩ: “¿Nit ì niiját yoobópdihi niít?” ãt niijíp w̄t jĩ.

² Páant ã niijíchah joinít, Estebanboó nin pah caandíh ãt niij jepahap w̄t jĩ: “Wã déewãá, behnitbut ñi joyoó. Weemdíh ì naóh yacat yoobópdihi nihcan caá. Ded pah Moisés ã chãjatjidih yeéb ñi jenah joyát pah weembút biíc yoobó wã jenah joiná caá. Ded pah jwĩ n̄owã ì chãjatjidihbut biíc yoobó wã jenah joiná caá. Jwĩ n̄o Abrahamji Mesopotamia baácdihi ã j̄m̄chah, Harán baácboó ã bejat pínah jãtih, Dios nihat jéihni j̄m̄na, caandíh ãt jígohop w̄t jĩ.

³ ‘Meém míih baácdihi ma déewãdihbut ma cádah bejeé. Páant ma bejehah, wã ñioni baácna meemdíh wã waóhbiipna caá’, Abrahamjidih Dios ãt niijíp w̄t jĩ.*

⁴ Páant ã niijíchah joinít, Abrahamji Caldea baácmant ãt n̄mah j̄úwúp w̄t yah jĩ. Pánih ȳúp j̄óhniit, Harán baácna joinít, ìt chão jw̄uhap w̄t jĩ.

* 7:3 Gn 12.1

Behe ã wunat túttimah, nin jwĩ jumni baácdih Dios Abrahamwãjidih ãt jũúwát túutur wut jĩ.*

⁵ Obohjeéhtih, Abrahamji Dios ã naóhni baácdih ã juyúchah yuhna, ãih baác pínahdih caandíh ãt wũh jwuhcap wut jĩ. Jibnitjeh ãt jumur wut jĩ. Abrahamji ã weh wih jwuhcah, Dios caandíh nin pah ãt niij naáwáp wut jĩ: ‘Meemdíh, ma jumenádhbut nin baácdih wã wũhbipna caá’, ãt niijíp wut jĩ.*

⁶ Túttimah, ma jumená biíh baácna bejnit, caán baácdih moónjeéh jumna, queétdih teo wũhñit ã jumbipna caá. Pánihna, cuatrocientos jópchi ma jumenádh wuejép ã chãjbipna caá.

⁷ Obohjeéhtih, páant ã chãjat jíib, weém caán baácdih moondíh wã peéh chãjbipna caá. Páant wã peéh chãjat túttimah, ma jumená nin baácna ã jwúub juibípna caá, páant mantih. Pánih jwúub junít, weemdíh jepahñit, ã wẽi wũhbipna caá’, Abrahamdih Dios ãt niijíp wut jĩ.*

⁸ Páant niijnít, Dios nin pah caandíh ãt jwúub niij naáwáp wut jĩ: ‘Weém wã niijátjidih wã náhniat pínah, yeebbút ñi náhniat pínah niijná, nin pah ñi chãjaá: Quehli nah yapat chóodih ñi bóod yohoó. Meém miícjeh, ma jumenádhbut biíc yoobó bóodnit ñi jumú’, ãt niijíp wut jĩ. Pánihna, Abraham áa Isaacdih mi weép jumuchah, ocho yeó jáap túttimah, ãih quehli nah yapat chóodih Abraham ãt bóod yohop wut jĩ. Túttimah, Isaac Jacob pínahdih ãt weh jumur wut jĩ. Pánihna, Jacobboó docewã ãt weh jumur wut jĩ. Queét doceboó jwĩ

* **7:4** Gn 11.31; 12.4 * **7:5** Gn 12.7; 13.15; 15.18; 17.8 * **7:7** Gn 15.13-14; Ex 3.12

nuowã pínah ít jumup wut jĩ.*

⁹ “Queét jwĩ nuowã í úud Josédih íijnit, caandíh yohna, Egipto baácna bejnitdih ít jíib chāj wāhup wut jĩ. Páant í jíib chāj wāhniiji ā moh yéječah enna, Dios Josédih āt túi teo wáacap wut jĩ.*

¹⁰ Páant ā teo wáacachah, José túi jenah joiní ā jumuchah, Faraón Egipto baác dih moón í maáhboó Josédih āt wēi enep wut jĩ. Diosboó caandíh páant āt wēi enat túutup wut jĩ. Pánih wēi enit, Faraón Josédih nihat Egipto baác dih moondíh tewat wutni maáh pínah āt waadánap wut jĩ. Ā pebh moondíhbut maáh āt waadánap wut jĩ.*

¹¹ “Caán láa Egipto baácboó Canaán baácboobút mah ā buugcáh, caán baác nadih moón tubit ít moh yéjep wut jĩ. Pánihna, jwĩ nuowābut jeémát ít jéih bid juicáp wut jĩ.*

¹² Egipto baácboó jeémát jumap doonádih joinít, Jacob ā wehdih neoh āt jwíih wah bojop wut jĩ.

¹³ Túttimah ā jwúub wahachah, Egipto baácboó í juibínachah, ‘Weém ñi úud tigaá’, José ā úud jeñénadih āt niijíp wut jĩ. Pánihna, Joséboó ā déewādih ā maáh Faraóndih āt júutup wut jĩ.*

¹⁴ Túttimah, José ā íip Jacobdih ā déewādihbut āt bidip wut jĩ. Ā déewā setenta y cinco cāacwājeh ít jum jwuhup wut jĩ.*

¹⁵ Ā wūh ā bid bojochah joinít, Jacobwā ā wūh pebhna Egipto baácboó ít bejep wut jĩ. Caaná juibínitji ít buadúp wut jĩ.*

* **7:8** Gn 17.10-14; 21.2-4; 25.26; 29.31-35.18 * **7:9** Gn 37.11,28;

39.2,21 * **7:10** Gn 41.39-41 * **7:11** Gn 42.1-2 * **7:13** Gn 45.1,16

* **7:14** Gn 45.9-10,17-18; 46.27 * **7:15** Gn 46.1-7; 49.33

16 Jacob ã ñuo Abraham Hamor báadhda wehdih Siquem wõt jumni baácboó ï wññchah ï yohat pínahdih átát jíib chãjap wõt jĩ. Pánihna, Abraham ã jíib chãjniji baácboó Jacobíh bácahjidih ùb bejnit, ã wehboó ït yohop wõt jĩ.*

17 “Táttimah, ‘Nin baácđih yeebđih wã wãhbipna caá’, Dios Abrahamdih ã niijátji pah tóah jũúwúchah, Egipto baácboó jwĩ déewã ït cãac poonap wõt jĩ.

18 Egipto baácđih ï jumñchah, biíh maáh Faraón ï niijní, át túut ñumúp wõt jĩ. Caán Faraónboó ded pah José ã chãjatjidih át jéihcap wõt jĩ.*

19 Pánih jéihcan, jwĩ ñowãdih yeejép chãjna, ï weh jáap túuhnitdih át mao yohat túutup wõt jĩ.*

20 Páant ã yapat cãtíh, Moisés pínah ã cãac jumñchah, Dios caandíh át túi wěi enep wõt jĩ. Pánihna, ã mána tres widh caanbítđih júutcanjeh, ïih muúboó ït túi bih bíbohó wõt jĩ.*

21 Pánihat táttimah, Moisésdih muúboó jéih bíbohcan, ã mána caandíh majboó ït pahanap wõt jĩ. Páant ï pahanidih Faraón ñum bíđ júi, ùb aab béjnit, mi wũúh pah mit behanap wõt jĩ.*

22 Egipto baácđih moón túi jéihnitíhdih Moisésdih ït bohénap wõt jĩ. Pánihna, caán maáh wũúh pah át jumup wõt jĩ.

23 “Táttimah, caán cuarenta jópchi bíbohnit, ã déewã judíowãdih enedih át bejep wõt jĩ.

24 Pánih enedih juibína, Egipto baácđih bóo judíodih yeejép ã chãjachah, Moisés át enep wõt

* 7:16 Gn 23.3-16; 33.19; 50.7-13; Jos 24.32 * 7:18 Ex 1.7-8

* 7:19 Ex 1.10-11,22 * 7:20 Ex 2.2 * 7:21 Ex 2.3-10

jĩ. Páant ã chãjachah ennit, ã déedih teo wáacadih bejna, Egipto baácdih bóodih át mao yohop wut jĩ.

25 Pánih chãjna, ‘Wã déewã ĩ déedih wã teo wáacachah enna, “Dios jwiít dih táı ubni pínah át wahap taga”, ĩ niıj jenah joibípna caá’, Moisés át niıj jenah joyóp wut yah jĩ. Obohjeéhtih, queétboó páant ĩt niıj jenah joicáp wut jĩ.

26 Biıh yeó jáapdih chénewã ã déewã ĩ míc mawachah, Moisés át enep wut jĩ. Pánih enna, ‘¿Yeéb biıcwãjeh dépanih míc mao tigaá ñi chãj?’ queét dih át niıjíp wut yah jĩ.

27 Obohjeéhtih, páant ã niıjíchah joinıt, ã déedih yeejép chãjniıboó Moisésdih át ub tóo yoh bojop wut jĩ. ‘Meém jwı maáh nihcan, jwiít dih wutni nihcan caá.

28 ¿Jwıın Egipto baácdih bóodih ma mao yohatji pah weemdıhbut mao yohıh niıt ma chãjap?’ át niıj jãihñap wut jĩ.

29 Páant ã niıjíchah joı wáhi bejnit, Moisés Madián baáçboó át jweı béjep wut jĩ. Caaná jweı juibíniji áa jumnit, chénewã át weh jumap wut jĩ.*

30 “Madián baáçboó Moisés cuarenta jópchi jumna, mawı wihcapboó Sinaı jee pébh jumnit, máa chálih iignı panihnidih át enep wut jĩ. Caán iigát panihat cãtıh ángelboó caandıh át jíghop wut jĩ.

31 Páant ã jíghochah, Moisés át en wáhi bejep wut jĩ. Pánih en wáhi bejna, caán máa chálih iignı panihni pehbbit enedih ã bejchah, Dios caandıh nin pah át niıj naáwáp wut jĩ:

32 ‘Weém Dios caá. Weemdıhjeh caá ma nıowã, Abraham, Isaac, Jacob ĩ táı wěi wúbáp’, át niıjíp

* 7:29 Ex 2.11-15; 18.3-4

wut jĩ. Páant ã niijíchah joinít, Moisésboó méménit, úumna, ãt en ñahacap wut jĩ.

33 Pánihna, Dios nin pah caandíh ãt jwúub niij naáwáp wut jĩ: ‘Buu wã pebh ñuhna, míih zapatos-dih waícanjeh ma too dugúú.

34 Wíih cãacwã Egiptoboó jumnit, yeejép yapna, tubit moh yéejnit ĩ juñúchah, wã joiná caá. Páant ĩ juñátdih joinít, queétdih teo wáacat náahna, Egipto baácboó meemdíh wahat túut niijná, ma pebh wã dei júúwáp be. Pánihna, buu conboó ma jwúub bejeé’, Dios Moisésdih ãt niijíp wut jĩ.*

35 “Ī náahcannijidih yuhna, ĩ maáh pínah, queétdih táí ubni pínahdih Diosboó ãt wah jwúuba bojop wut jĩ. ‘Meém jwĩ maáh nihcan, jwiútdih wutni nihcan caá’, ĩ jãh niijéhnijidih Dios Egipto baácboó ãt wah bojop wut jĩ, queétdih ã numah bac júúwát pínah niijná. Pánih wahna, Moisésdih teo wáacni pínah máa chálíh iigní panihni cãtíh jumni ángeldihbut Dios ãt wahap wut jĩ.

36 Pánihna, Egipto baácboó jumnitji judíowãdih Moisés ãt numah júúwáp wut jĩ. Egipto baácboó caán Moisés Dios ã wēpatdih ãt jwíh júut waáwáp wut jĩ. Táltimah, Muj Mac Duni wut jumniboó ãt jwúub júutap wut jĩ. Táltimah, muú wihcapboobút cuarenta jópchi ĩ jumuchah, Dios ã wēpatdih páant ãpĩ júutap wut jĩ.*

37 Caán Moisésboó judíowãdih nin pah ãt niij naáwáp wut jĩ: ‘Weém wã nihah pah muntih Dios naáwátdih naóh yapani pínahdih yeebdíh ã wah-bipna caá. Caán ñijeéh ã jum-bipna caá’, Moisés

* 7:34 Ex 3.1-10 * 7:36 Ex 7.3; 14.21; Nm 14.33

queétdih át niijíp wut jĩ.*

38 Moisés mʉú wihcapboó jwĩ nʉowā biícđih át jumap wut jĩ. Sinaí wūt jumni jeená caandih naóhniĵi ángeljeéhbut át jumap wut jĩ. Ĵjeéh jumnit, Dios ā wʉtatđih Moisésboó át naóh yapanap wut jĩ, caandih jepahnit, Diosjeéh ĩ túi jummat pínah niijná. Jwiítbut jwĩ joyát pínahđih át naáwáp wut jĩ.*

39 “Pánih ĵáóhnitĵi mʉú wihcapboó jumna, Egipto baácboó jwúub beĵihna, Moisésđih náahcan, jwĩ nʉowā ā wʉtatđih ĩt yap yohop wut jĩ.

40 Pánih yap yohna, Moisés úud jeñé Aaróndih nin pah ĩt niijíp wut jĩ: ‘Jwiítđih waóhnit pínah Dios panihnitđih ma pāp wūhʉú. ĴEgipto baácboó jwĩ jumachah, jwiítđih numah ĵáóhni Moisés ded pah tigaá át beĵ?’ ĩt niijíp wut jĩ.*

41 Páant niijnít, queét momo jiwí wūúh pah jíghnidih orojĩh ĩt pāpap wut jĩ. Pánih pāp péanit, queét nuñápdih mao ub ĵáóhnit, ĩ pāpnidih cáo wūhna, búdí ĩt weñep wut jĩ.*

42 Páant ĩ pāpnijidih ĩ weñechah ennit, ‘Weemdih yohnit, cúiwāđih, widhđih, yeodihbut ĩ wēi dáhwa naáh’, niijnít, Dios queétdih átih yohop wut yah jĩ. Páant ĩ chāĵatĵidih Dios naáwátđih naóh yapani nin pah át niúĵ daacáp tajĩ:

‘ “Yeéb weemdih yeeĵep ñi chāĵap be. Mʉú wihcapboó cuarenta jópchi jumna, yeéb judíowā nuñápwāđih mao cáonit, weemdih wūhna, ñita túi chāĵ tagaá. Obohjeéhtih, weémboodih ñi náhnicap be.

* 7:37 Dt 8.15,18 * 7:38 Ex 19.1-20.17; Dt 5.1-33 * 7:40 Ex 32.1

* 7:41 Ex 32.2-6

43 Pánih náhnican, Móloc wūt jumnidih wēinit, ãih m̄udíh ñi bíbohop jĩ. Bíih cúí Refán wūt jumni, caan páh jíghni yeéb ñi pāpni dahdihbut ñi weñep be. Pánihna, yeebdíh peéh chājna, yuúp Babilonia baácboó wā wahbipna caá”, Dios ã niijná caá’, át niij daacáp tajĩ. *(Am 5.25-27)*

44 “Jon jātih moón jwĩ nuowā m̄ú wihcapboó jumna, Dios ĩjeéh ã jummat pínah niijná, nuñúp chóojĩ ĩ chājni m̄udíh ĩt bíbohop wut jĩ. Caán m̄udíh Dios ã niijátji pah biíc yoobó Moisés át chājap wut jĩ. Caán m̄ú diítboó Dios ã wutat daácni jeé naaná át jumap wut jĩ.*

45 Pánihna, queédih Dios ã naóhniji nin baácđih jainá, Josué jwĩ nuowā bícdih caán m̄udíh ĩt ub juyúp wut jĩ. Páant ĩ ub juyúchah, Dios queédih teo wáacna, caanjĩh jumnitjidih át yohop wut jĩ. David ã jum láabut caán m̄udíh ĩt bíboh jwuhap wut jĩ.*

46 Pánihna, caandíh Dios ã túi weñechah jéihnit, caán ĩjeéh ã jummat pínah m̄udíh chājihna, David Diosdih ātih uúbúp wut yuh jĩ.*

47 Obohjeéhtih, páant ã uúbúchah yuhna, ã wunat túttimah, ã wūh Salomónboó Dioih m̄udíh át chājap wut jĩ.*

48 Pánih chājna yuhna, Diosboodíh cācwā ĩ chājni m̄udíh ĩ jéih nemcan caá. Páant niijnít, Dios naáwáđih naóh yapani nin pah át niij daacáp tajĩ:

49 ‘ “Japboó wā chúdat panihni caá. Caánboó chúdna, nihatđih wā wutna caá. Pánihna,

* 7:44 Ex 25.9,40 * 7:45 Jos 3.14-17 * 7:46 2S 7.1-16; 1Cr 17.1-14 * 7:47 1R 6.1-38; 2Cr 3.1-17

noónboó wĩih jítcha wã chũi chũdat panihni caá. Pánih chũi chũdna, chah wěpni wã jumna caá. Weém Dios caá. Páant wã jumachah, wĩih muú pínahdih ñi jéih teo wãhcan caá. Wã chooát pínah mũdih wã náahcan caá.

⁵⁰ Weemjéh nin baácboó nihatdih wã chãjap jĩ”, Dios ã niijná caá’, ãt niij daacáp tajĩ. *(Is 66.1-2)*

⁵¹ “Jwĩ ñowãji ĩ yap yohat pah muntih yeebbát Diosdih ñi yap yohna caá. Dios naáwát dih joiná yuhna, yeéb yehna joyáh bojnit Túini Espíritudihbut yehna ñi niijná caá.*

⁵² Jwĩ ñowãji Dios naáwát dih nihát naóh yapanitdih yeejép ĩt chãjap wut jĩ. ‘Táttimah túini yoobát ã jũóhbirna caá’, queét ĩ niij naáwáchah, jwĩ ñowã ĩt joijí ta yah caá. Oboghjeéhtih, páant niij naóhnitjidih ĩpĩ mao yohop wut jĩ. Pánihna, ‘Túini yoobát ã jũóhbirna caá’, ĩ niijníji Jesús dih yeebbát ñi mawap be.

⁵³ Dios ã wut atdih ángelwã Moisés dih ĩt naóh yapanap wut yah jĩ, jwĩ joyát pínah niijná. Oboghjeéhtih, ĩ wut atjidih jwĩ bíbohna yuhna, yeébboó caandih ñi yap yohna caá”, Esteban ãt niijíp wut jĩ.

Estebandih jee dáhnajĩh ĩ yoh mawat

⁵⁴ Páant ã niijíchah joinít, queétboó tãbit ĩt íjip wut jĩ. Pánih íjna, úm náah jumnit ĩt jígohop wut jĩ.

⁵⁵ Páant ĩ íjichah yuhna, Túini Espiritu caandih búdí ã teo wáacachah, japboó chéi en ñahanit, Dios ã

* **7:51** Is 63.10

yeh iigátdih, Jesús Dios ã jéihyepmant bóo b̄wámant ã ñ̄h̄uchahb̄ut Esteban ãt enep w̄ut j̄i.

56 —;Ñi enee! Jeáboó jéweat panihni ã jum̄uchah, Jesús nihat c̄aacwã úud jeñé, Dios ã jéihyepmant bóo b̄wámant ã ñ̄h̄uchah, wã enna caá, ãt niijíp w̄ut j̄i.

57 Páant ã niijíchah joinít, queét t̄ubit íj yapna, ñ̄aácnit, ñ̄ih molít dih nem teo, ñáo ñah bejnit, caandíh ñt tewep w̄ut j̄i.

58 Pánih teonít, caán t̄úchimant wái bac bejnit, jee dáhnaj̄ih ñt yoh mawap w̄ut j̄i. Páant ñ yohat pínah j̄áti, jih ñ d̄oní yégueh ch̄oonadih t̄oo dug jwejnit, jáap beh t̄oahni Saulo w̄ut jum̄nidih ñt wap̄at t̄úutap w̄ut j̄i.

59 Estebandih jeej̄ih ñ yohochahjeh, “Maá Jesús, w̄ih caolihdih ma ub̄ú”, ãt niijíp w̄ut j̄i.*

60 Páant niijnít, bódiha caj yoh ñajnit, “Maá, weemdíh yeejép ñ ch̄ajachah ȳhna, queédih ma peéh ch̄ajca bojoó”, niijnít, ãt w̄nah bejep w̄ut j̄i.*

8

Saulo Jesúhwãdih yeejép ã ch̄aj

1-2 Bitã Jesúhwã Estebanjidih baad yóhna, búdí ñt juñúp w̄ut j̄i. Obohjeéhtih, Sauloboó Estebandih ñ mawachah enna, “Táina caá”, ãt niij jenah joyóp w̄ut j̄i. Caán yeó jáapjeh Jerusalén t̄úchidih jum̄nit Jesúhwãdih eníhcan, yeejép ñt ch̄aj jwíhip w̄ut j̄i. Páant ñ mao jwíhichah, Jesúhwã Jerusalén t̄úchimant Judea baác, Samaria baác nab̄ut yuúp ñt jweí peét bejep w̄ut j̄i. Jesús ã naáwát t̄útnit pohba ñt bejcap w̄ut j̄i.

* 7:59 Sal 31.5; Lc 23.46 * 7:60 Lc 23.34

3 Pánihna, Sauloboó Jesúíhwãdih eníhcan, queédih yeejép chãjna, ñih munnádih waadnít, neonádih, yaáhdihbut teo wái bacnit, nemat muúboó ãpĩ nemat túutup wut jĩ.*

Felipe Samaria baácboó Jesúíh doonádih ã bohéat

4 Pánih jweí peétnitji ñ juibíni tútchinadih moondíh Jesúíh táini doonádih ñpĩ naáwáp wut jĩ.

5 Samaria baácboó jumni chah búdí tútchina juibínit, Felipebut caán tútchidih moondíh Jesúíh táini doonádih ãt naáwáp wut jĩ.

6 Páant ã naáwáchah joinít, Dios ã wēpatjĩh jwiít cãacwã jwĩ jéih chãjca naáhdih ã chãjachah ennit, caanjĩh moón dawá ñt túi joyóp wut jĩ.

7 Dawá nemép jumnit ã pebh ñ juibínachah, nemépwãboodíh ãpĩ bac bejat túutup wut jĩ. Páant ã bac bejat tútuchah joinít, nemépwã ñaácnit, ñpĩ bac bejep wut jĩ. Dawá jéih wulícannitdih, jéih bejcanitdihbut ãpĩ booanap wut jĩ.

8 Páant ã chãjachah enna, caán tútchidih moón búdí ñt weñep wut jĩ.

9 Caán tútchidih bóo Simón wut jumni, jióhni ãt jumup wut jĩ. Pánihna, caán tútchidih moondíh jióhni ded pah ñ chãjatdih ãpĩ chãj júutup wut jĩ. Páant ã chãjachah enna, caanjĩh moón en wúhi bejnit, Simóndih ñt úumup wut jĩ. Nin pah ãpĩ niijíp wut yah jĩ: “Weem páh jéihni bita wihcan caá. Dedé weemdíh jumdhcan caá”, ãt niijíp wut jĩ.

10 Páant ã chãjachah enna, “Nin Dios pah muntih wēpat bíbohni caá”, cãacwã ñ maáta bíicdih ñt niijíp

* 8:3 Hch 22.4-5; 26.9-11

wut yuh jĩ. Queét nihat caandíh ít táí joi jwáhup wut jĩ.

11 Páant ã chājatjĩh queétdih maatápdih át júutap wut jĩ. Páant ã chāj júutachah enna, queétboó wúhi bejnit, caandíh ít táí joyóp wut jĩ.

12 Obohjeéhtih, caandíh ĩ joyóchah yuhna, Felipeboó Dios maáh ã jumatdih, Jesucristoíh táini doonádihbut ã naáwáchah joinít, Simóndih cádahnit, Felipeboodíh ít joyóp wut jĩ. Pánih táí joinít, ĩ jepahachah enna, Felipe neonádih, yaáhdihbut át daabánap wut jĩ.

13 Simónbut Felipe ã naáwáchah joinít, Jesúsdi h ã jepahachah, caandíhbut át daabánap wut yuh jĩ. Páant ã daabáat túttimah, Felipejeéh caanbát át péenap wut jĩ. Felipe Dios ã wēpatjĩh chāj júutnit, tubúp chūúhndih ã táí boanachah enna, Simón át en wúhi bejep wut jĩ.

14 Samaria baácdih moón Dios naáwát dih ĩ táí jepahat dooná Jerusalén tútchina Jesús ã naáwát túutndih át jubínap wut jĩ. Páant ĩ jepahat doonádih joinít, Pedro, Juan biícdih, Samaria baácna ít wahap wut jĩ.

15 Pánih caanná jubínit, Pedrowã Jesúsdi h jáap jéihndih Diosdi h ít úbúp wut jĩ, Táini Espiritu ã wēpat queétdih ã jumap pínah niijná.

16 Queét Samaria baácdih moón Jesúhwã ĩ jumap júutat pínah niijná, queétdih Felipe átát daabánap wut jĩ. Jesúsdi h jeh ít jéih jwáhup wut jĩ. Obohjeéhtih, caán láa, Táini Espiritu ã wēpat queétdih át wih jwáhup wut jĩ.

17 Pánihna, Pedro Juanjĩh Samaria baácdih moondíh ĩ teo jáha úbúchah, Táini Espiritu ã wēpat queétdih át jum jwíhip wut jĩ.

18 Pedrowã ï teo jãha ʘúbúchah, Túini Espíritu ã wēpatjĩh mácah wéheatjĩh ï wéhenachah, Simón ãt enep wat jĩ. Pánih ennit, Pedrowã ï wēpat déedih náahna, dinerojĩh ãtih jíib chãjĩhip wat yuh jĩ.

19 —Weembát cáacwãdih wã teo jãha ʘúbúchah, Túini Espíritu ã wēpat queétdihbut ã jummat pínah niijná, weemdíhbut ñi wēpat déedih ñi wãhʘú, ãt niijíp wat yuh jĩ.

20 —Míih dinerojĩh Dios ã wēpatdih ma jíib chãjíhat yeejép caá. Pánihna, caandíh ma jíib chãjíhat peéh míih dinero bíicdih iiguípna ma bejeé.

21 Dios ã enechah, ma jenah joyát yeejép ã jumna caá. Nindih jwiít jwĩ chãjat pah meém chãjni pínah nihcan caá.

22-23 Wēpatdih tubit en ñinahnit, tubit íj yaicánniabehe caá. Pánih jumna, yeejépdih ma jéih cádahcan caá. Yeejép ma jenah joyátidih Dios ã yohat pínah niijná, caandíh ma ʘúbú. Páant ma chãjachah enna, caán ma yéejatdih ãta yoh tagaá, Pedro jíóhni Simóndih ãt niij jãihñep wat jĩ.

24 —Weemdíh yeéb Diosdih ñi ʘúbú, ma niijípboó wã bejcat pínah niijná. Caán waó jíib iiguípna wã bejihcan caá, Simón ãt niijíp wat jĩ.

25 Túttimah, Pedro Juanjĩh Dios naáwátidih bíih tútchinadih moondíh naáwátidih ït bejep wat jĩ. “Jesús ã boo pud jãúwát túttimah, caandíh jwiít jwĩ enep jĩ”, Samaria baácidih moondíh ït niij naóh peetép wat jĩ. Pánihna, caanjĩh moondíh bohé péanit, Jerusalén tútchina ït jwãub bejep wat jĩ.

Felipe Etiopía baácidih bóodih ã bohéát

26 Felipe Samaria baácboó ã jumuchah, Dioíh ángel caandíh nin pah ãt niij naáwáp wat jĩ: “Mʘú

wihcapboó Jerusalén tútchimant Gaza baácboó bejni namána chóop yapapboó ma bejee”, át niijíp wut jĩ.

27 Páant ã niijíchah joinít, caanná át bejep wut jĩ. Caán namádih Etiopía baácđih bóo jwúub bejna át chãjap wut jĩ. Caán Etiopía baácđih moón ĩ maáh wili Candace wut jumnihĩh dinerodih en daoní wut jĩ. Jerusalén tútchiboó Diosđih weñedih juibíniji jwúub bejna át chãjap wut jĩ.

28 Āih tútchina pătúniđĩh jwúub bejna, Dios naáwátđih naóh yapani Isaías ã daácni náojidih enna át chãjap wut jĩ.

29 Pánihna, Táini Espíritu Felipedih nin pah át niijíp wut jĩ: “Con bejni pătúni pebhna ma bejee”, át niijíp wut jĩ.

30 Páant ã niijíchah joinít, Felipeboó pătúni pebhna juibínit, caán náodih Etiopíadĩh bóo ã míc en naáwáchah, át joyóp wut jĩ.

—¿Ma ennidih ma beh joí niít? Felipe caandĩh át niij úubh joyóp wut jĩ.

31 —Weemdĩh bohéni ã wihcah, wã túi beh joicán caá. Wã pebh jui chúđnit, weemdĩh ma bohénaá, Felipedih át niijíp wut jĩ.

—Júu, niijnít, ã pebh át juibí chúđup wut jĩ.

32 Dios naáwátđih naóh yapani Isaías nin pah ã niij daacátjidiđ Etiopía baácđih bóo míc en naóhna át chãjap wut jĩ:

“Ovejadiđ mawat túut, ĩ teo wáyachah, ã ñaáccat pah muntih caanbút caandĩh ĩ tewečah, laihcanni ã jumbipna caá. Oveja yoóđđih ĩ bóodočah, ã ñaáccat pah muntih caanbút laihcanni ã jumbipna caá.

33 Caandíh ï deoh naóhbipna caá. Caán yeejép ã chãjcah yuhna, queétboó caandíh yeejép ï chãjbipna caá. Pánihna, caandíh ï mao yohochah, weh wihcanjeh nin baácboó ã buudbípna caá”, Isaías át niij daacáp tají. (Is 53.7-8)

34 Caán núodih en naóhnit, Etiopía baác dih bóo Felipedih nin pah át niij úbh joyóp wut jĩ:

—Ma naáwá weemdíh. ¿Nin Isaías ã niijátji dedna tigaá? ¿Caanjéh naóh niít át chãjjip? ¿Bííhdih naóh niít át chãjjip, páant ã niijná? át niijíp wut jĩ.

35 Páant ã niij úbh joyóchah joinít, Felipeboó caán núodih ennit, Etiopíadih bóodih Jesúh táini doonádih át naáwáp wut jĩ.

36 Páant niij béjna, ímdih ít enep wut jĩ.

—¡Enejúh! Conboó ím caá. ¿Weemdíh ma daabáihcan niít? Felipedih át niijíp wut jĩ.

37 —Jesúsdih ma táí jepahachah, meemdíh wã daabábipna caá, Felipe caandíh át niijíp wut jĩ.

—Dios wúh Jesúsdih weém wã táí jenah joiná caá. Caán Jesús Dios ã wahni Cristo ã jumatdih wã táí jéihna caá, át niij jepahap wut jĩ.

38 Páant niijnít, pütáni íoh teonidih át chãwáát túutup wut jĩ. Caán ã chãwáchah, dei ñuhnit, ímna ít dei juibínap wut jĩ. Pánih dei juibínit, ímdih póbó púud bac bej juibí ñuhnit, Felipeboó caandíh át daabánap wut jĩ.

39 Daabá péanit, ï aab ñúhuchah, Táini Espiritu Felipedih át ubah bejep wut jĩ. Á buudáh bejchah, Etiopíadih bóo caandíh át jwúb encap wut jĩ. Pánihna, Jesúsdih jepahna, táí wéinit, áih baácna át jwúb bejep wut jĩ.

40 Túini Espíritu Felipedih ã ub bejehah, Azoto tátchina ãt juibínap wut jĩ. Pánihna, nihat tátchinadih moondíh Jesúih táini doonádih naóh jibna, Cesarea tátchiboó ãt juibínap wut jĩ.

9

*Saulo ã túnt nuumát
(Hch 22.6-16; 26.12-18)*

1 Páant Felipe ã chãjat pónih, Sauloboó Jesúihwãdih en jũihna, “Queétdih maomi caá”, niijnít, sacerdotewã ã maáh pebhna ãt bejep wut jĩ.

2 Caanná juibínit, mawat pínah papélahdih caandíh ãt uúbáp wut jĩ. “Damasco tátchiboó judíowã ã míc wáacat munádih moón ã maátadih ñi daacá. Weém Jesúihwãdih bid junít, queétdih chéonit, nin Jerusalén tátchiboó wã jwúb ub jũóhmi caá. Pánihna, wã tewat pínah papélahdih weemdíh ñi wũhú”, Saulo ãt niijíp wut jĩ.

3 Páant ã niijíchah joinít, caán núodih ã wũhuchah, Damasco tátchina ãt bejep wut jĩ. Damasco tátchina ã tóah juibínachah, japmant iíg jéenaat caandíh ãt jígohop wut jĩ.

4 Páant ã iíg jéenanachah, Sauloboó ãt buug ñájap wut jĩ. Pánih buug ñájnit, Jesús ã wéhenachah, ãt joyóp wut jĩ. “¿Saulo, dépanihna meém weemdíh yeejép ma chãj?” ãt niijíp wut jĩ.

5 “¿Maá, meém déhe tigaá?” Saulo ãt niijíp wut jĩ. “Weém Jesús, yeejép ma chãjni caá. Weemdíh íjnit jepahcan, meemjéh tigaá ma míc yéejana caá.

6 Ma ñah ñũhú. Tátchidih waad béjnit, ma jumú. Ma chãjat pínahdih meemdíh naóhni pínah ã juibíbipna caá”, Jesús Saulodih ãt niijíp wut jĩ.

7 Páant ã wéheatdih joiná yuhna, Saulo ã pej jumnitboó cãacdih encan, ït joí wáhi bejep wut jĩ.

8 Saulo ñah ñahnit, ã jéih encan, ã pej jumnit ãih muj nahmant teonit, Damasco tútchina caandíh ït wái waad béjep wut jĩ.

9 Pánihna, Saulo biíc peihcanni yeó jáap jéih encan, jeémpcan, babhcan, Diosdih búdí úbhna át chãjap wut jĩ.

10 Damasco tútchidih bóo Jesúsdihi jéihni Ananías wut jumni oo júmat dée pah Jesúsdihi át enep wut jĩ. Páant ã enechah, Jesús caandíh át ejep wut jĩ: “¡Ananías!” át niijíp wut jĩ. “Júú, wã jumna caá”, át niij jepahap wut jĩ.

11 “Yoobópdih wut jumni namádih, Judáih muaná bejnit, Tarsodih bóo Saulo wut jumnidih ma bidíi. Caán Diosdih úbhna caá ã chãjap.

12 Caanbút oo júmat dée jíghatdih enna caá ã chãjap. Á jwúb enat pínah niijná, meém jubínit, caandíh teo jáhanit, úbát panihatdih ã enep be”, Jesús Ananíasdihi át niijíp wut jĩ.

13 “Maá, caán míhwã túinit, Jerusalén tútchidih moondíh yeejép át chãjap wut be. Dawá cãacwã weemdíh páant ï niij naáwáp be.

14 Nin Damasco tútchiboó caán nihat míhwãdih teo nemat túut niijná, sacerdotewã ï maátadihi papélahdih daacát túutnit, caán núo ã wēpatjĩh át jūwáp wut be”, Jesúsdihi Ananías át niij jepahap wut jĩ.

15 “Caán Sauloboó wã ñioni jumna, judíowã nihcannitdih, ï maátadihi, judíowãdihbut wã naáwátadihi ã naóhbiipna caá. Pánihna, ã pebhna úmcanjeh ma bejeé.

16 **Túttimah, wíih ã jumat jíib, dawá láa yeejép ã yapat pínahdih caandíh wã jéihyabipna caá**”, Jesús Ananíasdih ãt niijíp wut jĩ.

17 Páant ã niijíchah joinít, Ananías Saulo pebhna juibí, caandíh teo jáha úabhnit,

—Wã dée Saulo, jwĩ Maáh Jesús namáboó meemdíh jíghni weemdíh ã wahap be, ma jwúb enat pínah, Túini Espíritu ã wēpat meemdíh ã jumat pínahbut niijná, ãt niijíp wut jĩ.

18 Páant ã niijíchahjeh, áih quíib dahdih queéj cháa pah jíghni ã búg jéenechah, Saulo ãt jwúb enep wut jĩ, páant muntih. Pánihna, ñah ñah bac bejnit, ãt daabáát tútup wut jĩ.

19 Páant caandíh ĩ daabáát túttimah, jwúb bid jeémpna, ã nuugúp wunatji ãt boonap wut jĩ. Pánihna, Saulo Damasco tútchidih Jesúihwãjééh maátcanjeh ãt jumap wut jĩ.

Saulo Damasco tútchiboó ã naáwát

20 Saulo ã túut numát túttimahbitjeh, judíowã ĩ míic wáacat munáboó Jesúih túini doonádih ãt naáwáp wut jĩ.

—Caán Jesús Dios wúh caá, Saulo ãpĩ niijíp wut jĩ.

21 Páant ã niij naáwáchah joinít, nihát ĩt joí wáhi bejep wut jĩ.

—¿Nin Jesúihwãdih ñun yóhni niican niít? ¿Ninjĩhbut júhñit, queédih teonit, sacerdotewã ĩ maátadih wáhiñi niican niít? ĩt míic niijíp wut jĩ.

22 Obohjeéhtih, Saulo úumcanjeh, chah ãt bohénap wut jĩ. Pánih bohénit, “Yoobópdihi tigaá Jesús Dios ã wahní Cristo caá”, ã niijíchah joinít,

bita Damasco tútchidih moón judíowãboó ït beh joicáp wut jĩ.

Saulo judíowãdih ã jweyát

²³ Maátcanjeh ã jumat túttimah, judíowã caandíh mawíhna, queétjeh ït míc wéhenap wut jĩ.

²⁴ Pánih míc wéhenit, caán tútchidih bóo jěcnadih yeó jáap jumat pah, chei jumat pahbut ït páñap wut yuh jĩ. Obohjeéhtih, Sauloboó ï mawíhat doonádih át joyóp wut jĩ.

²⁵ Caán doonádih joinít, Saulo ã chéenwã caandíh búdí wuhdih yacnit, chei caán tútchi wáihyat júdu tãahmant ït cádah deya bojop wut jĩ. Páant ï chãjat túttimah, Jerusalén tútchiboó át bejep wut jĩ.*

Saulo Jerusalén tútchiboó ã jumat

²⁶ Jerusalén tútchidih juibínit, Jesúhwã biícđih Saulo átih jumíhip wut yuh jĩ. Obohjeéhtih, “Jesúsdih jepahni nihcan caá”, níj jenah joinít, caandíh ït úmup wut jĩ.

²⁷ Páant ï úmuhchah yuhna, Bernabéboó Jesús ã naáwát túutnit pebhna caandíh át numah bejep wut jĩ. Pánihna, Saulo ded pah ã yapatjidih Bernabé queétdih át naáwáp wut jĩ: “Nin Saulo Damasco tútchiboó bejnit, Jesúsdih át enep wut jĩ. ã enechah, Jesúsboó caandíh át wéhenap wut jĩ. Túttimah, Damasco tútchidih moondíh úmcanjeh, Jesúh doonádih át naáwáp wut jĩ”, Bernabé át niijíp wut jĩ.

²⁸ Páant ã niiját túttimah, Saulo ïjeéh waadnít, Jerusalén tútchidih moondíh úmcanjeh, Jesúh doonádih át wěp naáwáp wut jĩ.

* 9:25 2Co 11.32-33

29 Pánih naóhñit, biquína Grecia baácmant jüóhñit judíowãjeéh míc wéhenit, queétdih yehna át naáwáp wut jĩ. Páant Saulo chah ã wēp naáwát peéh caandíh ít mawíhip wut yuh jĩ.

30 Páant ĩ mawíhat doonádih joinít, Saulojeéh jumñit Jesúíhwãboó caandíh Cesarea tátchina ít ub jwei déi bejep wut jĩ. Caanjĩh n̄mah jum jwãhñit, Tarso tátchina caandíh ít wah bojop wut jĩ.

31 Caán láa nihat Judea baác, Galilea baác, Samaria baácboó Jesúíhwã ít tái jum̄p wut jĩ. Dedé tac b̄ugáát wihcah, ít tái míc bohénap wut jĩ. Queét Diosdih úmñit, ĩ yéejatdih cádahachah, Túini Espíritu queétdih búdí át teo wáacap wut jĩ. Pánihna, Jesúsdih jepahñit chah ít dao béjep wut jĩ.

Pedro Eneasdi h ã booaat

32 Saulodih ĩ wahat túttimah, Pedro nihat tátchinaboó Jesúíhwãdih táoh en jib bejna, Lida tátchidih át j̄ibínap wut jĩ.

33 Caanná j̄ibínit, Eneas wūt jumñidih át enep wut jĩ. Ocho jópchi jãt̄ih Eneas tabúp ch̄úhñiji át jéih w̄líc̄ap wut jĩ.

34 —Eneas, Jesucristo meemdíh ã booana caá. Ma ñah ñ̄h̄ú. Ma lajatdih ma ub ámo hóó, Pedro át niijíp wut jĩ.

Páant ã niijíchahjeh, Eneas át ñah ñ̄h̄ap wut jĩ.

35 Pánihna, nihat Lida tátchidih moón, Sarón tátchidih moonbút caán doonádih joinít, ĩ yéej ch̄ãjatdih cádahñit, Jesúsdih ít jepahap wut jĩ.

Tabita mi boo p̄ud j̄úwát

36 Jope wūt jumñi tátchidih Tabita wūt jumñih Jesúsdih tái jéihñih mit jum̄p wut jĩ. Mi wūt Tabita

griego wéheatjĩh Dorcas ït niijíp wut jĩ. Caánt táí chãjnih, moh yéejnitdih mipĩ táí teo wáacap wut jĩ.

37 Pánihna, caán láa wunat ñah jũúwúchah, mit wunah bejep wut jĩ. Páant mi wunat túttimah, queét miíh bácahjidih táí choc péanit, chah bóo tólihboó ït jwejep wut jĩ.

38 Lida tútchi Jope tútchi táí pebh bũũgíéh át jumap wut jĩ. Pánihna, Jope tútchidih moón Jesúíhwã, Pedro Lida tútchiboó ã jummat doonádi h jãtíh ïtát joyóp wut jĩ. Pánih joinítji chénewãdih Pedro pebhna ït wah bojop wut jĩ. ã pebhna jũibínit, “Tabita mi wunah bejep be. Waícanjeh jwĩ jumapboó jwĩjeéh ma jũúwú”, Pedrodi h ït niijíp wut jĩ.

39 Páant ï niijíchah joinít, Pedro ïjeéh át bejep wut jĩ. Caánboó ï jũibínachah, caán mũudíh jumnitboó Pedrodi h chah bóo tólihna ït namah pũuh laab béjep wut jĩ. Tabita ïjeéh jum jwuhna, moh yéejnitdih wũhat túut niijná, dawá yéguehdih mit chãjap wut jĩ. Pánihna, éemp wunnit yaádh Pedrodi h ñuh pũuda bojnit, mi chãjni h yéguehnadi h ït júut juñúp wut jĩ.

40 Obohjeéhtih, Pedro caán tólihboó jumnitdih át bac bejat túutap wut jĩ. ï bac beedáát túttimah, bódi cha caj yoh ñajnit, Diosdi h át uúbáp wut jĩ. Pánih uúbh péanit, miíh bácahjidi h tac pũud ennit,
—Tabita, ma ñah ñahũú, át niijíp wut jĩ.

Páant ã niijíchahjeh, caántboó Pedrodi h wãt ennit, mit pud chúudap wut jĩ.

41 Páant mi pud chúudachah, Pedro miíh téihyadi h teonit, caántdih át wái ñahanap wut jĩ. Pánihna, caanjĩh moón Jesúíhwãdih, éemp wunnit

yaáhdihbut bid bojnit, “Eneé mi jwáub boonap be”, queétdih át niijíp wut jĩ.

⁴² Páant mi booot doonádih nihat Jope tátchidih moón ít joyóp wut jĩ. Pánih joinít, dawá Jesúsdih ít jepahap wut jĩ.

⁴³ Pánihna, nuñúpwã chóo teoni, Simón wut jumnijeéh Jope tátchiboó maatápdih Pedro át jumap wut jĩ.

10

Pedro Corneliowãdih Jesúh doonádih naáwádih ã bejat

¹ Caán láa Cesarea tátchiboó cien soldadowã í maáh Cornelio wut jumni át jumap wut jĩ. Queét soldadowã Italiano wut jumni poóm wut jĩ.

² Cornelio áih muúdíh moón biícđih Diosdih túi jenah joí wēninit, caandíh úmna, yéejat cádahnit, ít túi chājap wut jĩ. Jĩgah náah jumnit judíowãdih búdí át teo wáacap wut jĩ. Jesucristodih jéih jwahcan yuhna, yeó jáap jumap pah Diosdih át úbúp wut jĩ.

³ Biíc yeó jáap cheyeh las tres jumuchah, Cornelio ã úbúchah, oo júmat pah, Dioh ángel ã pebhna ã waád jubínachah, át enep wut jĩ. Páant ã enechah, “Cornelio”, át niijíp wut jĩ.

⁴ Cornelio caandíh en behnit, úmna, “¿Maá, dedéđih caá ma náah?” át niijíp wut jĩ. Páant ã niijíchah joinít, ángel nin pah caandíh át niij jepahap wut jĩ: “Diosdih ma úbúchah, át joyóp wut be. Jĩgah náah jumnitdih ma wuhachahbut, át enep wut be. Pánihna, buu ma úbátđih ã jepahbipna caá.

⁵ Jope tátchiboó Simón Pedro wut jumnidih ub jūwát náahna, míh cáacwãdih ma wah bojoó. Caán túini doonádih yebdíh ã naóhbipna caá.

6 Biíh Simón nuñápwã chóa teonijeéh búdí māj jwějdih jumni muúdíh ã jumna caá”, ángel Corneliodih át niijír wut jĩ.

7 Páant niij péanit, át bac bejep wut jĩ. ã bac bejat túttimah, Cornelio chénewã caandih teo wãhntdih, biíc ãjeéh jumni soldadodihbut át bid bojop wut jĩ. Caán soldadoboó Diosdih táí wěini jumna, yeó jáap jummat pah Corneliodih wapni wut jĩ.

8 Pánihna, Cornelio ángel ã niijátjidih queédih naóh beedánit, Jope tútchiboó át wah bojop wut jĩ.

9 Biíh yeó jáapdih Jope tútchiboó ĩ tóah jaiibínachah pohba, yeó jáap tac yoób Pedro ã jumni muú chahmant bóo coahna Diosdih uúbúdíh át páuh laab béjep wut jĩ.

10 Páant ã uúbúchah, caandih nuugúp tubuchah, át jeémíhip wut jĩ. Obohjeéhtih, ĩ jeémát chājat pónih, oo jummat jíghat déedih át enep wut jĩ.

11 Jeáboó ã jéweah bejechah, chénaboó bóod chéoni chóa, búdí chóa át dei jūúwúp wut jĩ.

12 Caán chóa díitna dawá nuñápwã judíowã ĩ jeémpca naáhwã míic ĩt jumap wut jĩ. Maiwābut jum, jwébehwābut ĩt jumap wut jĩ.

13 Caandih ã enechah, Dios nin pah át niijír wut jĩ: “Pedro, ñah ñahnit, nitdih ma mao jeémé”, át niijír wut jĩ.

14 Páant ã niijíchah joinít, “Nihcan caá, Maá. Weém wã jeémpcan níit. Jwĩ nuowādih ma jeémát túutca naáh yeejépwādih wāpĩ jeémpcan beé”, Pedro át niij jepahap wut jĩ.

15 “ ‘Buu túinit caá’, wã niijnítidih ‘Yeejépwã caá’, ma niijcá bojóó”, Dios Pedrodih át niijír wut jĩ.

16 Páant biíc peihcanni láa ã yapachah, caán chóo ãt púuh laab béjep wut jĩ, buca.

17 Pánihna, Pedro tubit náhni dahwanit, “¿Dépanihatdih niijíh tigaá pánih jíghnidih ã júut?” caanjéh ãt niij jenah joyóp wut jĩ. Páant ã niij jenah joyóchah, Cornelio ã wah bojnitboó, Pedro ã jumni munná ít juibínap wut jĩ: “¿Simón nuñápwa chóo teonih maa dedboo tigaá ã jum?” cáacwādih ít niij uubh joyóp wut jĩ. Caán mūdih ĩ jéihya naáwáchah, ã jumni munná ít juibínap wut jĩ.

18 Pánih juibínit, nin pah ít niij ej uubh joyóp wut jĩ: “¿Simón Pedro wut jumni nin mūdih níit ã jumap?” ít niijíp wut jĩ.

19 Páant ĩ ezechahjeh, Pedro caandih jíghnijidih ã jenah joyóchah, Túini Espíritu caandih nin pah ãt niijíp wut jĩ: “Pedro, jêcboó biíc peihcannit meemdih bidna caá ĩ chājap.

20 Ñah ñuh, dei bejnit, ĩjeéh ma bejeé. Biíh pah bóodih náhni dahwacanjeh ma túi bejeé. Weémboó queétdih wã jūúwát túutap be”, ãt niijíp wut jĩ.

21 Páant ã niijíchah joinít, Pedro ĩ pebhna ãt dei bejep wut jĩ. Dei juibínit, queétdih nin pah ãt niijíp wut jĩ:

—Ninjíh tigaá wã jumap, ñi bid jūóhni. ¿Dépanihna weemdih ñi bid jūóh? ãt niijíp wut jĩ.

22 Páant ã niijíchah joinít, queétboó nin pah ít niij jepahap wut jĩ:

—Cornelio cien soldadowādih wutni jwiítdih ã wahap be. Caán túi chājni, Diosdih umnit yéej chājcani, nihat judíowã caandih ‘Túini’, ĩ niijní caá. Meemdih Dioíh ángel caandih ãt bidat túutap

wut be, túini doonádih jwiútdih ma naáwát pínah niijná, Pedro dih ñt niijíp wut jĩ.

23 Páant ñ niijíchah joinít, Pedro queétdih waadát túut, jeémát wũhñit, ã jumni muúboó ãt ño jwuhat túutap wut jĩ. Cheibit Pedro ñjeéh ãt bejep wut jĩ. Páant ã bejehah, bita Jope tútchidih moón Jesúihwábut caandih ñt pej jum bejep wut jĩ.

24 Ñ bejni daanimant bóo yeó jáapdih queét Cesarea tútchina ñt juibínap wut jĩ. Cornelioboó ã déewádih, ã chéenwádihbut bid wáacnit, Pedrowádih ãt páñap wut jĩ.

25 Pánihna, Pedro Cornelioih muudih ã téih waadáchah, Cornelioboó jwááh bac juóhñit, ãih jítcha pebh bódicta ãt caj yoh ñajap wut jĩ.

26 Obohjeéhtih, Pedro caandih wái ñahanit,
—Ma ñah ñuhú. Weembát meem pánih cáacjeh mun tigaá. Weém maáh nihcan caá, caandih ãt niijíp wut jĩ.

27 Páant ã niijíchah joinít, ñah ñuhñit, míc wéhenit, Cornelio caandih ãt numah waad béjep wut jĩ. Caanná waád juibínit, dawá míc wáac páinitdih Pedro ãt enep wut jĩ.

28 Pánih ennit, Pedro queétdih nin pah ãt niijíp wut jĩ:

—Jon játih Dios jwĩ nuowádih nin pah ãt niij wutap wut jĩ: ‘Judíowā nihcannit biúcdih ñi jumca bojó’, ãt niijíp wut jĩ. Pánihna, caán wutajjidih ñijeéh jumñit, wā yap yohatdih ñi túi jéihna caá. Obohjeéhtih, judíowā nihcannitdih ‘Yeejépwā caá’, Dios weemdih ã niiját túutcan beé.

29 Páant ã niijíchah joiná, yeéb weemdih ñi bidichah, ‘Wā bejcan niít’, niijcánjeh, ñi pebhna wā

jǔúwáp be. ¿Dépanihat túut tibeé ninjǐh weemdíh ñi jǔúwát túut? át niijíp wut jǐ.

30 Páant ā niijíchah joinít, Cornelioboó nin pah át niij jepahap wut jǐ:

—Jwínah bóodih, yeó tres jumuchah, nin horadih pohba, Diosdih wā úúbúchah, áih ángel túi baabní yeh iigní yégueh duoní, wā pebh ā jígohop be.

31 Pánih jígohnit, ‘Cornelio, meém Diosdih ma úúbúchah, meemdíh át joyóp wut be. Jígh náah jumnitdih ma teo wáacachahbut enna, Dios meemdíh jwuh ā jwúub teo wáacipna caá.

32 Pánihna, Jope tútchiboó míh cáacwādih ma wah bojoó, Simón Pedro wut jumnidih ninna queét ĩ ub jǔúwát pínah niijná. Caán biíh Simón, nuñápwā chóo teoni pebh, búdí muj jwéejdih jumni mǔudíh ā jumna caá’, caán ángel weemdíh ā niijíp be.

33 Páant ā niijíchah joinít, meemdíh ĩ ub jǔúwát pínah niijná, wǐh cáacwādih wā wah bojop be. Meém túi chǎjni jwǐ pebhna mat jǔúwáp tagaá. Pánihna, jwiít nihat ninjǐh Diosjeéh jumna, ded pah jwiítidih ā naáwát túutatdih joíhna, jwǐ páina caá, Cornelio Pedrodih át niijíp wut jǐ.

Pedro Corneliowādih Jesúih doonádih ā naáwát

34 Páant ā niijíchah joinít, Pedro nin pah queétdih át niij naáwáp wut jǐ:

—Buu jwuh yoobópdih wā jéihna caá. Nihat cáacwādih Dios biíc yoobó áihwā pínah ā náahna caá.*

35 Nihat baácdih moón Diosdih úumnit, yéejatdih cádahna, ĩ túi chǎjachah, Dios queétdih ā wěina caá.

* 10:34 Dt 10.17

36 Căacwã Diosjeéh ï túi jummat pínahdih Jesu-cristodih át wah deyanap wut jĩ. Caán túini doonádih jwiít judíowãdihjeh át jwĩh jéihyanap wut jĩ. Páant ã wahni caá nihat cãacwã ï maáh.

37 Jesús ded pah ã chãjatji doonádih ñitát joi tágaá. ‘Ñi yéejatdih ñi cádaahaá. Pánih cádahnit, ñi daabáát túutú’, Juan Daabáni cãacwãdih ãpĩ niúj naóh bohénap jĩ. Páant ã bohéat túttimah, Jesúsboó Galilea baácđih, nihat Judea baácđihbüt ded pah ã chãjatji doonádihbüt ñit joi tágaá.

38 Caán Jesús Nazaret tútchidih bóodih Túini Espíritu ã wēpatdih Dios búdí át wãhup tajĩ. Pánihna, jib bejnit, caán Túini Espíritu ã wēpatjĩh Jesús cãacwãdih ã túi teo wáacap jĩ. Pánih teo wáacna, nemép caolih jumnitdih ã túi boonap jĩ. Dios ãjeéh ã jumuchah, páant ã chãjap jĩ.

39 Jwĩh baácboó Jerusalén tútchiboobút nihat ã chãjatjidih jwiít jwĩ enep jĩ. Túttimah, jwĩ maáta judíowã caandíh cruzboó ï péoh dodh mao yohat túutup jĩ.

40 Obohjeéhtih biíc peihcanni yeó jáap túttimah, caandíh boonit, Jesúsđih Dios át jígochat túutup tajĩ.

41 Páant ã jígohochah yuhna, nihat cãacwã caandíh ï encap jĩ. Jwiít Dios ã ñíonitdihjeh ã jígohop jĩ. Jesús ã boo pud júúwát túttimah, ãjeéh jeémpnit, jwĩ babhbap jĩ.

42 Pánih jwĩjeéh jumna, jwiítđih nin pah ã niúj wutup jĩ: ‘Nihat cãacwãdih nin pah ñi niúj naáwá: “Jesúsđih jepahcannit báadhnit, wãnnitdihbüt ï yéejat peéh chãjat túutni maáh Dios caandíh át waadánap wut jĩ”, ñi niijí’, ã niijíp jĩ.

43 Pánihna, nihat Jesúsđih ï jepahachah, Dios ï

yéejatdih ã yohbipna caá. Nihat Dios naáwátidih jon játih naóh yapanit caán Jesúsdih niij naóhna ït chãjap wat jĩ, Pedro Corneliowãdih át niijíp wat jĩ.

Judíowã nihcannitdih Túini Espíritu ã jwíih jummat

⁴⁴ Pedro páant ã niij naáwáchahjeh, nihat caandíh joinítidih Túini Espíritu át waadáp wat jĩ.

⁴⁵⁻⁴⁶ Corneliowã judíowã nihcannit yuhna, mácah wéheatjĩh Diosdih ït wēi naáwáp wat jĩ. Páant ï wēi naáwáchah, Pedrodih pej jum bejnit judíowã ït joyóp wat jĩ. Túini Espíritu judíowã nihcannitdih ã waadáchah enna, queét judíowãboó ït en wúhi bejep wat jĩ. Pánihna, Pedro caandíh pej jum bejnitdih nin pah át niijíp wat jĩ:

⁴⁷ —Jwiítidih waadát pah mun tigaá nitdihbut Túini Espíritu ã waadáp. ¿Páant ã chãjachah, queétdih jwĩ daabánachah, ã túimi naniít? át niijíp wat jĩ.

⁴⁸ Páant niij péanit, Jesús ã wutuchah joiníji ã wēpatjĩh queét judíowã nihcannitdih Pedro át daabáát túutap wat jĩ. Páant ï daabáát túttimah, “Jwĩjeéh ma chão jwúhú”, Pedrodih ït niijíp wat jĩ. Páant ï niijíchah joinít, ïjeéh át chão jwúhup wat jĩ.

11

Pedro ã chãjat doonádih Jerusalén tútchidih moón Jesúhwã ï joyát

¹ Judíowã nihcannitbut Jesúsdih ï jepahat dooná át bej peét bejep wat jĩ. Jesús ã naáwát túutnitboó, bita Jesúhwãbut Judea baácboó jumnit, caán doonádih ït joyóp wat jĩ.

2 Pánihna, Pedro Jerusalén tútchina ã jwúub jwibínachah, biquína Jesúsdi jephahnit judíowã, caandíh nin pah ít níj jãihñap wut yuh jĩ:

3 —¿Dépanihna, meém judíowã nihcannit pehb-
boó ma bej? Queét yeejépwãjeéh jeémpnit, Dios jwĩ
nɔowãdih ã wutatjidih mat yap yohop taga, ít niijíp
wut jĩ.

4 Páant, ã niijíchah joinít, Pedro nihat ã yapatjidih
nin pah queétdih át níj naáwáp wut jĩ:

5 —Weém Jope tútchiboó jumnit, úbhna, oo júmat
jígohat déedih wã enep jĩ. Páant wã enechah,
chénaboó bóod chéoni búdí chóo jeámant wã pebh
ã dei juyúp jĩ.

6 Páant ã dei juyúchah, túi ennit, caán chóo diítna
maiwã, jwébehwã nihat nũñúpwãbut ã ñuhuchah,
wã enep jĩ.

7 Caandíh wã enechah, wéheatbut yáanit, nin pah ãi
niijíp jĩ: ‘Pedro, ñah ñuhnit, nitdih ma mao jeémé’,
weemdíh ã niijíp jĩ.

8 ‘Nihcan caá, Maá. Wã jeémpan níit. Yeejépwã,
meém jwĩ nɔowãdih ma jeémát túutcannitdih wãpĩ
jeémpan beé’, wã níj jepahap jĩ.

9 Obohjeéhtih, páant wã níj jepahachah, ‘Buu
“Túinit caá”, wã niijnítidih “Yeejépwã caá”, meém
ma niijcá bojoó’, weemdíh ã niijíp jĩ.

10 Biíc peihcanni láa páant ã yapachah, caán chóo ã
jwúub púuh laab béjep jĩ.

11 Páant ã púuh laab béjechahjeh, biíc peihcannit
neoná jwĩ jumni mɔudíh ít juyúp tajĩ. Cesarea
tútchidih bóo weemdíh ubat túutna, queétdih át
wahap tajĩ.

12 Pánihna, Túini Espíritu weemdíh nin pah ã niijíp

jĩ: ‘Íjeéh ma bejeé. Ñi n̄owādh wā w̄tatjidih náhni dahwacanjeh ma túi bejeé’, ã niijíp jĩ. Páant ã niijíchah joinít, úmcanjeh wā bejep jĩ. Nit seis Jope t̄tchidih moón Jesúihwābut weemdíh ĩ pej jam bejep jĩ. Caanná j̄ibínit, Cesarea t̄tchidih bóoíh m̄udíh jwĩ waad béjep jĩ.

¹³ Páant jwĩ waád j̄ibínachah, ded pah caandíh ã yapatjidih nin pah jwiít dih ã niij naáwáp jĩ: ‘Dioíh ángel nin m̄úboó weemdíh j̄gohnit, weemdíh nin pah ã niijíp jĩ: “Jope t̄tchidih míh c̄acwādh wahnit, Simón Pedrodih ma ub j̄úwát tútá.

¹⁴ Caán j̄inít, yeebdíh túini doonádih ã naóhbipna caá. Caán doonádih ñi jepahachah, meém ma pebh moón bícdih ñi yéejat peéh ch̄ajat déedih Jesús ã túi ubbipna caá”, ã niijíp jĩ’, Cornelio jwiít dih ã niijíp be.

¹⁵ Pánihna, Jesúih túini dooná queétdih wā jáap naóh jwíhichahjeh, jwiít dih ã waadátji pah mantih, Túini Espíritu queétdihbut ã waadáp jĩ.

¹⁶ Caandíh ennit, Jesús jwiít dih ã niijátjidih wā náhninap jĩ: **Juan mahj̄hjah ã daabánap be. Obohjeéhtih, Túini Espíritu yeebdíh ã waadáchah, yeebdíh ã wēpat bádí ã w̄hbipna caá’, ã niijíp jĩ.***

¹⁷ Páant ã niijátjidih náhninit, Dios queétdih Túini Espíritu ã w̄hatdih ennit, ‘Weém Diosdih wā yap yohcan niít’, niijnít, queétdih wā daabáát tútap jĩ, Pedro Jesús dih jepahnit judíowādh át niijíp w̄t jĩ.

¹⁸ Páant Pedro ã niijíchah joinít, jw̄ub j̄ihcanjeh, Diosdih wēinit, nin pah ĩt míc niijíp w̄t jĩ.

—Joi yáh buca! Judíowā nihcannit yuhna, yéejat peéh iiguípna ĩ bejat déejidih Dios át túi ubap taga.

* **11:16** Hch 1.5

Pánihna, ï yéejatdih cádahnit, ï túut n̄umúchah, queétdihbut áihwã át chãjap taga, ãjeéh páantjeh ï jumat pínah niijná, ït míc niijíp wut jĩ.

Antioquía tátchidih moon jwáh Jesúh doonádih ï jepahat

¹⁹ Estebandih ï mao láa, bita Jesúsdihi jéihnitdihbut judíowã ït mao ñ̄unáp wut jĩ. Pánihna, queét ï mawatdih jweinít, yuháp ït bej peét bejep wut jĩ. Biquína Fenicia baácboó bej, bita Chipre quewaboó bej, bitabut Antioquía tátchiboó ït bejep wut jĩ. Pánih bejnit, Jesúh túini doonádih ït naóh peét bejep wut jĩ. Pánih naóh bejna yuhna, judíowãdihjeh ït naáwáp wut jĩ. Judíowã nihcannitboodih ït naóh jwuhcap wut jĩ.*

²⁰ Obohjeéhtih, biquína Jesúhwã Chipre quewadih moón, Cirene tátchidih moonbút, Antioquía tátchina juibínit, judíowã nihcannitdihbut jwĩ Maáh Jesúh doonádih ït naáwáp wut jĩ.

²¹ Pánihna, Dios búdí ã teo wáacachah, dawá queétdih joinít, túut n̄umná, Jesúsdihi ït jepahap wut jĩ.

²² Antioquía tátchidih moón ï jepahat dooná ã bej peét bejchah, Jerusalén tátchidih jumnit Jesúhwã caán doonádih ït joyóp wut jĩ. Pánih joinít, queétdih ã bohé teo wáacat pínah niijná, Bernabédih Antioquía tátchina ït wah bojop wut jĩ.

²³ Caanná juibínit, queétdih Dios ã túi teo wáacatdih ennit, Bernabé búdí ãt weñep wut jĩ. Pánih wēinit, queétdih bohénit, nin pah ãpĩ niij naáwáp wut jĩ: “Jesúsdihi ñi túi péenaá. Ded pah ã yapachah yuhna, caandih ñi túi jenah joí cádahca

* 11:19 Hch 8.1-4

bojoó”, queét Jesúsdiĥ jáap jepahnitdiĥ át niijíp wut ĵĩ.

²⁴ Bernabé túi chāĵni, Túini Espírĭtu ā wēpat búdí ĵamni, Jesúsdiĥ túi jenah joiní át ĵamup wut ĵĩ. Pániĥni ĵamna, queét judíowā nihcannitdiĥ yuhna, búdí ā teo wáacachah, Jesúsdiĥ jepahnit chah ĭt dao béjep wut ĵĩ.

²⁵ Túttimah, Bernabé Saulodiĥ ā pej pínah Tarso tútchina bididiĥ át bejep wut ĵĩ.

²⁶ Caandíĥ ĵwāáĥnit, Antioquía tútchina át numah ĵwúb bejep wut ĵĩ. Pániĥna, caánboó ĵwúb ĵuibínit, Jesúsdiĥ jáap jepahnitdiĥ bíicdiĥ ĭt bohénap wut ĵĩ. Jesúíhwājeéĥ ĵamnit, bíic jópchi ĭt tái bohénap wut ĵĩ. Caán Antioquía tútchidiĥ wut ĵĩ Jesúíhwādiĥ “Cristodiĥ péenit”, niijná, “Cristianos”, ĭt ĵwíiĥ niij wūt búudĥup wut ĵĩ.

²⁷ Caán láa biquína Dios naáwátđiĥ naóĥ yapanit Jerusalén tútchimant Antioquía tútchina ĭt dei ĵuibínap wut ĵĩ.

²⁸ Bíic newé ĭjeéĥ ĵóĥni, Agabo wūt ĵamni, queét Jesúíhwā bíicdiĥ ĭ míic wáacachah, caánboó ñah ñahnit, Túini Espírĭtu ā niijátđiĥ át ĵwúb naóĥ yapanap wut ĵĩ. “Maátcanjeh, jeémát wiĥcat láa nihat baácboó ā ĵambipna caá”, át niijíp wut ĵĩ. Túttimah, Claudio Romano cāacwā ĭ maáh ā ĵamuchah, Agabo ā niijátĵi pahjeh jeémát wiĥcat láa át ĵamup wut ĵĩ.*

²⁹ Pániĥna, Agabo ā niijíchah joinít, “Ķwĩ déewā Judea baácđiĥ moón Jesúíhwādiĥ ĵwĩ teo wáac ĵĩiĥ?” ĭt míic niijíp wut ĵĩ. Pániĥ teo wáacnit, det dinero búdí bíboĥnit búdí ĭt wūĥup wut ĵĩ. Buáh buugní

* 11:28 Hch 21.10

bíbohñit buúh buugní ït wūhup wut jī. Bainí bíbohñit bainíjuh ït wūhup wut jī. Bitá bíbohñit ït wūhcap wut jī.

³⁰ ï wūh wáacni dinerodih Bernabéwādih wūhñit, Jerusalén tútchidih moón ï déewā Jesúíhwā maátadih ït wahap wut jī, bitadih ï pāáat pínah niijná. Pánihna, Bernabé Saulojīh ï wūhni dinerodih Jerusalén tútchina ït ub bejep wut jī.

12

Herodes Santiagodih mawat tútñit, Pedrodihtubt ā nemat tútat

¹ Caán láa Maáh Herodes Jesúíhwādih yeejép chājna, biquína queédih nemat muúboó āt nemat tútup wut jī.

² Juan weép jeñé Santiagodih* waó āt bóod yohat tútup wut jī.

³ Páant ā chājachah ennit, judíowā ï maáta búdí ït weñep wut jī. ï weñatdih ennit, Pedrodihtubt āt tewat tútup wut jī. Ā tewat tútuchah, paacánni pandih jeémát, Pascua ï niijní, láa wut jī.

⁴ Pánihna, caandíh tewat tútñit, āt nemat tútup wut jī. Chénena míic soldadowā jwíih wapñit pínah ït jumup wut jī. Túttimah, jwúub tút nuumnít pínahbut páant moon múntih ït jumup wut jī. Bitabut páant moon múntih ït jumup wut jī. Bitabut páant moon múntih ït jumup wut jī. Pánihna, Pedro ā jweicát pínah niijná, dieciseis soldadowā caandíh wapñit pínah ït jumup wut jī. “Pascua túttimah, ub bac jūóhñit, cāacwā ï enepdih

* 12:2 Mt 4.21

caandíhbat wã mawat túutbipna caá”, Herodes caanjéh át niíj jenah joyóp wut yuh jĩ.*

⁵ Páant niíj jenah joinít, soldadowã Pedrodih nemat muúboó át túi wapat túutur wut yuh jĩ. Páant caandíh ï nemechah, Jesúíhwã Pedrodih búdí úúbhna ït chãjap wut jĩ.

Dioíh ángel nemat muúmant Pedrodih ã úb bacaat

⁶ Herodes ã jenahni yeó jáap cheijeh Pedroboó túi ñona át chãjap wut jĩ. Chéne soldadowã chénaaboó ïtah tōp ã teo lajachah, Pedro biíc dih ñona ït chãjap wut jĩ. ï jumni tólih jēc pehbhat bita chéne soldadowã ït wap ñuhur wut jĩ.

⁷ Dioíh ángel queét pebh ã jígohochah, ã yeh iigát ï jumni tólihdih át túi yeh iiguíp wut jĩ. Páni h jígohni t, Pedroíh páwádih át wuúmp mao wucur wut jĩ. “¡Waícanjeh jáanit, ma ñah ñuhú!” ángel Pedrodih át niíjip wut jĩ. Páant ã niíj wucuchah jáanit, Pedro át ñah ñuhur wut jĩ. Páant ã ñah ñuhuchahjeh, ãih téihya colóhnadi h ï chéoni tōpna át waát jéne p wut jĩ.

⁸ “Míih yéguehdih míih zapatosdihbat ma duwú”, ángel át niíjip wut jĩ. Páant ã niíj át joinít, át duwup wut jĩ. Páni h duó péanachah, “Míih cúbuh jweyát chóodih pinnit, wãjeéh ma péé júúwá”, ángel caandíh át niíjip wut jĩ.

⁹ Páant ã niíjichah joinít, caán chóodih pinnit, ángeljeéh át péé bac bejep wut jĩ. “Oboh oo jámatjeh caá. Yapat yoobát pohba nihcan caá”, Pedro át niíj jenah joijéhe p wut yuh jĩ.

¹⁰ Nemat tólih jēc pebh wapniti dih yap bej, biíh jēc pebh wapniti dihbat yap bejni t, tútchina bac

* 12:4 Ex 12.1-27

bejat ïtah jëcdih ït jubínap wut jï. Caán ïtah jëcdih ï jubínachah, caanjéh át pãa bejep wut jï. Páant ã pãa bejechah ennit, ït bac bejep wut jï. Namádih bejnit, biih namána ángel Pedrodih át numah jubínap wut jï. Pánihna, caán namádih jubínit, ángel át buudáh bejep wut jï.

¹¹ Ángel ã buudáh bejechah, Pedroboó jáani pah, ã yapatdih yoobópdih át jenah joyóp wut jï. “Dios áih ángeldih wahnit, Herodes ã mawat déedih, judíowã ï maáta ï náahat pah ï chãjat déedihbut weemdih nemat mummánt át túi ub bacanap taga. Buh jwuhna wã jéihna caá”, Pedro át míic niijíp wut jï.

¹² Caán ã yapatdih túi jéihnit, Juan Marcos ín Maríaíh munná át bejep wut jï. Caán muudih dawá Jesúíhwã míic wáacnit, bádí uúbhna ït chãjap wut jï.

¹³ Pánihna, caán munná jubínit, muú wáihyat júdu jëcdih waádihna, át wúmp mawap wut jï. Páant ã wúmp mawachah joinít, teo wáhnih Rode wát jamnih mit jubí uúbh joyóp wut jï.

¹⁴ Pánihna, Pedro ã wéheatdih beh joinít, bádí wēina, wātcanjeh, naáwádih mit jwúub waad béjep wut jï.

—Pedro beé ái juyáp be. Jëc pebh ái ñuhup be, mit niijíp wut jï.

¹⁵ Obohjeéhtih páant mi niijíchah joinít,

—Yeena caá ma chãjap, ït niijíp wut jï.

Obohjeéhtih, caántboó biíc yoobó chah mit wēp naáwáp wut jï.

Queétboó caántdih joyáh bojnit,

—Oboh áih dadah nacaá, ït niijíp wut jï.

16 Pánihna, Pedroboó páantjeh át wuúmp mao behjehep wat jĩ. Páant ã wuúmp mao behjehechah joinít, jêcdih ít wãtap wat jĩ, bũca. Wãtnit, Pedrodih ennit, ít en wáhi bejep wat jĩ.

17 Obohjeéhtih, Pedro queédih tóo mao jwúubanit, át wéheat túutcap wat jĩ. Queédih ít wéheat yayánit, ded pah Dios caandíh nemat muumánt ã ub bacaatdih át naáwáp wat jĩ.

—Wã naáwátidih Jesús úud Santiagodih, bita Jesúihwãdihbut ñi naóh yapanaá, át niijíp wat jĩ.

Páant niij naóh péanit, bíaboó át bejep wat jĩ.

18 Túttimah, baáb jéenechah, soldadowã Pedro ã wihcatdih ennit, búdí ít wáhi bejep wat jĩ. “¿Ded pah tiguaá Pedro át bej?” ít míc niijíp wat jĩ.

19 Pánihna, Herodesboó caandíh bíd bojat túutuchah, áih soldadowã ít bíd juicáp wat jĩ. Pánih bíd juicán, caandíh wapnitji soldadowãdih tubit át úubh joí ñuunúp wat jĩ. Pánih úubh joí péanit, Pedrodih ít táí wapcatji peéh, queédih át mao yohat túutap wat jĩ. Pánihat túttimah, Herodes Judea baácmant Cesarea tútchina jumat túut niijná, át dei bejep wat jĩ.

Herodes ã wunat

20 Herodes Cesarea tútchidih ã jumuchah, Tiro tútchidih moondíh, Sidón tútchidih moondíhbut búdí át íjip wat jĩ. Caán tútchinadih moón Herodeíh baácdih moondíh jeémátidih ípĩ juibí jíib chãjap wat jĩ. Pánihna, jwúub jíib chãjat túut niijná, Herodes ã íjat yayát náahnit, Cesarea tútchina caandíh enedih ít juibínáp wat jĩ. Pánih juibínit, Herodes ã pebh bóo Blasto wüt jumnidih jwááhnit, queédih ã teo wáacat pínah niijná, ít jíib chãjap

wut jĩ. Herodesdih ĩ míc wéheat pínah yeó jáapdih Blastodih ĩt ʉúbát túʉʉp wut jĩ.

²¹ Pánihna, queétdih ã míc wéheat pínah yeó jáapdih, maáh jumna ã dʉwát chóodih dʉonít, ã chúʉdatdih jubí chúʉdnit, caandih enedih míc wáacnitdih búdí ãt naáwáp wut jĩ.

²² Páant ã naáwáchah joinít, nihat míc wáacnitboó “Cãaquih naáwát panihcan, Dios naáwát panihni caá”, ĩt niúj wēi ejep wut yʉh jĩ.

²³ Páant ĩ niúj ejechahjeh, cãacwã ĩ weñatdih náahnit, Diosboodih ã jwúb wēi naóhcatji júb, Dioih ángel Herodesdih wʉnat ãt wʉhʉp wut jĩ. Pánihna, coyíwã caandih ĩ jeéméchah, ãt wʉnah bejep wut jĩ.

²⁴ Pedrodih Dios ã ʉb bacaat túttimah, Jesúihwã jib bejnit, ãih táini doonádih ĩt naóh peetép wut jĩ. Caán doonádih jepahnit ĩt dao béjep wut jĩ.

²⁵ Bernabé Saulojĩh Judea baácdih moondih wáac wʉhniiji dinerodih wah péanit, Jerusalén tútchimant Antioquía tútchina ĩt jwúb bejep wut jĩ. Jwúb bejnit, Juan Marcosdihbut ĩjeéh ĩt ʉb bejep wut jĩ.

13

Bernabé Saulojĩh Táini Espíritu ã wahat

¹ Antioquía tútchidih moón Jesúihwãjeéh jumnit, biquína Dios naáwátđih naóh yapanit jum, biquína Jesúih doonádih bohénitbut ĩt jumʉp wut jĩ. Nin caá ĩ wʉtna: Bernabé, Simón Eini ĩ niijní, Lucio Cirene tútchidih bóo, Manaén Herodes Antipasjĩh biícdih behni, Saulo yʉh buca.

² Pánihna, biíc yeó jáap jeémp jwuhcanjeh, Diosdih wēina, ĩ uúbúchah, Túini Espírítu queétdih nin pah át niijír wut jĩ: “Bernabédih, Saulodihbat jãtíh wãát ñíwip jĩ, Jesúih túini doonádih ĩ naóh jibat pínah niijná. Páant wã ñíonit ĩ jumuchah, yeéboó queétdih ñi wahaá”, át niijír wut jĩ.

³ Pánihna, páantjeh jeémp jwuhcanjeh, teo jáha uúbhnit, Bernabéwãdih ĩt wahap wut jĩ.

Bernabéwã Chipre quewana ĩ bejat

⁴ Túini Espírítu queétdih ã wahachah, Seleucia tútchina dei bej, johlitjĩh bejni búdí jááj chóodih waadnít, Chipre quewaboó ĩt chúuh bejep wut jĩ.

⁵ Chipre quewaboó Salamina tútchidih juibí, judíowã ĩ miíc wáacat muná waadnít, caanjĩh moondíh Dios naáwátdih ĩt bohénap wut jĩ. Juan Marcosbat queétdih teo wáacat túut niijná, ĩjeéh át bejep wut jĩ.

⁶ Pánihna, Chipre quewaboó jumnitdih bohé púud dei bejna, Pafos wut jumni tútchina ĩt juibínap wut jĩ. Caán tútchidih biíc judío Barjesús wut jumni, “Weém Dios naáwátdih naóh yapani caá”, niijná yuhna, jióhni át jumap wut jĩ.

⁷ Caán jióhni Romano maáh Sergio Paulo wut jumnijeéh át jumap wut jĩ. Sergio Paulo, túi jenah joiní jumna, Dios naáwátdih joyát túut niijná, Bernabéwãdih át bid bojop wut jĩ.

⁸ Obohjeéhtih, caán jióhni, griego wéheatjĩh Eli-mas ĩ niijní, Sergio Paulo ã túut numcát pínah niijná, Bernabéwãdih átih naáwát túutcap wut yuh jĩ.

⁹ Pánihna, Sauloboó, Pablo biíh ã wūt jamni, Túini Espíritu ã wēpatjīh Elimasdi en behnit, nin pah ãt niíj jūihñup wut jī:

¹⁰ —Meém, nemépdih jepahni, nihat túiniboodih yap yohni, tubit yeeni caá. ¿Diosdih túi pééihnitdih ma jāh cádahcan niít?

¹¹ Būū meemdih Dios ã peéh chājachah, jéih encanni ma jam jwuhbipna caá. Pánihna, yeó ã chāhatdih ma jéih en jwuhcan niít, Pablo ãt niijíp wut jī.

Páant ã niijíchahjeh, Elimas ãt jéih encap wut jī. Pánih jéih encan, caandih teo wáini pínahdih ãt bid bejep wut jī.

¹² Páant ã yapachah ennit, ī naóhni doonádih joinít, Sergio Pauloboó joí wáhi bejna, Jesúsdi ãt jepahap wut jī.

Pablo Bernabéjīh Pisidia baác Antioquía tútchina ĩ bejat

¹³ Pafos jēlitdih Pablowā johlitjīh bejni jāáj chóodih jwúub waadnít, Panfilia baácdi bóo Perge tútchina ĩt chúuh juibínap wut jī. Caanná juibínit, Juan Marcos queétdih cádahnit, Jerusalén tútchina ãt éemp jwúub bejep wut jī.

¹⁴ Obohjeéhtih, Pablowāboó jwúub bejcanjeh, Pisidia baácdi bóo Antioquía tútchina ĩt aab béjep wut jī. Caanná aab juibínit, judíowā ĩ chooát yeó jáapdi, ĩ míc wáacat mūúboó ĩt waád juibí chúudup wut jī.

¹⁵ Páant ĩ waád juibí chúuduchah, caán mūúdh wáac jūinít maáta Moisés ã wutatjidih, Dios naáwát naóh yapanit ĩ daacátjidihbut queét míc wáacnitdih

ĩt en naáwáp wʉt jĩ. Caandih en naóh péanit, queét maáta Pablowãdih nin pah ĩt niijíp wʉt jĩ:

—Jwĩ déewãá, nit jumnitdih teo wáacat pínah doonádih ʉb jũóhna, bʉʉ ñi naáwá, ĩt niijíp wʉt jĩ.

¹⁶ Páant ĩ niijíchah joinít, Pabloboó ñah ñʉhñit, ĩ míc wéhenachah yayánit, nin pah át niij bohénap wʉt jĩ:

—Yeéb wã déewãá, judíowã nihcannit yʉhna Diosdih wéinitbut, wã naáwáchah, ñi túi joyoó.

¹⁷ Dios jwĩ nʉowãdih át ñíwip wʉt jĩ. Túttimah, Egipto baácboó ĩ jumuchah, ã teo wáacatjĩh ĩt cãac poonap wʉt jĩ. Pánihna, dawá ĩ cãac pooat túttimah, ã wēpatjĩh caán baácmant át ʉb bac jũúwáp wʉt jĩ.*

¹⁸ Túttimah, cuarenta jópchi pohba mʉú wih-capboó jumnit, dawá láa Diosdih ĩ yap yohochah yʉhna, queétdih át cádahcap wʉt jĩ.*

¹⁹ Canaán baácboó jumnitji siete poómpdih yoh péanit, jwĩ nʉowã ĩ jummat pínah niijná, Dios caán baácdih át wũhʉp wʉt jĩ.*

²⁰ Abrahamdih ã naáwát túttimah, cuatrocientos cincuenta jópchi yapat túttimah, jwĩ nʉowãjidih caán baácdih át wũhʉp wʉt jĩ. Pánihna, caánboó ĩ jum láa, caán baácdih jumnitdih ĩ yoh beedáát túut niijná, teo wáac waóhñit pínah maátadih Dios queétdih át ñío wũhʉp wʉt jĩ.

“Queét dée péeni maáh Samuel wũt jumni, Dios naáwát dih jwíih naóh yapani át jumʉp wʉt jĩ.*

²¹ Pánihna, Samuel jum láa, jwĩ nʉowãboó queétdih wʉt ni pínah maáhdih Diosdih ĩt yójah

* **13:17** Ex 1.7; 12.51 * **13:18** Nm 14.34; Dt 1.31 * **13:19** Dt 7.1;

Jos 14.1 * **13:20** Jue 2.16; 1S 3.20

uúbúp wut jĩ. Páant ĩ uúbát dih joinít, queéd dih ĩ jwíh maáh pínah Cis wũúh Saúljidih Dios át ñío wũhup wut jĩ. Saúl Benjamín jũimená poómp dih bóo át jumup wut jĩ. Pánihna, caán Saúl cuarenta jópchi maáh át jum jwuhup wut jĩ.*

22 Caán ã maáh jumatdih dúuc wáinit, Davidboodíh Dios át jwúub túut nuúm maáh waadánap wut jĩ. “Isaí wũúh Daviddih bid junít, wã wẽina caá. Caánboó wã weñat pínahdihjeh chãjna, weemdíh ã yap yohcan níit”, Dios át míic niijíp wut jĩ.*

23 Caán David jũima Jesús caá. Pánihna, judíowádih ĩ yéejat peéh chãjat déedih yohni pínah caán Jesús dih Dios át ñío jip taga.

24 Jesús ã bohéat pínah jãtíh, Juanboó nihat judíowádih nin pah át níj naóh bohénap wut jĩ: ‘Ñi yéej chãjatdih cádahnit, túut nuumát júutna, ñi daabáat túutú’, ãpĩ niijíp wut jĩ.*

25 Juan bohé péa jũóhna, nin pah cãacwádih át níj naáwáp wut jĩ: ‘¿Yeéb weemdíh ded pah ñi níj jenah jói? ¿“Caán Dios ã wahni Cristo caá”, ñi níj jenah jói níit? Caán ã wahni nihcan caá. Weém oboh jumni caá. Obohjeéhtih, wã túttimah jũóhni chah wẽpni ã jumbipna caá’, Juan át niijíp wut jĩ.*

26 “Wã déewã Abraham jũimená, yeéb judíowã nihcannit yahna Dios dih wẽinitbut, jwiít nihatdih yéejat peéh chãjat déedih yohni pínah doonádih jwĩ joyóp be. Caán doonádih yeebdíh naáwát túut caá wã chãjap.

* 13:21 1S 8.5; 10.21 * 13:22 1S 13.14; 16.12; Sal 89.20 * 13:24

Mr 1.4; Lc 3.3 * 13:25 Jn 1.20; Mt 3.11; Mr 1.7; Lc 3.16; Jn 1.27

27 Jerusalén tátchidih moón, ï maáta biícidih, chooát yeó jáap jummat pah, Dios naáwátdih naóh yapanit ï daacátjidih ï en naáwáchah joiná yuhna, queét ï beh joicáp jĩ. Pánih beh joicán, Jesucristo Dios ã wahni ã jummatdihbut ï jéihcap jĩ. Pánih jéihcan, Jesucristodih mawat túutnit, Dios naáwátdih naóh yapanit ï daacátji biíc yoobó ï chãjap jĩ.

28 Jesús ã yéej chãjcah yuhna, Pilatodih ï mao yohat túutup jĩ.*

29 Jon jãtĩh ï daacátji biíc yoobó ï chãj péanachah, cruzboó ï péoh dodhnijidih ub deyanit, jeé íitboó ãih bácahjidih bita ït yohop wat yuh jĩ.*

30 Obohjeéhtih, Dios caandíh ãt jwúub booanap wat jĩ.

31 Páant ã booaat túttimah, ãihwã Galileamant Jerusalén tátchina ãjeéh péenitjidih dawá yeó jáapna ãt jíghop wat jĩ. Pánihna, caandíh ennitji jumna, ded pah Jesús ã chãjatjidih buu bita jwĩ déewãdih naóhna caá ï chãjap.*

32-33 “Pánihna, caán túini doonádih jwiítbut yeebdíh naáwádih jwĩ jũúwáp be. Jesucristodih booanit, Dios jwĩ nœowãdih ã naáwátji jwiít ï juménádih biíc yoobó buu ã yapap be. Páant tigaá Davidji ã jwĩh daacátji numpboó Salmo nin pah ãt niój daacáp tajĩ: “Meém wã wũúh caá. Buu nihat cãacwã ï enechah, meemdíh maáh wã waadána caá”, Dios ã niijná caá’, David ãt niój daacáp tajĩ.*

34 Caán ã wunuchah yuhna, ãih bácah ã moópcat

* 13:28 Mt 27.22-23; Mr 15.13-14; Lc 23.21-23; Jn 19.15 * 13:29

Mt 27.57-61; Mr 15.42-47; Lc 23.50-56; Jn 19.38-42 * 13:31 Hch

1.3 * 13:32-33 Sal 2.7

pínah niijná, Dios caandíh ãt booanap tajĩ. Æ naáwátdih naóh yapani Isaías nin pah ãt niúj daacáp tajĩ: ‘ “Daviddih wã niijátji pah meemdíh biíc yoobó wã túi chãjbipna caá”, Cristodih Dios ã niijná beé’, ãt niúj daacáp tajĩ.*

³⁵ Biíh Salmoboó Davidji nin pah ãt jwúub niúj daacáp tajĩ: ‘ “Wíih túini, wã oiniíh bácahdih wã moopát tútcan niít”, Cristodih Dios ã niijná beé’, ãt niúj daacáp tajĩ.*

³⁶ Pánihna, nindih ñi náhninaá: Davidjiboó Dios ã wútatdih túi jepahnit, ãih cáacwãdih ã túi chãjat túttimah, ãt wunap wut jĩ. Æ wunuchah, ã howãdih ĩ yohopjiboó caandíhbut ĩt yohop wut jĩ. Páant ĩ yohat túttimah, ãih bácah ãt moópjip taga.

³⁷ Obohjeéhtih, Dios ã booaniboó ãih bácah ãt moópcap tajĩ.

³⁸ Páant ã moópcatdih jéihnit, nindih ñi túi jéihyee: Caán Dios ã booani Jesús ã wun wãhatjĩhjah ñi yéejatdih Dios ã yohna caá.

³⁹ Yeéb Moisés ã wútatjidih jepahíhnit, ñi yéejat yohatdih ñipĩ bidna yah caá. Obohjeéhtih, Jesucristodihjah jepahnit, ñi yéejat yohatdih ñi jéih bid juibípna caá.

⁴⁰ Pánihna, Dios naáwátdih naóh yapanit nin ĩ niijátji pah yapcat túut niijná, ñi túi chãja chaáh.

⁴¹ ‘ “Eneé, wã wēpatdih wã júutuchah, yeéb deoh naóhnitboó ñi en wáhi bejbipna caá. Wã wēp chãjat pínahdih ĩ naáwáchah yuhna, túi jenah joicánnit, ñi wunbipna caá”, Dios ã niijná caá’, ĩt niúj daacáp tajĩ”,

(Hab 1.5)

Pablo cáacwãdih ãt niijíp wut jĩ.

* 13:34 Is 55.3 * 13:35 Sal 16.10

42 Páant niij naóh péanit, Pablowã ït bac bejep wut jĩ. Ï bac bejehah, cãacwã queétdih nin pah ït niijíp wut jĩ: “Túttimah bóo chooát yeó jáapdih jwiít dih ma jwúub bohénaá”, ït niijíp wut jĩ.

43 Túttimah, maátaboó wáac jwínít dih ï bacanachah, dawá judíowã, dawá judíowã nihcannit yuhna Diosdih wëinitbut Pablowãdih ït ñuun bÁC bejep wut jĩ. Pánih ñuun bÁC bejnitdih Pablowã nin pah ït niijíp wut jĩ: “Dios yeebdíh táí oinit, Jesucristodih ã wahatji doonádih buu táí jepahnit, caandíh ñi cádahca bojoó”, ït niijíp wut jĩ.

44 Túttimah bóo chooát yeó jáapdih caán tútchidih moón nihat beéd jãóhnit pah Dios naáwát dih jóíhna, ït míic wáac jwibínap wut jĩ.

45 Obohjeéhtih, judíowã ï maáta dawá wáac jwibínitdih ennit, bádí ït líjip wut jĩ. Pánihna, Pablo ã bohénachah, queétboó caandíh jãihna, yehna ït niijíp wut jĩ.

46 Obohjeéhtih, Pablo Bernabéjĩh úumcanjeh, nin pah ït niij wëp naáwáp wut jĩ:

—Jwiít judíowãdihjeh Dios naáwát dih ã jwíih naáwát túutap be. Obohjeéhtih, caandíh náahcan, Diosjeéh páantjeh ñi jumíhcat jíib, jwiítboó judíowã nihcannitdih naáwát dih jwĩ bejbipna caá.

47 Dios naáwát dih naóh yapani Isaías ã daacátji pah jwiít dihbut páant niij watna át chãjip taga:

‘ “Judíowã nihcannitdih wã táí ubat pínahdih ï beh joyát pínah niijná, meemdíh ï pebhna wã wahbipna caá. Pánihna, nihat baác dih moondíh ï yéejat peéh chãjat déedih wã yohat pínahdih ñi naáwá”, Dios ã niijná caá, át niij daacáp tajĩ, *(Is 42.6; 49.6)*

Pablowã ït niij naáwáp wut jĩ.

⁴⁸ Páant ï niijchah joinít, judíowã nihcannit búdí ït weñep wut jĩ. “Dios naáwát túina caá”, ït niijíp wut jĩ. Pánihna, nihat Diosjeéh páantjeh jamnit pínah, Jesucristodih ït jepahap wut jĩ.

⁴⁹ Dios naáwát dih jáap jepahnitbut caán baácboó ït naóh peét bejep wut jĩ.

⁵⁰ Obohjeéhtih, judíowã ï maáta bitadih Pablowãdih ït íjanap wut jĩ. Páant ï íjanachah, Diosdih jepahíhnitji maáta yaádh, neoná bíicdih íjnit, Pablowãboodih yeejép chājnit, ïih baácmant ït ñuun yóh bacanap wut jĩ.

⁵¹ Pánihna, caán tátchidih moondih Dios ã yohat pínahdih júutna, Pablowãboó ïih zapatos becchídh ït péoh mao yoh jéenanap wut jĩ. Péoh mao yoh jéena péanit, Antioquía tátchimant Iconio tátchina ït bejep wut jĩ.*

⁵² Pánihna, Antioquía tátchidih moón Jesús dih jáap jéihnitdih Túini Espíritu ã túi teo wáacachah, búdí ït weñep wut jĩ.

14

Iconio tátchidih moondih Pablo Bernabéjĩ ï bohéat

¹ Pablowãboó Iconio tátchina juibínit, chooát yeó jáapdih judíowã ï míic wáacat munná caanjĩh moónjeéh ït waad béjep wut jĩ. Antioquía tátchidih moondih ï bohéatji pahjeh muntih túini doonádih caánboobút ït túi naáwáp wut jĩ. Páant ï naáwáchah, dawá judíowã, judíowã nihcannitbut túi joinít, Jesucristodih ït jepahap wut jĩ.

* **13:51** Mt 10.14; Mr 6.11; Lc 9.5; 10.11

2 Obohjeéhtih, joíhcnannit judíowã Pablowãdih yee naóhñit, judíowã nihcannitdih ït joyát túutcap wut jĩ.

3 Páant ï chãjachah yuhna, maatãpdih Pablowã caánboó jumnit, umcanjeh Jesúih túini doonãdih ït wẽp naáwãp wut jĩ. Pãnihna, “Ï naáwãt yoobópdih caá”, cãacwã ï niij jéihyat pínah niijnã, jwiit cãacwã jwĩ jéih chãjca naáhdih ï chãj júutat pínah wẽpatdihbut Dios Pablowãdih ãt wũhup wut jĩ.

4 Obohjeéhtih, biquína caán tátchidih moón joíhcnannit judíowãjeéh ï péenachah, bitaboó Pablowãjeéh ït péenap wut jĩ.

5 Pãnihna, judíowã nihcannit, judíowã, ï maáta biícidih, “Pablowãdih jee dáhnajĩh yohñit, jwĩ mao yoh jĩh”, ït niij jenah joyóp wut jĩ.

6-7 Obohjeéhtih, páant ï niij jenah joyát doonãdih joinít, Pablowã Iconio tátchimant ït jwei bác bejep wut jĩ. Pãnih jwei béjna, Licaonia baácdih Lистра tátchi, Derbe tátchi, caán tátchina pebh jumnitdihbut ït naóh jibip wut jĩ.

Listra tátchidih moón Pablodih jee dáhnajĩh ï yohat

8 Listra tátchina juibínit, Jesúih túini doonãdih ït bohénap wut jĩ. Caanjĩh jéih yáac chãi bejcanni Pablowãdih ãt joí chãudup wut jĩ. Caán jwĩih cãac jumnajeh, ãih jítchana yéejni ãt jumup wut jĩ.

9 Pãnihna, ã túi joyóchah jéihñit, “Caán ã boocat pínahdih ã túi jenah joiná caá”, Pablo ãt niij jéihyep wut jĩ.

10 Pãnih jéihñit, caandih ennit, nin pah ãt wẽp niijíp wut jĩ:

—Yoobópdih ma ñah ñahúú, ãt niijíp wut jĩ.

Páant ã niijíchah joinít, ñaáp ñah ñuhnit, ãt yáac chũi bej jwíhip wut jĩ.

¹¹ Caandíh ã boanachah ennit, cãacwã búdí ìt en wáhi bejep wut jĩ. En wáhi bejnit, ìih wéheatjĩh nin pah ìt niij wēi ñaacáp wut jĩ:

—Jwiít jwĩpĩ uúbh wēinit dioswã cãac wēéhnit, ìt dei jũúwúp taga, ìt niijíp wut jĩ. Páant ì niij wēi ñaacáchah yuhna, Pablowã ìt beh joicáp wut jĩ.

¹² Páant niij jenah joinít, Bernabédih ìih dios Zeuíh wūt ìt búudhdup wut jĩ. Pablooodíh ìih biíh dios Hermeíh wūt ìt búudhdup wut jĩ. Zeusboó Griego cãacwãíh dioswã ì maáh, Hermesboó ìih dioswãíh naóh yapani wut jĩ. Pánihna, Pabloboó naóhni ã jumuchah, naóh yapani Hermeíh wūt ìt búudhdup wut jĩ.

¹³ Zeusdih uúbhnit, ì wēi wáhat múú tútchi jwēejdih ãt jumup wut jĩ. Pánihna, caán mūdíh en daoní Bernabédih “Zeus caá”, niij jenah joinít, Pablowādih jwááat túut niijná, momo jiwiwādih cháajĩh ì búudhni júdanadihbut tútchi jécna ãt ub jũúwúp wut jĩ. Caánboó cãacwã biícđih wēinit, momo jiwiwādih Pablowādih ãtih mao wáhihip wut yuh jĩ.

¹⁴ Obohjeéhtih, Pablowã ì chãjatdih en wáhinit, cãacwã poómp cātíh ñáo waadnít, nin pah ìt wēp niij ñaacáp wut jĩ:

¹⁵ —Páant ñi chãjatdih ñi cádaahaá. Jwiítbut yeeb pánihnit cãacwãjeh man tigaá. Jwiítđih wēinit, ñi mao wáhca bojoó. Jwiít yeebđih Jesúih táini doonáđih naáwáđih jwĩ jũúwúp be. Dios yoobát báadhni, wēpni caá. Yeéb ñipĩ wēini panihni nihcan caá. Pánihna, nin wēpcanni, báadhcanđih ñi wēi cádaahaá. Túut nūmnít, báadhni Dios yoobátđih

ñi jepahaá. Caán jeádih chãj, baác dihbut chãj, m̃jnadhbut chãj, nihatdih ãt chãjap wut jĩ.

¹⁶ Jon jãtih Dios nihat cãacwãdih dedé ĩ náahat pahjeh ĩ chãjachah, ãt enah boj jwuhup wut jĩ.

¹⁷ Pãnih enah bojna yuhna, ded pah ã jumatdih ãt túi júutup taga. Yeebdíhbut ã oyatdih júutna, mahdih buugát túut, jeémát pínahdihbut ãpĩ quehat túutna caá. Jeémát dih wuhna, yeebdih ãpĩ weñat túutna caá, Pablo queétdih ãt niijíp wut jĩ.

¹⁸ Pãant ã niijíchah, momo jiwiwãdih cãacwã wēi mao wūhíhnit, ĩt tahca bejep wut jĩ.

¹⁹ Cãacwã páantjeh ĩ weñechah, Antioquía tátchidih moón, Iconio tátchidih moón judíowã bíicdih juibínit, Pablowãdih ñuún yee naóh péenit, “Jwiitboodíhjuh ñi joyoó”, cãacwãdih ĩt niijíp wut jĩ. Pãant ĩ niijíchah joinít, caán tátchidih moón Pablodih mawat túut niijná, jee dáhnajĩh ĩt yohop wut jĩ. “Jáantjeh ã wunah bejep be”, niij jenah joinít, tátchi jwēejboó caandih ĩt wái bac bejep wut jĩ.*

²⁰ Pãant ĩ ub bac bej yohochah ennit, Jesúihwã Pablo pebh ĩt míic wáac juibí ñuhup wut jĩ. Pãant ĩ míic wáac juibí ñuhuchah, Pablo boonit, jwúb ñah ñahnit, tátchiboó ãt jwúb waad béjep wut jĩ. Pãnihna, cheibit Pablo Bernabéjĩh Listra tátchimant bac bejnit, Derbe tátchina ĩt bejep wut jĩ.

Pablowã ĩ jwúih bohéniji tátchinadih moondih ĩ jwúb bohéat

²¹⁻²² Derbe tátchina juibínit, caán tátchidih moondihbut Jesúih táini doonãdih Pablowã ĩt

* **14:19** 2Co 11.24-25; 12.2-5; 2Ti 3.11

naáwáp wut jĩ. Páant ã naáwáchah, dawá caandíh joinít, túut nœumnít, Jesucristodih ít túi jepahap wut jĩ. Pánihna, Derbe tátchidih moondíh bohé péanit, Listra tátchina jwúub jœinít, Jesúsdih jáap jepahnitdih jwúub bohéna, queétdih ít weñanap wut jĩ. Tálttimah, Iconio tátchidihbat, Antioquía tátchidihbat jwúub jœinít, Jesúsdih jáap jepahnitdih biíc yoobó ít teo wáacap wut jĩ. Caán tátchinadih jœmnit, Jesúsdih jáap jepahnitdih bohéna, nin pah ít niij naáwáp wut jĩ: “Yeéb yeejép yapna yuhna, Jesúsdih ñi cádahca bojoó. Nin baácboó jwĩ jœm jwuhhachah, jwiít nihatdih yeejép yapat páantjeh ã jœmbipna caá. Páant jwiútdih ã yapachah yuhna, Jesúsdih cádahcan, Dios ã jœmœpboó jwĩ jéih waadbírna caá”, ít niijíp wut jĩ.

²³ Caán tátchina jœmat pah Jesúsdih jáap jéihnitdih ennít, queétdih waóhñit pínahdih Pablowã ít ñío jwejep wut jĩ. Pánih ñíonít, jeémp jwuhcanjeh œúbhna, “Nit meemdíh jepahnitdih waóhñit pínahdih ma túi teo wáacá”, Diosdih ít niij œúbúp wut jĩ.

Pablowã Siria baácđih bóo Antioquía tátchina ã jwúub jœyát

²⁴ Pisidia baácđih bóo Antioquía tátchidih moondíh bohé péanit, caán baácmant jœóhñit, Panfilia baácna ít jwúub dei jœúwúp wut jĩ. Pánih jwúub dei jœóhna, jwíh bejna, bohécanejeh ã yapniji Perge tátchidih chœonít, caanjíh moondíh Jesúih táini doonádih ít bohénap wut jĩ.

²⁵ Pánih bohé péanit, Atalia wut jœmni jœlitdih ít dei jœyúp wut jĩ.

26 Pánih dei jainít, johlitjĩh bejni jãáj chódih waadnít, Siria baácdih bóo Antioquía tútchina ït jwúub cháuh jũúwáp wut jĩ. Dios ã jwíih naáwát túutna, queétdih teo jãha úúbhñit ï wahnit tútchinajeh muntih, Dios ã wutatjidih cháj péanit, ït jwúub juyáp wut jĩ.

27 Pánih jwúub jainít, Jesúihwãdih míic wáacat túutnit, ded pah ï yapatjidih ït naáwáp wut jĩ: “Dios jwiítidih búdí ã teo wáacap be. Páant ã teo wáacachah, ã wēpatjĩh cãacwãdih boonanit, ãih túini doonádihbut jwĩ naáwáchah, dawá joinít, ï jepahap be. Pánihna, judíowã nihcannitbut joinít, dawá ï túi túut nũmúp be”, Pablowã queétdih wahnitdih ït niijíp wut jĩ.

28 Pánihna, caánboó Jesúihwã biícđih maatápđih ït jumap wut jĩ.

15

Jerusalén tútchidih Jesúihwã ï maáta ï míic wáacat

1 Biquína judíowã Judea baácmant bejnit, Antioquía tútchina ït jũibínap wut jĩ. Pánih jũibínit, judíowã nihcannit Jesúihwãdih nin pah ït niij naáwáp wut jĩ: “Moisés jwĩ nũowãdih ïih quehli nah yapat chódih ï bóodat pínahđih ãt wutap wut jĩ. Páant ñi bóodcah, Diosboó yeebđih ã túi úbcan niít”, ït niijíp wut jĩ.*

2 Páant niijnít, queét Judea baácdih moón Pablowãdih ït míic jũihñap wut jĩ. Páant ï míic jũihñachah, Jesúihwãboó Pablo, Bernabé, biquína caanjĩh moón biícđih Jerusalén tútchina ït wah bojop wut jĩ. Jesús ã naáwát túutnit, Jesúihwãdih

* 15:1 Lv 12.3

waóhntidihbut Judea baácmant jubínit ï naáwátdih ï úbh joyát pínah niijná, queétdih ït wahap wut jï.

³ Páant ï wahnitji Fenicia baácna jaí, yap júóh, Samaria baácna ït juyúp wut jï. Pánihna, caán baácnadih moón Jesúíhwājīh míic wáacnit, judíowā nihcannit Jesúsdih ï jepahatjidih ït naáwáp wut jï. Páant ï naáwáchah joinít, queét bádí ït weñep wut jï.

⁴ Queét Jerusalén tútchina ï juyúchah, caanjīh moón Jesúíhwā, queétdih waóhnt, Jesús ā naáwát túttnit biícđih, queétdih ït túi wēi jwāááp wut jï. Pánihna, Pablowā Dios ā wēpatjīh ded pah ï chājatjidih queétdih ït naáwáp wut jï. Judíowā nihcannitbut Jesúsdih ï jepahatjidih ït naáwáp wut jï.

⁵ Obohjeéhtih, páant ï niijíchah joinít, biquína Jesúsdih jepahnit fariseowā ñah ñhñnit, nin pah ït niijíp wut jï:

—Queét judíowā nihcannitdih ïih quehli nah yapat chódih bóodat caá náahap. ‘Moisés ā wutatji pah ñi chājaá’, queétdih ñi niij wutúú, ït niijíp wut jï.

⁶ Páant ï niijátdih míic wéheat tút niijná, āih doonáđih Jesús ā naáwát túttnit, Jesúíhwāđih waóhnt biícđih ït míic wáacap wut jï.

⁷ Páant maatápdih ï míic wéhenachah, joinít, Pedroboó ñah ñhñnit, nin pah queétdih āt niij naáwáp wut jï:

—Wā déewāá, jon ñijeéh wā jumuchah, judíowā nihcannitdih Jesúíh túini doonáđih wā naáwáchah joinít, ï jepahat pínah niijná, weemđih ñíonit, Dios ā wahap jï.*

* 15:7 Hch 10.1-43

⁸ Cãacwã ded pah ï jenah joyátdih jéihni jumna, queét judíowã nihcannit jwĩ naóhni doonádih ï jepahatdih át jéihji tagaá. Pánih jéihna, áihwã ã chãjatjidih jwiít dih júutna, Túini Espíritudih jwiít dih ã wũhatji pahjeh mantih, queétdihbut ã wũhap jĩ.*

⁹ Pánih wũhna, jwiít dih queétdihbut biíc yoobó ã chãjap jĩ. Queétdihbut caandih ï jepahachah, ï yéejatdih át yohji taga.

¹⁰ Jwiít judíowã Moisés ã wutjatjidih biíc yoobó jwĩ túi jepahcan caá. Jwĩ n̄owãjibut biíc yoobó ït jepahcap wat jĩ. Páant jwĩ túi jepahcah yuhna, ¿dépanihna queét judíowã nihcannit Jesús dih jepahnitdih yeéb biíc yoobó ñi wutíh? Pánih wutnit, Dios queétdih ã chãjatjidih ‘Yoobóp dih nihcan caá’, niijná caá ñi chãjap.

¹¹ Obohjeéhtih, jwiít nin pah jwĩ niúj jenah joiná caá: ‘Jwiít dih jĩgah en oinit, Dios jwĩ yéejat jíib ã peéh chãjat déeji jwĩ Maáh Jesús ã túi ubat pah mantih, b̄u jwuh judíowã nihcannitdihbut biíc yoobó ã túi ubna caá’, jwĩ niúj jenah joiná caá, Pedro át niijíp wat jĩ.

¹² Páant ã niijíchah joinít, Pablowã jwuh judíowã nihcannitjeéh jumna, Dios ã wēpatjĩh ded pah ï chãjatjidih ï naáwáchah, nihat laihcanjeh ït joí yai ñũh bejep wat jĩ.

¹³ Páant ï naóh péanachah, Santiago jwuh nin pah át niijíp wat jĩ:

—Wã déewãá, weemdih ñi joi jwuh̄uá. Yeebdih bainí wã naáwíhna caá.

¹⁴ Dios judíowã nihcannitdih túi wēi ennit, áihwã pínahdih ã ñíwatjidih Simón Pedroboó

* 15:8 Hch 2.4; 10.44

jwiít dih ã naóh péanap be.

¹⁵ Dios naáwát dih naóh yapani, ã daacát ji pahjeh tih judíowã nihcannit dih páant át yapap taga. Nin pah át niíj daacáp tají:

¹⁶ ‘ “Davidji maáh jum láa, nihat áihwãbut í wun beedép jí. Pánih beední í jumachah yuhna, túttimah bóo láa, jwúub dei júóhnit, áihwã panihnit dih wã jwúub chãjbipna caá.

¹⁷ Páant wã chãjachah, nihat cáacwã bita judíowã nihcannitbut weém í Maáhdih í náahbipna caá. ‘Wíihwã ñi jumúú’, wã niíj bidnit weemdíh í jepahbipna caá”,

¹⁸ jwí Maáh ã niijná caá’, át niíj daacáp tají. (*Am 9.11-12*)

¹⁹ “Páant ã niíj daacátjidih náhninit, weém, Santiago nin pah wã niíj jenah joiná caá: Judíowã nihcannit, Dios naáwát dih jáap jepahnit dih wái náah jumni jwí chãjat tútca boj jíih.

²⁰ Obohjeéhtih, queéd dih nin pahjeh jwí niíj daác wah jíih: ‘Í pãpnidih wëi wãhni ji jeémát dih ñi jeémpca bojoó. Ñi áa nihcannitjìh ñi yéej chãjca bojoó. Jõp teo maonitji nuñúpwãdih ñi jeémpca bojoó. Meépdih ñi babhca bojoó’, jwí niíj daác wah jíih.*

²¹ Jon játih, buubut jwiít judíowã jwí míic wáacat muaná, jwí chooát yeó jáap jumát pah, Moisés ã wutátjidih ípí bohéna caá. Nihat tútchidih moón caandíh jwí jéihna caá. Pánihna, weém wã niiját pahjeh tih Jesús dih jéihnit judíowã nihcannit dih, niíj daác wahat dée caá, bita jwí déewã jwiít dih í íjcat pínah niijná”, Santiago át niijíp wut jí.

* **15:20** Gn 9.4; Ex 34.15-17; Lv 17.10-16; 18.6-23

Judíowã nihcannitdih ã daác wahat

²² Páant ã niijíchah joinít, Jesús ã naáwát túttnit, Jesúihwãdih waóhñit, nihat Jesúihwã biícđih, Antioquía tútchidih moondíh ã daácni náodih Pablowãjeéh Ɂb bejnit pínah, Judas, Silasđihbut ãt ñíwip wɁt jĩ. Judas ãih biíh wɁt Barsabás wɁt jĩ. Queét Jesúsđih túi jepahnit ã jumɁchah, bita Jesúihwã queéđđih ãt túi wěi enep wɁt jĩ.

²³ Páñih queéđđih ñío péanit, nin pah ãt niij daacáp wɁt jĩ:

“Yeéb nihat judíowã nihcannit Jesúihwã Antioquía tútchidih moón, Siria baácđih moón, Cilicia baácđih moondíhbut jwiít Jesús ã naáwát túttnit, ãihwãdih waóhñit, nihat ãihwãbut, yeebđih jwĩ túyat túttna caá.

²⁴ Biquína jwĩjeéh jumñit yeeb pébhna jaibínit, yeebđih dawá wɁtatđih ãt jepahat tútɁp wɁt jĩ. Páñih wɁttnit, yeebđih ãt tac buugánap wɁt jĩ. Obohjeéhtih, jwiítboó queéđđih jwĩ wahcah yuhna, queéťjeh bejnit, yeebđih páant ãt wɁtɁp taga.

²⁵ Páñihna, jwiít nihat biíc yoobó ñi pebhna wahní pínahđih jwĩ ñíwip be. Páant jwĩ ñíonitđih jwĩ oini Pablo Bernabéjeéh jwĩ wahbipna caá.

²⁶ Pablowã jwĩ Maáh Jesucristoíh túini doonáđih úumcanjeh ã bohénachah, dawá láa bita queéđđih ãt pɁñɁp wɁt jĩ. ‘Í mao yohíhichah yuhna, Jesúih túini doonáđih jwĩ naóh cádahcan niít’, ãpĩ niijná caá.

²⁷ Páñihna, jwĩ daácni náodih yeebđih ã naáwát pínah niijná, Judas, Silasjñh Pablowãjeéh ñi pebhna jwĩ wahna caá.

²⁸ Túini Espíritu jwiítđih ã teo wáacachah,

ã jéihyatjĩh nin pah jwĩ jenah joiná caá: Wái náah jumni wʉtatdih wʉtcan, nin pahjeh jwĩ niij wʉtbipna caá:

²⁹ ‘Nin jwĩh dios caá’, niij jenah joí pāpnidih wēinit, ĩ cádah cáagniji jeémát dih ñi jeémpca bojoó. Meépdih ñi babhca bojoó. Jõp teo maoni nuñápwādhbut ñi jeémpca bojoó. Ñi áa nihcan-nitjĩh ñi yéej chājca bojoó. Nin jwĩ wʉtatdih jepahna, ñi túi jumnipna caá. Páant bóojeh tigaá yeebdih jwĩ wʉtɸp”, ĩt niij daacáp wʉt jĩ.

³⁰ Caán núodih daác péanit, Antioquía tútchina bejnitdih ĩ wāhat túttimah, queétboó bejna, Antioquía tútchina ĩt juibínap wʉt jĩ. Caanná juibínit, Jesúhwādh míc wáacat túutnit, Jerusaléndih moón ĩ daác wahni núodih ĩt wāhɸp wʉt jĩ.

³¹ Páant ĩ wāhni núodih míc en naóhna, táinijeh ĩ wʉtachah joinít, búdí ĩt weñep wʉt jĩ.

³² Judas Silasjĩh Dios naáwát dih naóh yapanit jumna, Jesúhwādh Dios naáwát dih ĩt túi bohénap wʉt jĩ. Páant ĩ bohénachah joinít, Jesúhwāboó búdí wēinit, Jesús dih chah ĩt túi jenah joyóp wʉt jĩ.

³³ Judas Silasjĩh caanná maatápdih jumnitji caanjĩh moondih ĩ cádah jwáub jūáwáchah, “Ñi túi bejeé”, Antioquía tútchidih moón queét dih ĩt niijíp wʉt jĩ. Páant niijnít, Judaswādh wahnitji Jerusalén tútchidih moondih ĩt túyat túutɸp wʉt jĩ. Páant ĩ niiját túttimah, Judasjeh át jwáub jūáwáp wʉt jĩ.

³⁴ Obohjeéhtih, Silasboó biih jwáub jenah joinít, Antioquía tútchidih át chāwáp wʉt jĩ.

³⁵ Pablo Bernabébut caán tútchidih ĩt chāwáp wʉt jĩ. Pánihna, queét, dawá bita bícdih Jesúh táini doonádih ĩt bohénap wʉt jĩ.

Chéneji Pablo táini doonádih naóh jibidih ã bejat

³⁶ Tálttimah, Antioquía tútchidih maatápdih jamniji Pablo Bernabédih nin pah át niijíp wut jĩ:

—Chóbe, nihat tútchinadih moón jwĩ jwíh naóhntjidih jwĩ táoh en jibjĩh, páant mantih, át niijíp wut jĩ.

³⁷ Páant ã niijíchah joinít, Bernabéboó Juan Marcosdih ãjeéh átih ub bejihip wut yuh jĩ.

³⁸ Caánboó ã jwíh jibichah, ãjeéh Panfilia baácna juibíniji yuhna, bíic yoobó nihcan, át jwúubah júúwúp wut jĩ. Caán bíic yoobó ã nihcatdih enniiji, Pablo caandíh chéneji át ub bejihcap wut jĩ.*

³⁹ Páant ã ub bejihcah enna, Bernabé Pabljĩh queétjeh tubit míic niijnít, ãt míic cádahap wut jĩ. Pánihna, Bernabéboó Chipre wut jamni quewana Juan Marcosdih át numah chúuh bejep wut jĩ.

⁴⁰ Pablobó Silasdih ã chéen pínahdih ñionit, át numah bejep wut jĩ. Pánihna, ã bohénadih bejat pínah jãtĩh, “Paá, queétdih en daonít, ma tái teo wáacá”, Jesúhwã ãt níj úúbúp wut jĩ. Páant ã úúbát tálttimah, Pablo Silasjĩh ãt bejep wut jĩ.

⁴¹ Pánih bejnit, Siria baácna Cilicia baácna but juibínit, caanjĩh moón Jesúhwãdih jwúub bohéna, queétdih ãt tái teo wáacap wut jĩ.

16*Timoteo Pablowãjeéh ã bejat*

¹ Cilicia baácmant Derbe tútchina juibí, yap bej, Litra tútchina Pablowã ãt juibínap wut jĩ. Caanná juibínit, Timoteo wut jamnidih ãt jwãáap wut jĩ. Æ

* 15:38 Hch 13.13

ín judío wili, ã íp Griego cãac wut jĩ. Timoteo, ã ín biíc dih Jesúsdih jepahnít wut jĩ.

² Listra tátchidih moón, Iconio tátchidih moonbát Jesúshwã “Timoteo túi chãjni caá”, ípĩ niijíp wut jĩ.

³ Páant ï niijíchah joinít, Pablo Timoteodih át numah bejíhip wut jĩ. Obohjeéhtih, caán baác dih moón judíowãboó “Timoteo íp Griego cãac caá”, ï niijíchah joinít, judíowã ï íjcat pínah niijná, Pablo Timoteodih quehli nah yapat chóodih át bóodat túutap wut jĩ.

⁴ Pánihna, Pablo Silasjĩh Timoteodih numah jibna, ded ï juibíni tátchidih moondíh Jerusalén tátchidih moón Jesús ã naáwát túutnit, Jesúshwãdih waóhnitbut ï daác wahni náojidih ít en naáwáp wut jĩ, caandíh ï jepahat pínah niijná.

⁵ Páant ï naáwáchah, Jesúshwã caandíh chah ít túi jenah joyóp wut jĩ. Pánihna, queét yeó jáap jummat pah chah ít dao béjep wut jĩ.

Pablo Macedonia baác dih bóodih ã oo júmat

⁶ Túini Espíritu Asia baácboó queédih Dios naáwát dih bohénadih át bejat túutcap wut jĩ. Páant ã wahcah, queét Frigia baác dih, Galacia baác dih moondíhjuh ít bohé jibip wut jĩ.

⁷ Pánih jib bejna, Misia baácna juibínit, Bitinia baácna ít bejíhip wut yah jĩ. Obohjeéhtih, Túini Espíritu queédih caánboó át bejat túutcap wut jĩ.

⁸ Páant caanná ã wahcah, Misia baác dih yap bej, Troas jélitna ít dei juibínap wut jĩ.

⁹ Caanná dei juibínit, ñona, Pablo nin pah át oo júmap wut jĩ: Macedonia baác dih bóo ã pebh ñuhuchah, át enep wut jĩ. “Jwiít Macedonia

baácdih moondíh ma teo wáac jũáwá”, Pablodih áť níj bidip wut jĩ.

10 Pánih oo júmniĵi jáanit, jwĩih bíí déedih ámoh péa, Macedonia baácna jwĩ bejep jĩ. “Dios caán baácna áih táini doonádih jwiítđih naáwát túutna caá ã chãĵap”, jwĩ níj jéihyep jĩ. Weém Lucasbút ĵjeéh wã bejep jĩ.

Pablowã Silas biúcdih Filipos túťchiboó ĵjumat

11 Troas túťchimant Macedonia baácna beĵat túut niijná, jélitna dei ĵuibínit, johlitjĩh bejni búdí jãáj chóodih waadnít, Samotracia wut ĵumni quewadih jwĩ chũh ĵuibínap jĩ. Biíh yeó jáap Neápolis túťchina jwĩ chũh ĵuibínap jĩ.

12 Pánih ĵuibí, caán túťchidih yap beĵnit, Filipos túťchina jwĩ ĵuibínap jĩ. Caán túťchi Roma túťchidih moón ĩ ĵuí ĵumni túťchi, Macedonia baácboó jwĩh ĵumni túťchi tajĩ. Oboh ĵumni túťchi áť nihcap tajĩ. Caanná maatápdih jwĩ ĵumap jĩ.

13 Judíowáih chooát yeó jáapđih caán túťchimant bac beĵnit, mĵ jwěejna jwĩ ĵuibínap jĩ. Caanjĩh Diosđih húbát túut niijná, judíowã ĵpĩ míic wáacap tajĩ. Caanjĩh ĵuibí chũadnit, wáac ĵuinít yaáhdđih Jesúih táini doonádih jwĩ naáwáp jĩ.

14 Biíc wili jwiítđih joiníh, Tiatira túťchidih bóli Lidia wut ĵumnih mí ĵumap jĩ. Caánt búdí jíib ĵumni yéguehdđih jíib chãjnih, judío wili nihcan yuhna, Diosđih táí wěiníh mí ĵumap yah jĩ. Obohjeéhtih Jesúih doonádih mít joi jwáhcap tajĩ. Pánihna, Pablo Jesúih doonádih ã naáwáchah, táí jepahíhatđih Dios caántđih áť wěhup tajĩ.

15 Páant mi jepahachah, caántdih miíh m^uúdíh moón biícđih Pablowã ĩ daabánap jĩ. Daabá péanachah, nin pah jwiítđih mi niijíp jĩ:

—‘Caántboó Jesúsđih táı jepahnih caá’, niij jenah joiná, wãjeéh jũóhñit, wĩih m^uúboó ñi chão jwúh^uú, jwiítđih mi niijíp jĩ.

Páant mi niijíchah joinít, miíh m^uuná jwĩ chãwáp jĩ.

Pablowãđih nemat m^uúboó ĩ nemat

16 Biíh yeó jáapđih Diosđih ^uúbat pebhboojéh mantih jwĩ jwú^ub bejechah, nemép jumnih jwiítđih mi jwãáap jĩ. Caánt teo wũhñih jumna, “Meemđih nin pah ã yapbipna caá”, cãacwãđih niij naóhna, mi maátadıh búdí mit jíib teo wũh^uap tajĩ.

17 Pánihna, jwiít Pablo biícđih jwĩ bejechah, nin pah mi niij ñaac ñ^uún péenap jĩ:

—Nit Dios chah wěpnidih teo wũhñit caá. Jwiít iiguípna jwĩ bejat déedih ded pah Dios jwiítđih ã táı ^ubat pínahđih ĩ naóhna caá, mi niij ñaac péenap jĩ.

18 Maatápđih caandíh páant mi niij tac b^uugá péena, Pablodih ã táı naáwát dée mi bojcap jĩ. Páant mi niij ñaacáchah joí ch^uunít, Pablo tac púud ennit, nemépdih nin pah ã niij jũihñ^uap jĩ:

—Jesucristo ã wěpatjĩh meemđih wã watna caá. Caántđih cádahñit, ma bac bejeé, ã niijíp jĩ.

Páant ã niijíchahjeh, nemép át bac bejep tajĩ.

19 Páant ã bacat túttimah, caánt mi jíib teo wũhat ã b^uudúchah ennit, mi maátaboó búdí íijnit, Pablo, Silasđihb^ut ĩ tewep jĩ. Teonit, caán tútchĩ tac yoóbó j^uúhna ĩ ^ub bejep jĩ.

20 Pánih ub juibínit, peéh chājat túutnit pebhna jwejnít, nin pah í níj naóh yacap jī:

—Nit judíowā jwīih tútchidih moondíh tac buugánadih ít jūúwáp taga.

21 Queét jwī nhowā í wútatdih cádahat túutnit, bíih wútatdih naóhna caá í chājap. Jwiít Roma tútchidih moón maáhdih jepahnit jumna, nit í naáwátboodíh jwī jéih jepahcan caá, í níijíp jī.

22 Páant í níijíchah joinít, dawá Pablowādhíh í íjip jī. Pánihna, peéh chājat túutnitboó Pablowāíh yégueh chóodih yeo wáyat túutnit, máa nahnajíh queétdih í puñat túutap jī.

23 Páant queétdih í pūi péanachah, nemat mūúboó í nemat túutap jī. Í nemat túttimah, nemat mūúboó en daonídih í túi en dawát túutap jī.

24 Páant í wútuachah, caán mūúdhíh en daoníboó péeni tólihna queétdih át nemep wut jī. Pánih nemnit, máa naanájíh íih wúunadih át nah chéwep wut jī.

25 Chei tac yoób Pablo Silasjíh Diosdih úúbhnit, ít wēi ewep wut jī. Páant í wēi ewechah, bita nemat mūúboó jumnitbut ít joyóp wut jī.

26 Páant í wēi ewechahjeh, caán mūú tubit méménachah, nihat jécna át waát beed béjep wut jī. Nemat mūúboó jumnitdih í chéwatji tōpnabut át jwāat beed béjep wut jī.

27 Páant ā yapachah ennit, queétdih wapniboó “Nin nemat mūúboó jumnit inát jweiná caá. Í jweyéchah, wā maáta weemdíh í peéh maobipna caá”, át níj jenah joyóp wut jī. Páant níj jenah joinít, áih íibat naadíh jwāat wáinit, át míic jwāaguíhip wut yuh jī.

28 Obohjeéhtih, ã míc jwãaguíhichah ennit, Pabloboó caandíh nin pah ãt niíj ñaác ejep wut jĩ:

—Meemjéh ma míc jwãagca bojoó. Jwiít nihat jwĩ jamna caá, ãt niijíp wut jĩ.

29 Páant ã niijíchah joinít, queétdih wapniboó “Jií jũúwú, jií jũúwú”, ãt niíj ejep wut jĩ. Queét pebhna ñáo ñah bej, méménit, Pablo Silas ñih jítcha pebh ãt páah yoh ñajap wut jĩ.

30 Pánihna, queétdih ãb bac bejnit, nin pah ãt niíj ãúbh joyóp wut jĩ:

—¿Jesúih jamíhna, ded pah tigaá wã chãjbi? queétdih ãt niijíp wut jĩ.

31 —Jwĩ Maáh Jesúsdi h táí jenah joinít, ma jepahaá. Ma déewãbut caandíh ñ jepaha naáh. Páant ñi jepahachah, yeéb iiguípna bejnit déejidih Diosboó ã táí ãbbipna caá, Pablowã caandíh ñt niijíp wut jĩ.

32-33 Chei tac yoobjéh Pablowã Jesúih táini doonádih ñ naóh péanachah, queétdih wapni ãih munná ãt numah bejep wut jĩ. Caanná numah juibínit, ñ puñatji yahwítnadi h ãt chocop wut jĩ. Ñ choc péaat táttimah, Jesúsdi h caán ã déewã bíicdi h ñ jepahachah, queétdih Pablowã ñt daabánap wut jĩ.

34 Ñ daabáat táttimah, queétdih wapni ji Pablowãdi h jeémát ãt wũhup wut jĩ. Pánihna, caán ã déewã bíicdi h Jesúsdi h jepahni t, búdí ñt weñep wut jĩ.

35 Baabáchah, táttchidih moón maátaboó Pablowãdi h ñ watat pínah niijná, soldadowãdi h nemat munná ñt wahap wut jĩ.

36 Páant ñ bacaat tútatdi h joinít, Pablowãdi h wapni ji queétdih nin pah ãt niijíp wut jĩ:

—Maáta yeebdíh ít bacaat túutup wut be. Pánihna, úumcanjeh, ñi bac bejeé, át niijíp wut jĩ.

³⁷ Páant ā bacaíhatdih joinít, Pabloboó soldadowādh nin pah át niij naáwáp wut jĩ:

—Jwiít jwĩ yéej chājcan be. Jwiít dih naóh yacnit ĩ niiját pah biíh niij naóhni ā wihcah yuhna, ñi peéh chājachah, yoobóp dih nihcan be. Obohjeéhtih, jwiít Roma baácdih moón jwĩ jumuchah yuhna, jwiít dih queét maátaboó cāacwā ĩ enepdih ĩ puñat túutup be. Pūi péanit, nemat muúboó ĩ nemep be. Pánihna, jwiít dih ĩ yéej chājatjidih tícnit, ¿buu cāacwā ĩ encah niít, ĩ bacaíhip? Queét maátajeh tih jwiít dih bacanadh ĩ juúwú naáh, át niijíp wut jĩ.

³⁸ Páant ā niijíchah joinít, soldadowāboó maátadh naáwádh ít bejep wut jĩ. Pablo Silasjñh Roma baácdih moón ĩ jumad dih jéihna, maátaboó queétdih ĩ puñatji peéh chājat pínahdh ít úumup wut jĩ.

³⁹ Pánihna, queét Pablowā pebh juibínit, nin pah ít niijíp wut jĩ: “Yeebdíh jwĩ yéej chājap be. Chéneji páant jwĩ jwúub chājcan niít”, ít niijíp wut jĩ. Páant niij péa, queétdih numah bac bejnit, maáta ñih tútchimant ít bejat túutup wut jĩ.

⁴⁰ Páant ĩ niijíchah joinít, Pablo Silasjñh nemat muumánt bac bejnit, Lidiaíh muuná ít bejep tajĩ. Caanná juibínit, Jesúíhwā biícdih ĩ míic wáacap jĩ. Pánih míic wáacnit, “Jesúsdih péena, ñi cádahca bo-joó”, queétdih ĩ niij wēp naáwáp jĩ. Páant niij péanit, Pablo Silasjñh Filipos tútchimant ĩ bejep jĩ.

17

Tesalónica tútchidih moón Jesúíhwādh ĩ úijat

¹ Pánih Filipos tátchimant bejnit, Anfípolis tátchidih yap bej, Apolonia tátchidihbut yap bej, Tesalónica tátchina queét it jwabínap wut jĩ. Caanjĩh judíowã ĩ míic wáacat muaná at jumap wut jĩ.

² Pánihna, judíowãih chooát yeó jáap jumap pah ĩpĩ bejat dée pah Pablowã judíowã ĩ míic wáacat muaná it bejep wut jĩ. Caanná jwabínit, tres semanas chooát yeó jáap jumap pah Dios naáwátdih caanjĩh moondih Pablo at bohénap wut jĩ.

³ Pánih bohéna, nin pah ĩpĩ niij naáwáp wut jĩ:

—Jwiit judíowã, jwĩ páini, Dios ã wahni Cristo yeejép ã yapat pínah, ã wunat pínah, ã jwáub boo pad júuwát pínahdihbut jon jãtih moón Dios naáwátdih naóh yapanit it daacáp tajĩ. Wã naóhni Jesúsboó Dios ã wahni Cristo ã jumna caá. Caán caá jwĩ páini, at niijíp wut jĩ.

⁴ Páant ã niijíchah joinít, biquína caanjĩh moón judíowã, dawá Griegowã Diosdihjeh wēnit, caán tátchidih moón maáta yaádhbut caandih joinít, “Yoobópdihi tigaá”, it niijíp wut jĩ. Páant niijnít, Pablowãdih it péenap wut jĩ.

⁵ Obohjeéhtih, judíowã maátaboó ĩjeéh péenachah ennit, búdí it íjip wut jĩ. Pánih íjna, dawá yeejépwádh bid bojnit, nin pah it niiját túutap wut jĩ: “ ‘Nit yeejép chãjna caá ĩ chãjap’, ñi niij ñaacá”, queétdih it niij jac wutap wut jĩ. Páant ĩ niij ñaacáchah joinít, caán tátchidih moonbút Pablowãdih it íjip wut jĩ. Pánihna, judíowã ĩ maáta Jasón wut jumniih muaná jwabínit, cáacwãdih wãhíhna, Pablowãdih it bidip wut jĩ.

⁶ Obohjeéhtih, queétdih bid jaicán, Jasónboodih, bita Jesúihwãdihbut it teo wái bac bejep wut jĩ.

Pánih teo wái bac bejnit, tátchidih moón maáta pebhna ɯb jwíbínit, nin pah ít niíj naóh yacap wɯt jĩ:

—Pablowā nihat baácdih moondíh ít tac bɯugánap wɯt be. Pánihna, bɯɯ jwíih tátchidihbut tac bɯugánadih ít jwíná caá.

⁷ Nin Jasón queétdih áih mɯuná át waadát túutap wɯt jĩ. Queét Roma tátchidih bóo jwí maáh César ā wɯtatdih yap yohnit, ‘Bíih maáh, Jesús caá ā wāt’, niijnít, jwí maáh ā wɯtatdih jwiítidihbut ít yap yohat túutna caá, ít niíj naóh yacap wɯt jĩ.

⁸ Páant ít niíj naóh yacachah joinít, nihat cǎacwā ít maáta bíicdih tɯbit ít íjip wɯt jĩ.

⁹ Obohjeéhtih, queétdih ít nemcat pínah niijná, Jasón, ājeéh jɯmnitbut caán tátchidih moón maátadih dinero ít wāhɯp wɯt jĩ.

Pablo Silasj̄h Berea tátchina ít jwíbíát

¹⁰ Caan chéijeh waícanjeh Berea tátchina Jesúihwā Pablowādih ít wahap wɯt jĩ. Caanná jwíbínitji judíowā ít míc wáacat mɯuná ít waadáp wɯt jĩ.

¹¹ Tesalónica tátchidih moón ít jenah joyátjidih Berea tátchidih moónboó Jesúih doonádih chah tái joinít ít jɯmɯp wɯt jĩ. Pánihna, Jesúih táini doonádih ít joyát túttimah, “¿Yoobópdih niít?” niíj jéihíhna, yeó jáap jumat pah jon jǎtih moón Dios naáwátdih ít daacátjidih ennit, ít míc bohénap wɯt jĩ.

¹² Pánih bohéna, judíowā, Griegowā neoná, maáta yaádh bíicdih, dawá Jesúsdih ít jepahap wɯt jĩ.

¹³ Obohjeéhtih, Pablo Berea tátchidih moondihbut Dios naáwátdih ā bohéat doonádih

joinít, Tesalónica tátchidih moón judíowã ï maáta caanná ït ñuun béjep wut jĩ. Caanná ñuun juibínit, Berea tátchidih moondih tac buugána, ï yee naáwáchah joinít, Pablowādih ït íjip wut jĩ.

14 Páant ï íjichah ennit, Pablodih búdí muj jélitna waícanjeh Jesúíhwã ït namah dei bejep wut jĩ. Obohjeéhtih Silas Timoteojĩh Berea tátchidih ït chāwáp wut jĩ.

15 Pánihna, caán jélitmant Pablodih Atenas tátchina búdí jááj chóojĩh ït namah chúuh bejep wut jĩ. Pánih chúuh juibínitji, Berea tátchiboó ït jwúub aab béjep wut jĩ, páant mantih. “Waícanjeh bejnit, Pablodih ñi pej jum bií”, Silas Timoteodihbut ït niijíp wut jĩ. Páant Pablo queédih át niiját túutup wut jĩ.

Pablo Atenas tátchidih ã jummat

16 Pablo Atenas tátchina juibínit, Silas Timoteodihbut át páñap wut jĩ. Pánih páina, caán tátchidih át táoh jib bejep wut jĩ. Pánih táoh jib bejna, caán tátchidih moón ï pāp cáagnitdih “Jwĩih dios caá”, ï niijíchah jéihnit, dawá ã jummatdih enna, Pablo tūbit át jĩgahap wut jĩ.

17 Pánih jĩgahnit, judíowã ï míic wáacat muuná waadnít, judíowã, judíowã nihcannit yahna, Diosdih wéinitjĩhbut át míic wéhenap wut jĩ. Yeó jáap jummat pah Pablo caán tátchi tac yoóbó juhna en jibnitjĩhbut át míic wéhenap wut jĩ.

18 Biquína Epicureowã ï jenah joyátdih bohénit, bita Estoicowã ï jenah joyátdih bohénitbut Pabljĩh ït míic wéhenap wut jĩ.

—¿Nin wéheat beedcánni ded pah tigaá ã niij wéhe? queét ït míic niijíp wut jĩ.

Pánihna, Pablo ded pah Jesús ã jumãtjidih, ã boo pũd jũúwãtjidihbut ã naáwãchah joinít,

—Caánboó biih diosnadih naóhna caá ã chãjap, ãt niijíp wũt jĩ.

19 Túttimah, queét ãpĩ míc wáac jũbí wéhenapboó, Areópago wũt jumãpna Pablodih ãt numah bejep wũt jĩ.

—Ma jáap bohéãtdih jwĩ jéihíhna caá.

20 Jwĩ joíca naáh doonãdih ma naáwãchah, jwĩ joíhna caá, queét Pablodih ãt niijíp wũt jĩ.

21 Nihat Atenas tútchidih moón, biih baácmant jũóhñit caán tútchidih jumñitbut, yeó jáap jumãt pah jáap bohéãtdih ãpĩ míc wéheíhip wũt jĩ. Pánih jéihíhñit jumna, Pablo ã naáwãtdihbut ãt joíhñit wũt jĩ.

22 Pánihna, Pablo Areópago wũt jumãpboó ñah ñuhñit, caánboó wáac jũbíñitdih nin pah ãt niij naáwãp wũt jĩ:

“Atenas tútchidih moón, dawã pãpñitdih yeéb búdí wẽinit, ñi wũbãtdih wã jéihna caá.

23 Nin ñiíh tútchidih dawã ñi pãp cáag wẽinitdih wã táoh enep be. Pánih en jibna, yeéb ñi wẽinit cãtíh, biícđih nin pah ñi niij daacãtjidihbut wã enep be. “WËT JWĨ JÉIHCA NAÁH DIOS CAÁ”, ñit niij daacãp tabe. Yeéb caandíh jéihcan yuhna, caandíh ñi wẽina caá. Pánihna, caán ñi jéihca naáhdih yeebdíh naáwãt túut caá wã chãjap.

24 “Caán Dios nihat baácđih chãj, nihat baácboó jumñidihbut ãt chãjap tajĩ. Pánihna, nihat jeáboó jumñit, baácboó jumñitbut ãt maáh caá. Cãacwã ã chãjni mũdídih jumni nihcan caá.

25 Caán jwiít dih báadhdat tút ni, caolih wáyat tút ni, nihat biíh pah bóo chāj wūhni jumna, jwiít jwī teo wáacat dih ā náahcan caá. Caán moh yéejni nihcan caá.*

26 “Newé pínahdih caán Dios át jwīh chājap wut jī. Caanjīh nihat baácdih moondíhbut át chājap wut jī. Pánihna, nihat baácboó jwiít dih át jwejep wut jī. ‘Nin pah bólih maatápdih ā báadh jwuhbipna caá’, jwiít dih Dios át niíj jenah joyóp wut jī.

27 ‘Queét weemdíh bidnit, ī jwāáh b ipna caá’, Dios át niíj jenah joyóp wut jī. Obohjeéhtih, Dios yuúp ā jumcan caá. Jwījeéh tigaá ā jumap.

28 Nin pah biíh át niíj daacáp tajī: ‘Caandíh míc wéhenit pínah jwiít dih át chājap wut jī. Pánihna, jwījeéh āpī jumna caá’, it niíj daacáp tajī. Jon jātih moón ñi déewābut ‘Jwiít Dios weh caá’, it niíj daacáp tajī.

29 Pánihna, ‘Jwiít Dios weh caá’, niíj náhnina, oro, plata, jeejīh yeéb ñi jenah joyátjeh ñi chājnidih ‘Jwīh dios caá’, niíj jenah joyát dih ñi cáda haá.

30 Jon jātih moón Diosdih jéihcannit jum jwuhna, ī yéej chājachah yuhna, Dios át peéh chāj jwuhcap wut jī. Obohjeéhtih, bhu láa nihat baácdih moón ī yéej chājat dih át cádahat tútup wut jī.

31 Túttimah, Dios ā jenahni yeó jáap dih nihat baácdih moón túnit dih, yeejépwādi hbut ded pah ī chājatji jíib ā jíib chājbipna caá. Pánih chājni pínahdih Jesús dih Dios nin baácboó át wahap wut jī. Jesús wunnidih yuhna, át jwūub booanap tajī. Pánih booana, ‘Ded pah cáacwā ī chājatji jíib nin wā booani ā túi jíib chājbipna caá’, Dios cáacwā dih

* 17:25 1R 8.27; Is 42.5; Hch 8.47

ãt niij jéihyanap wut jĩ”, Pablo Atenas tútchidih moondíh ãt niijíp wut jĩ.*

³² Páant cãacwã ã boo pud jũúwátjidih ã wéhenachah joinít, biquína Pablodih ãt deoh naáwáp wut jĩ. Obohjeéhtih, bitaboó nin pah ãt niijíp wut jĩ:

—Chéneji caandíh ma naáwáchah, jwĩ jwúub joíhna caá, ãt niijíp wut jĩ.

³³ Páant ã niiját túttimah, ã míic wáacapmant Pablo ãt bejah bojop wut jĩ.

³⁴ Daocánnit Jesúsdi h jáap jepahnit, caán biíc dih ãt péenap wut jĩ. Biíc newé, Dionisio wut jumni, Areópagodih maátajeéh jumni, Jesúsdi h ãt jepahap wut jĩ. Biíc wili Dámaris wut jumnih, bitabut Jesúsdi h ãt jepahap wut jĩ.

18

Pablo Corinto tútchiboó ã jummat

¹ Túttimah, Pablo Atenas tútchiboó jumniiji Corinto wut jumni tútchina ãt bejep wut jĩ.

² Caanná jubínit, judío cãac Aquila wut jumnidih ãt jwãáap wut jĩ. Roma tútchidih moón ã maáh Claudio Roma tútchiboó jumnit judíowãdih ã bejat tútuchah, Aquilaboó yad Priscilajĩh bejnit, Corinto tútchina jãtih ãtát jubínap wut jĩ. Aquila Ponto wut jumni baácdih bóo wut jĩ. Pánihna, queét Corinto tútchidih ã jumuchah, Pablo queét pebhna enedih jubínit, ãjeéh ãt chãwáp wut jĩ.

³ Aquilawã nuñúpwã chóojĩh muudíh teo jíib chãj wãhñit ãt jumap wut jĩ. Pablobut caán déedih teoni jumna, ãjeéh ãt tewep wut jĩ.

* **17:31** Sal 9.8

⁴ Pablo chooát yeó jáap jummat pah, judíowã ï míc wáacat munná jubínit, queét Jesúsdiñ ï jepahat pínah niijná, judíowã, judíowã nihcannitdihbut Dios naáwátdih át naáwáp wut jĩ.

⁵ Silas Timoteojĩh Macedonia baácmant Corinto tátchina ï jubínachah, Pablo yeó jáap jummat pah judíowátdih Dios naáwátdih át naáwáp wut jĩ. “Jesús caá jwiít judíowã jwĩ páini, Dios ã wahni”, ãpĩ niijíp wut jĩ.

⁶ Páant ã niij bohénachah, judíowã caandih ït joíhcap wut jĩ. Pániñ joíhcan yap yohnit, caandih ït jãihñap wut jĩ. Páant ï joíhcatdih enna, queétdih ã cádahatdih júutna, Pablo ãih jih bóo yégueh chóodih too dugnit, át ñéenc mao jéenanap wut jĩ. Pániñ chãjnit, queétdih nin pah át niij jãihñap wut jĩ:

—Yeéb ñi yap yohatji jíib iiguípna ñi bejbipna caá. Pániñna, bũũ judíowã nihcannitdih Jesúsdiñ doonátdih naáwátdih wã bejbipna caá, át niijíp wut jĩ.

⁷ Páant niij péanit, judíowã ï míc wáacat munnánt bac bejnit, Tito Justo wut jumniñ munná át waád jubínap wut jĩ. Caán judío nihcan yahna, Dios yoobátdih wëini wut jĩ. ãih mũũ judíowã ï míc wáacat mũũ pébh át jumap wut jĩ.

⁸ Crispo wut jumni, judíowã ï míc wáacat mũũdih bóo maáhji, ãjeéh bóli, ã wehbut, Jesúsdiñ ït jepahap wut jĩ. Pániñna, dawá Corinto tátchidih moón Pablo ã naáwátdih joinít, Jesúsdiñ ï jepahachah, ïpĩ daabánap wut jĩ.

⁹⁻¹⁰ Biíc chei ãocanjeh, Pablo oo jámat déedih ã enechah, Jesús caandih jíghnit, nin pah át niij naáwáp wut jĩ. **“Majeéh wã jumna caá. Nin tátchidih moón dawá wíihwã ï jumna caá.**

Pánihna, bita meemdíh yeejép ĩ chãjíchah yuhna, ùmcanjeh, wã naáwát dih ma naóh cádahca bojoó. Páantjeh ma jumah bojca bojoó”, ãt niijíp wut jĩ.

11 Páant ã niijíchah joinít, biíc jópchi túi beéd, biíh jópchi tac yoób caanjĩh moondíh Dios naáwát dih Pablo ãt naóh jumap wut jĩ.

12 Caán tútchidih Pablo ĩjeéh ã jum jwuhuchah, Galión wut jumni, Acaya baác dih moón maáh ãt jumap wut jĩ. Pánihna, caán láa judiówã ĩ maáta nihat biíc yoobó jenah joinít, Pablodih naóh yacat túut niijná, Galión pebhna caandíh ĩt ub juibínap wut jĩ.

13 Pánih ub juibínit, Galióndih nin pah ĩt niij yee naóh yacap wut jĩ:

—Ninboó cãacwã ded pah Diosdih ĩ weñat pínahdih bohéna, Moisés ã wutatjiboodíh ã jepahat túutcan caá, ĩt niijíp wut jĩ.

14 Páant ĩ niij yee naáwáchah joinít, Pablo ã naáwíhichahjeh, Galiónboó judiówádih nin pah ãt niij jepahap wut jĩ:

—Nin jwiít Roma baác dih moón jwĩ maáta ĩ wutatdih yap yohni ã jumuchah nihna, yeebdíh wãta jepah tagaá.

15 Obohjeéhtih, yeéb judiówã ñi wutatboodíh caán yap yohni ã jumuchah, ñíh pínahjeh caá. Caandíh wã jéihcan caá, ãt niijíp wut jĩ.

16 Páant niijnít, queét naóh yacnitdih áih tólihmant ãt bacanap wut jĩ.

17 Páant ã bacanachah, Sóstenes, judiówã ĩ míic wáacat mūdíh bóo maáhdih teonit, Galión ã enepdih caandíh ĩt puñap wut jĩ. Páant ĩ puñuchah enna yuhna, Galión ãt enah bojop wut jĩ.

Pablo Antioquía tútchina ã jwúub bejat

18 Páant ì níj naóh yacat túttimah, Pablo Corinto tútchiboó maatápdih jumniji “Wã bejna caá”, niijnít, Jesúíhwãdih át cádah bejep wut jĩ. Páant níj péa bejna, Aquila Priscilajĩh Siria baácna chúuh bejat túut niijná, Cencrea wūt jumni jēlitdih ìt páud dei bejep wut jĩ. Pánihna, jãáj chóodih ì waadát pínah jãtih, judíowã ìpĩ chãjat pah, Pablo Diosdih ã naáwátjidih péanit, át jwúub waó bojat túutap wut jĩ.*

19 Pánih boja péanit, queét Éfeso tútchina ìt chúuh bejep wut jĩ. Caanná chúuh juibínit, Aquila Prisciladihbūt Pablo át cádahap wut jĩ. Pánih cádahnit, judíowã ì míc wáacat munná át bejep wut jĩ. Caanná juibínit, míc wáacnit judíowãjĩh ded pah Jesús ã jumatdih át míc wéhenap wut jĩ.

20 Páant ì míc wéheat túttimah, caandih ìjeéh ìt chãwát túutap wut yuh jĩ. Obohjeéhtih, “Ñijeéh wã jéih chãocán caá.

21 Dios ã náahachah, wã jwúub jãóhbiḡna caá”, queétdih Pablo át niijíp wut jĩ.

Páant níj péanit, Éfeso tútchimant át chúuh bejep wut jĩ.

22 Pánihna, Cesarea tútchina chúuh juibí, aab béj, Jerusalén tútchina át aáb juibínap wut jĩ. Caanná aáb juibínit, caanjĩh moón Jesúíhwã míc wáacnitdih ded pah ã chãjatjidih naóhnitjeh, Antioquía tútchina át yap bejep wut jĩ.

23 Pánihna, maatápdih caanjĩh jumniji Galacia baácdih, Frigia baácdih át jwúub jib bejep wut jĩ, páant muntih. Caán baácnadih moón Jesúíhwãdih ã

* 18:18 Nm 6.18

jwúb bohénachah, chah Jesúsdih ït túi jenah joyóp wut jĩ.

Apolos Éfeso tútchidih moondíh Dios naáwátdih ã bohéát

²⁴ Pablo Galacia baácdih, Frigia baácdihbut ã bohé jibichah, Apolos wut jamniboó, judío cãac Alejandría tútchidih bóo, Éfeso tútchina át juibínap wut jĩ. Caán Apolos túi naóhni jamna, Dios naáwátdih jon jãtih moón ï daacátjidih túi jéihnibut át jamap wut jĩ.

²⁵ Biíh caandíh Jesúh túini doonádihbut át bohénap wut jĩ. Pánihna, búdí weñatjĩh caán doonádih át túi bohénap wut yuh jĩ. Obohjeéhtih, Juanji ã daabaátdihjeh át jéihyep wut jĩ.

²⁶ Judíowã ï míc wáacat muná Apolos umcanjeh, queétdih át bohé jwíhip wut yuh jĩ. Obohjeéhtih, ã túi jéih beedácah enna, caandíh bohéát túut niijná, Priscila, Aquilajĩh Apolosdih ïih muná ït numah bejep wut jĩ.

²⁷ Páant ï túi bohéát túttimah, “Acaya baácna bejat túut”, Apolos ã niijíchah joinít, Jesúhwã caandíh “Ma túi bejeé”, niijnít, ï daácni náodihbut ït wuhap wut jĩ, Acaya baácdih moón Jesúhwã caandíh ï túi wëi jwááat pínah niijná. Pánihna, Apolos caanná juibínit, caán baácdih moón Dios ã oyatjĩh Jesúsdih jepahnitjidih át bohé teo wáacap wut jĩ.

²⁸ Caán tútchidih moón judíowãdih nin pah ãpĩ niij naáwáp wut jĩ: “Jesús tigaá Dios ã wahni, jwiít jwĩpĩ pãini”, cãacwã ï enepdih át niijíp wut jĩ. Pánihna, Dios naáwátdih jon jãtih ï daacátjidih ã túi naáwáchah joinít, “Yoobópdih nihcan caá”, ït jéih

niijcáp wut jĩ. Pánih naóhna, Jesúíhwãdih Apolos chah ãt jwáub teo wáacap wut jĩ.

19

Pablo Éfeso tútchina ã bejat

¹ Corinto tútchidih Apolos ã jumachah, Pabloboó Frigia baácdih jumniiji jeé yoób púud dei bej, Éfeso tútchina ãt juibínap wut jĩ. Caanná juibínit, biquína ã jéih jwuhcannit Jesúíhwãdih ãt jwãáap wut jĩ.

² Queétdih jwãáhnit, nin pah ãt niij úbh joyóp wut jĩ:

—¿Jesúsdih ñi jáap jepahachah, Túini Espiritu yeebdih ã waadnít jĩ? ãt niijíp wut jĩ.

—Túini Espiritu ã jumatdih jwiútdih ñ naóhcan jĩ, ãt niij jepahap wut jĩ.

³ —¿Túini doonádih yeéb ñi jepahachah, ded pah tií yeebdih ñ nih chãj daabá? Pablo queétdih ãt niij úbh joyóp wut jĩ.

—Juan Daabáni ã naáwátdih ñ jepahachah, ã daabáátji pah jwiútdih ñ daabánap jĩ, ãt niij jepahap wut jĩ.

⁴ —Cãacwã ñ yéejatdih ñ yohochah ennit, queétdih Juan ãt daabánap wut jĩ. Pánih daabána, ñ yéejat yohat júutna ñ chãjap wut jĩ. Obohjeéhtih, Juan cãacwãdih nin pah ãpĩ niij naáwáp wut jĩ. ‘Wã túttimah jũóhmidih ñi túi jepahaá’, ãt niijíp wut jĩ. Páant niijná, Jesúsdih niijná ãt chãjap wut jĩ, Pablo ãt niij naáwáp wut jĩ.*

⁵ Páant ã niijíchah joinít, Jesús ã wēpatjĩh queét ãt daabáát túutap wut jĩ.

* **19:4** Mt 3.11; Mr 1.4,7-8; Lc 3.4,16; Jn 1.26-27

⁶ Pánih daabánitdih Pablo ã teo jãha ʉábúchah, Túini Espíritu queétdih ãt waadáp wʉt jĩ. Páant ã waadáchah, mácah wéheatjĩh Diosdih wēi naóhni, ã naáwátidibʉt ĩt naóh yapanap wʉt jĩ.

⁷ Queéet nihát doce neoná ĩt jumʉp wʉt jĩ.

⁸ Queétdih naáwát túttimah, Pablo judíowã ĩ míc wáacat mʉnã waadnít, ãt bohénap wʉt jĩ. Biíc peihcanni widh pohba Éfeso tútchiboó chooát yeó jáap jumát pah ʉumcanjeh, Dios maáh ã jumátidih naóhna ãt chãjap wʉt jĩ. Páant ã naáwáchah joinít, “Ã naáwát yoobópdi caá”, ĩt míc niijíp wʉt jĩ.

⁹ Obohjeéhtih, bitaboó joíhcan, cãacwã ĩ enechah, Jesúh doonádih ĩt yéej naáwáp wʉt jĩ. Páant ĩ yéej naáwáchah joinít, judíowã ĩ míc wáacat mʉmánt Pabloboó Jesúhwãdih nʉmah bac bejnit, Tirano wãt jumniíh mʉnã ĩt bejep wʉt jĩ. Pánihna, caán mʉdíh yeó jáap jumát pah Jesúh doonádih ãpĩ bohénap wʉt jĩ.

¹⁰ Chéne jópchi caanjĩh ãt bohénap wʉt jĩ. Páant ã bohénachah, nihát Asia baácđih moón judíowã, judíowã nihcannitbʉt jwĩ Maáh Jesúh táini doonádih ĩt joyóp wʉt jĩ.

¹¹ Dios ã wēpatjĩh jwiít cãacwã jwĩ jéih chãjca naáhdih chãjnit, Pablo dawá láa wʉnnitdih ãt booa júʉʉp wʉt jĩ.

¹² Dios ã wēpat caandíh búdí ã jumuchah, ãih bácahdih cãacwã ĩ chũúani chóonadih ʉb bejnit, wʉnnitdih ĩ cáagachah, ĩpĩ boonap wʉt jĩ. Ded nemép jumnidih caán chóojĩh ĩ cáagachah, nemépwãboó ĩpĩ bac bejep wʉt jĩ.

¹³ Obohjeéhtih, bita judíowã jióhniitboó jibnit, nemépwãdih ĩpĩ bacanap wʉt jĩ. Pánihna, Pablo ded

pah ã chãjatdih ennitji nemépwãdih bacaíhna, nin pah ítih niíj wutur wut yah jĩ: “Pablo ã bohéni Jesús ã wēpatjĩh yeebdíh jwĩ wutna caá. Ñi bac bejeé nin newémant”, ĩpĩ niijíp wut jĩ.

14 Esceva wãt jumni, siete ã wehboó páant ĩt chãjap wut jĩ. ĩ ĩip judíowã sacerdotewã ĩ maátajeéh jumni ãt jumur wut jĩ.

15 Pánihna, ã weh nemépdih ĩ bacaat déedih, nemépboó nin pah queétdih ãt niijíp wut jĩ: “Jesúsdiwã wã jéihna caá. Pablodihbut wã jéihna caá. Obohjeéhtih, yeébbodíh wã jéihcan caá”, ãt niijíp wut jĩ.

16 Páant niijnítjeh, nemépjumniiboó ñaáp jũóhni, queétdih ãt teo puñur wut jĩ. Páant ã puñuchah, yégueh wihcannit, yahwítna jumnit, caán mummánt queét ĩt ñáo bac peét bejep wut jĩ.

17 Páant ĩ yapachah, nihat Éfeso tútchidih moón, judíowã, judíowã nihcannitbut caán doonádih joinít, búdí ĩt úmur wut jĩ. “Jesús ã wēpat búdí caá”, nihat cãacwã ĩt míic niijíp wut jĩ.

18 Dawá Jesúsdiwã jepahnitji, nihat cãacwã ĩ enechah, ĩ yéej chãjatjidih Diosdiwã ĩt naáwáp wut jĩ.

19 Queét cãtíh dawá jióhni ĩt jumur wut jĩ. Pánihna, jióhna ĩ enat papélah quiítnajidih caanná ab jũóhni, cãacwã ĩ enechah, ĩt cáo yohop wut jĩ. Caán quiítnaji ã jíib jummatdih ĩ jenah enechah, cincuenta mil yeó jáapna tewat jíib pah bóo ãt jíib jumur wut jĩ.

20 Páant ĩ chãjat doonádih joinít, chah dawá Jesúh doonádih jepahnit, ĩt téi túut numur wut jĩ.

21 Túttimah, Pablo nin pah ãt niíj jenah joyóp wut yah jĩ: “Macedonia baácna jubí yap bej, Acaya

baácna j̄aibínit, Jerusalén tútchina wã jwúb be-
j̄bipna caá. Caanná j̄aibíniji Roma tútchina enedih
wã bejbipna caá”, ãt niúj jenah joyóp wut j̄i.

22 Pánihna, Timoteo, Erasto w̄t j̄umnij̄ih caandih
teo wáacnitdih Macedonia baácna ãtát wah
waáwá bojop wut j̄i. Pánih wah boj péanit, Pablo
maátcanjeh Asia baácboó, Éfeso tútchidih biícjeh ãt
chão jwúh̄w̄p wut j̄i.

Éfeso tútchidih moón ĩ j̄ũih ñaacát

23 Pablo Éfeso tútchidih ã j̄um̄achah, caán
tútchidih moón Jesúih doonádih náahcan, Pablodih
ĩt j̄ũih̄w̄p wut j̄i.

24 Demetrio w̄t j̄um̄ni, ĩih dios wili Artemisa
w̄t j̄umnihíh botoni m̄w̄ dáhnadih plataj̄ih ãp̄i
chãjap wut j̄i. Bitabut biíc yoobó teonit, ĩ j̄iib chãj
wãhna, búdi ĩp̄i j̄iib tewep wut j̄i.

25 Demetrio queédih bid wáacnit, nin pah
queédih ãt niij̄ip wut j̄i: “Ñi joyoó. Nin tewatj̄ih
búdi jwĩ j̄iib tewatdih ñi jéhna caá.

26 Obohjeéhtih, nin Pablo ã bohénachah, jwíútdih
ã tobohna caá. ‘Dioswã déedih cãacwã ĩ p̄ãpnidih
báadhni nihcan caá’, ãp̄i niúj bohéna caá. Páant
ã niij̄ichah joinít, dawá Éfeso tútchidih moón, ni-
hat Asia baác dih moonbút ã bohéatdih ‘Yoobóp dih
tigaá’, ĩ niijná caá.

27 Páant niijná, jwĩ tewatdih cãacwã yeejép
ĩ wéhebpna caá. Jwĩih dios wili Artemisaĩh
m̄w̄díh̄but ĩ yohbipna caá. Pánihna, nihat Asia
baác dih moón, nihat baác nadih moonbút caántdih
wēi w̄b̄h̄nit̄ji ĩ cádahbipna caá”, Demetrio queédih
ãt niij̄ip wut j̄i.

28 Páant ã niijíchah joinít, queétbat íjnit, ít jũih ñaac ñuhup wut jĩ: “Artemisa, jwiít Éfeso tútchidih moónih dios wili wēpép wili mi jumna caá”, ít niij jũih ñaacáp wut jĩ.

29 Pánihna, nihat Éfeso tútchidih moonbút íjna, biíc yoobó ít niij ñaacáp wut jĩ. Pánih íjnit, Gayodih, Aristarco wūt jumnidihbat teonit, cãacwã ï míc wáacáp júduna queétdih ít wái bejep wut jĩ. Gayo, Aristarcojĩh Macedonia baácdih moón Pablo ã pej jum jibnit ít jumup wut jĩ.

30 Pablo queét cãacwãdih wéhenadih ã bejihichah yuhna, Jesúíhwāboó caandih ít wahcap wut jĩ.

31 Bita caán baácdih moón ï maáta Pablo ã chéenwābat ã bejcat pínah niijná dooná ít wahap wut jĩ. “Cãacwã ï míc wáacapoó ã bejca bojo naáh”, Pablodih ít niij naáwát tútup wut jĩ.

32 Dawá caanjĩh míc wáac junít biíc dih “¿Dépanih tigaá jwiít míc mawat tút jwĩ chãj?” ít niij jenah joicáp wut jĩ. Queét tabit ñaacnit, ít jũih yapanap wut jĩ. Biquína mácah ít jũih ñaacáp wut jĩ. Bitabat mácah ít jũih ñaacáp wut jĩ.

33 Biquína judíowã Alejandro wūt jumnidih cãacwãdih ít naáwát tútup wut jĩ. Pánihna, Pablowã ded pah ï chãjatdih ã yoób naáwát tút niijná, Alejandro “Laihca bojoó”, niijná, ãih téihyajĩh jútnit, át yayát tútup wut yuh jĩ.

34 Obohjeéhtih, caán judío ã jumuchah ennit, nihat cãacwã chah íjnit, biíc yoobó chéne horas pohba ít ñaac jũih ñuhup wut jĩ: “Artemisa, jwiít Éfeso tútchidih moónih dios wili wēpép wili mi jumna caá”, ít niij ñaacáp wut jĩ.

35 Páant ï niij ñaac jũihñuchah ennit, Éfeso

tútchidih moón maátadih teo wáacniboó, “Laihca bojoó” niijnít, nin pah át níj naáwáp wut jĩ: “Wã déewãá, yeéb Éfeso tútchidih moón, ñi joyoó. Jwĩih chah wēpép dios wili Artemisaíh m̃uudíh wapnit jwiit jwĩ jumatdih nihat baácdih moón ĩ jéihna caá. Jeámant caánt pah jíghni buúg jéen jũóhndih en daonít jwĩ jumuchahbut ĩ jéihna caá.

³⁶ Bita ‘Nin yoobópdih nihcan caá’, ĩ jéih niijcán caá. Pánihna, ñi míc jũih cádaahaá. Túinijeh ñi joyoó.

³⁷ Nit yeéb teo jũóhnt jwĩih dios wilidih yeejép níj wéhecan, miíh m̃uudíh waad béjnit, ĩ ñumcáp be. Pánihna, ñi túi chãjaá.

³⁸ Demetrio, platajĩh teonit biícdih naóh yaquíhna, peéh chãjat túutnitboodíh naóh yacadih ĩ beje naáh.

³⁹ Jwũub míc wáacna, túinijeh ñi míc wáacáp, buca. Yeéb buu ñi chãjatji pah ñi jwũub chãjca bojoó.

⁴⁰ Buu yeéb ñi míc jũih ñaacátidih jwĩ maáta joinít, ‘Jwiítidih ĩ yohbipna caá’, ĩ níj jenah joiná nacaá. Pánihna, yeéb ñi níj ñaac jũih ñuhatjidih queétdih túinijeh jwĩ jéih naóhcan níit”, maátadih teo wáacniboó queétdih át niijíp wut jĩ.

⁴¹ Páant níj naóh péanit, “Páant bóojeh tigaá. Ñi bejeé”, át niijíp wut jĩ.

20

Macedonia baác, Grecia baácnabut Pablo ã juibíát

¹ Páant ĩ jũih ñaac yayát túttimah, Pabloboó Jesúihwádih bid wáacnit, át jwũub bohénap wut jĩ, Jesúsdihi ĩ cádahcat pínah niijná. Pánih bohé péanit, “Wã bejna caá”, niijnít, Macedonia baácna bejna, queétdih át cádah bejep wut jĩ.

² Caanná juibínit, Dios naáwátdih táoh naóh bohénit, caanjĩh moón Jesúíhwādhĩh át weñanap wut jĩ. Queétdih Dios naáwátdih táoh naóh bejna, Grecia baácna át juibínap wut jĩ.

³ Pánih juibínit, caán baácđih biíc peihcanni widh át chāo jwúhup wut jĩ. Caanjĩh jumna, Siria baácna át jwúub chúuh jũúwíhip wut jĩ. Obohjeéhtih, judíowā caandĩh tewíhat doonádhĩh át joyóp wut jĩ. Caán doonádhĩh joinít, Pablowā Macedonia baácboó bejni namádhĩh jwúub aáb bejnit, Filipos tátchina ĩt páud dei juyúp wut jĩ.

⁴ Páant ã jũúwúchah, Berea tátchidih bóo, Sópater wāt jumni Pablodih át pej jum jũúwáp wut jĩ. Sópater Pirro wūúh át jumup wut jĩ. Tesalónica tátchidih moón Aristarco, Segundobat, Asia baácđih moón Tíquico, Trófimobat, Derbe tátchidih moón Gayo, Timoteobat caandĩh ĩt pej jum jũúwáp wut jĩ. Filipos tátchina ĩ jwúub juyúchah, weém Lucasbat Pablowādhĩh wā jwúub pej jumup jĩ.

⁵ Pánihna, caandĩh pej jum jainítji, Troas wāt jumni tátchina ĩ waóh bej páñap jĩ.

⁶ Páant ĩ bej páñachah, paacánni pandih jwĩ jeémát táttimah, jwiítboó Pabljĩh Filipos tátchidih jumnitji, johlitjĩh bejni jāáj chóodih waadnit, Troas tátchina jwĩ chúuh bejep jĩ. Pánih chúuh bejnit, cinco yeó jáap táttimah, caán tátchina chúuh juibínit, queét waóh bej pānitjidih jwĩ jwāáap jĩ. Pánih chúuh juibí jwāáhnit, siete yeó jáap caanná jwĩ jum jwuhup jĩ.

Troas tátchidih moondĩh Pablo ã naáwát

⁷ Troas tátchidih jumna, domingo yeó jáapđih Jesúih cāacwā míic wáac jainít, Jesús ã wñatjidih

jwĩ náhni jeémátdih jwĩ jeémát pínah jãtih, Pablo queétdih Dios naáwátdih ã bohénap jĩ. Pánihna, Pablo ã pée naáwát chei, maatápdih ã naáwáp jĩ, púú chei tac yoob póhba.

⁸ Dawá jiiátna jumni chah bóo tólihboó jwĩ míc wáacap jĩ.

⁹ Pablo ã naáwáchah joinít, jáap behni, Eutico wüt jumni, enat jëcdih bóo naadíh ã púuh laáb chúudup jĩ. Pablo jwiútdih maatápdih Dios naáwátdih ã bohénachah, Euticodih quíib chei ãt jëóhjiip taga. Pánihna, biíc peihcanni tólih chah caán ño chúudni ãt pud jéen bejep jĩ. ã pud jéen bejehah ennit, jãtih dei bejnitboó wunnidih ĩ wái ñahanap jĩ.

¹⁰ Pablo ĩ túttimah pée dei bejnit, caandíh ã juibí ub túuhup jĩ. Pánih ub túuhnít, nin pah queétdih ã niijíp jĩ:

—Ñi jĩgahca bojoó. ã báadhna caá, ã niijíp jĩ.

¹¹⁻¹² Páant ã niijíchahjeh, wunniji ã jwúub boonap jĩ. ã jwúub boonachah ennit, queétboó búdí ĩ weñep jĩ. Pánih wëinit, chah bóo tólihna jwúub púuh laab béjnit, Jesús ã wunatjidih jwĩ náhni jeémátdih jwĩ jeémép jĩ, buca. Páant jwĩ jeémp péanachah, maatápdih Pablo queétdih jwúub bohénajeh, ã daa peetéj jĩ. Páant ã bohé péaat túttimah, jwiútdih jwĩ bejep jĩ.

Pablo Troas tútchidih jumniiji bejnit, Mileto tútchina ã juibíát

¹³ Troas tútchidih jumnit, Pablo jãtih jwiútdih Aso tútchina johlitjĩh bejni jááj chóojĩh ã chúuh bej páñat túutup jĩ. Pabloboó namámant ã bejihip jĩ. Pánihna, Pablo ã niijátji pahjeh Aso tútchina caandíh jwĩ jwááap jĩ.

14 Caandih jwĩ jwãááchah, jwĩ bejni jãáj chóodih jwĩjeéh ã waadáp jĩ. Pánihna, caán chóojĩh cháuh bejnit, Mitilene tátchina jwĩ cháuh juibínap jĩ.

15 Caán tátchidih juibí yap bej, biih yeó jáapdih Quío quewadih jwĩ yap bejep jĩ. Pánih yap bejnit, táttimah bóo yeó jáapdih Samos quewadih páantjeh jwĩ en yap bejep jĩ. Pánih yap bejnit, Trogilio wāt jumni tátchidih ãonitji biih yeó jáap Mileto tátchina jwĩ cháuh juibínap jĩ.

16 Pablo Pentecostés yeó jáapnadih Jerusalén tátchina juibíhna, Asia baácdih maatápdih ã jumíhcap jĩ. Pánihna, Éfeso tátchidih yoobópdih yap bejnit, Mileto tátchina jwĩ juibínap jĩ.

Pablo Éfeso tátchidih moón Jesúíhwã maátadih ã naáwát

17 Mileto tátchina jwĩ juibínachah, Pablo Éfeso tátchidih moón Jesúíhwã maátadih ã bid bojop jĩ.

18 Páant ã bid bojniti jwĩ pebhna ĩ juyúchah, Pablo queétdih nin pah ã niij naáwáp jĩ: “Asia baácdih jumna, ded pah wã chãjatjidih yeebjéh ñi jéihna caá.

19 Ñijeéh jumna, dedé biih pah bóo niiját wihcan, jwĩ Maáh Jesúíh táini doonádih wã naáwáp jĩ. Yeéb Jesúsdi h chah ñi jéihyat pínah niijná, wã jũí naáwáp jĩ. ‘Yeéb chah wã jéihna caá’, wã niijcáp jĩ. Wã déewã weemdih ĩ yéj chãjachah yuhna, Dios ã wēpatjĩh wãpĩ naóh bohénap jĩ.

20 Yeéb Jesúsdi h chah ñi túi péeat pínah niijná, yeebdih Dios naáwátdih wã naóh beedánap jĩ. Cãacwã ĩ enechah, ñíih munáboobút yeebdih wã bohénap jĩ.

21 Judíowãdih, judíowã nihcannitdihbut biíc yoobó Dios naáwátdih wã wěp bohénap jĩ. ‘Ñi yéej chãjatdih cádahnit, jwĩ Maáh Jesúsdih ñi táí jenah joyoó’, wãpĩ niij naáwáp jĩ.

22 Pánihna, bũ Túini Espíritu ã wutat pahjeh tih Jerusalén tútchina bejna caá wã chãjap. Caanná jwibínit, ded pah wã yapat pínahdih wã jéihcan caá.

23 Obohjeéhtih, tútchi jummat pah Túini Espíritu weemdíh nin pah ã niij jéihyanap be: ‘Jerusalén tútchiboó jumnit, meém yeejép ma yapbipna caá. Meemdíh nemat mũúboó ĩ nembipna caá’, ã niijíp be.

24 Obohjeéhtih, túini dooná, Dios ã oyat doonádih jwĩ Maáh Jesús weemdíh ã naáwát túutap jĩ. Páant ã wutatjidih wã teo péa jwuhbipna caá. Caandíh wã teo péa beedánit, wã wunat pínahdih wã úmcan caá.*

25 “Pánihna, ñijeéh jumna, Jesús maáh ã jummatdih wãpĩ naáwáp jĩ. Obohjeéhtih, chéneji jwĩ jwúub míic encat pínahdih wã jéihna caá.

26-27 Pánih jéihna, bũ nin pah yeebdíh wã naóhna caá: Nihat Dios naáwátdih yeebdíh wã táí naóh beedánap jĩ. Pánihna, ñijeéh moón Dios naáwátdih náahcannit ĩ jumuchah, weémboodíh peéh chãjat ã wihcan níit.

28 Yeebjéh ñi táí jenah joyoó. Jesúíhwã Túini Espíritu yeebdíh ã en daawát túutnitdih ñi táí en dawaá. Ovejawãdih en daonít ĩ en dawát pah Jesúíhwãdihbut yeéb ñi táí en dawaá. Dios wũúh wũnna, ãih meépjĩh queédih ãihwã pínah át jíib chãjjip taga.

* 20:24 2Ti 4.7

29 Weém ninjĩh wã bejat túttimah, jiwã ovejawãdih ĩ mawat pah, bita yeejépwãboó Jesúíhwãdih yéjanadih ĩ jũóhbipna caá. Pánihna, queét Jesúíhwãdih ñi túi en dawaá.

30 Túttimah, bita ñijeéh jumnitboó ‘Jesúíhwã jwĩ jumna caá’, niijná yahna, queétboodih ĩ péeat pínah niijná, bita Jesúíhwãdih yeenit, biih naáwãtdih ĩ joyát túutbipna caá.

31 Pánihna, ĩñi túi chãja chaáh! Yeó jáap jummat pah, chei jummat pahbut jũinít, biíc peihcanni jópchi pohba, Dios naáwãtdih yeéb nihatdih, wã wẽp bohénap jĩ. Caandih ñi túi náhninaá.

32 “Bũũ jwũh bejna, ‘Paá, queétdih ma túi en dawaá’, Diosdih wã niij úubhna caá. Ā oyatdih jenah joinít, ñi túi jumbipna caá. Dios naáwát wẽpép caá. Pánihna, caandih yeó jáap jummat pah ñi jepahachah, yeebdih ã teo wáacbipna caá. Pánih jepahnit, Dios pebhboó nihat ã ñionit biíc dih ãjeéh ñi jumbipna caá.

33 Ñijeéh jumna, ñíih dinerodih, ñíih yéguehdihbut wĩih pínah wãpĩ úubhcap jĩ.

34 Obohjeéhtih, weemjéh teonit, wĩih pínahdih wã jíib chãjap jĩ. Pánihna, wã náahatdih, wãjeéh jumnit ĩ náahatdihbut wã tewat jíibjĩh wãpĩ jíib chãjap jĩ. Páant wã chãjatjidih ñi jéihna caá.

35 Maatãpdih ñijeéh jumna, búdí wã tewechah, ñi enep jĩ. Pánih ennitji moh yéejnitdih teo wáacat túut niijná, yeebút biíc yoobó ñi chãjaá. Jwĩ Maáh Jesús nin pah ã niijátjidih ñi túi náhninaá: **‘Ded biíhdih teo wáacna, chah búdí ã wẽibipna caá. Obohjeéhtih, ãihdihjeh ubna, nump ã wẽibipna caá’**, ãt niijíp wat jĩ”, Pablo Éfeso tútchidih moón Jesúíhwã

ĩ maátadĩh ã niijíp jĩ.

³⁶ Páant niij péanit, Pablo queét biícđih bódicha caj yoh ñajnit, Diosđih ĩ ʘúbáp jĩ.

³⁷ Páant ĩ ʘúbh péanachah, queét nihat Pablodih oina, pin teonit, jǎinít, ãih páo tíbđih ĩ nomop jĩ.

³⁸ “Yeebđih chéneji wā encan niit”, ã niijíchah joinít, queét bádí ĩ jǐgahap jĩ. Pánihna, caán jǐlitna jwĩ dei bejchah, jwĩjeéh queét nihat ĩ pée dei bejep jĩ.

21

Pablo Jerusalén tátchina ã jwúb bejat

¹ Mileto tátchimant bejna, Jesúíhwā maáta Éfeso tátchimant jǎinítjđih “Jwĩ bejna caá”, niijnít, johlitjĩh bejni jǎáj chóodih waadnít, Cos wāt jumni quewaboó jwĩ chúbh jǎibínap jĩ. Pánih jǎibínitji daanimant bóo yeó jáapđih Rodas wāt jumni quewadih chúbh jǎibí, yap bejnit, Pátara wāt jumni tátchđih jwĩ jǎibínap jĩ.

² Pátara tátchđih jǎibínitji Fenicia baácboó bejni pínah jǎáj chóodih jwĩ bid juyúp jĩ. Pánihna, caán chóodih waadnít, caanná jwĩ bejep jĩ.

³ Pánih bejna, Chipre wāt jumni quewa wáyámant bóo bʘwámant ã jǐgohochah, en yap bejnit, Siria baácđih Tiro wāt jumni tátchina jwĩ chúbh jǎibínap jĩ. Pánih chúbh jǎibínit, bií déedih ĩ ʘb aabánachah, caanjĩh jwĩ chǎo jwúbhap jĩ.

⁴ Páant ĩ aabáát pónih, jwiítboó tátchi tacna bejnit, Jesúíhwāđih jwĩ jwǎáap jĩ. Pánih jwǎáhnit, biíc semana ĩjeéh jwĩ chǎo jwúbhap jĩ. Pablo ded pah Jerusalén tátchiboó ã yapat pínahđih Túini Espíritu

queétdih át jéihyanap tajī. Pánihna, “Jerusalénna ma bejca bojoó”, caandíh ĩ niijíp yah jī.

⁵ Obohjeéhtih, queétdih jepahcan, jwī bejat pínah yeó jáapdih tútchimant jwī jwúub dei bejep jī, páant mantih. Nihat Jesúíhwā, ĩ weha mána yaádhjīh, ĩ wehjīhbat jwiít dih bádí muj jwěejdih bóo jélit óon coahna ĩ pej jam dei bejep jī. Pánihna, nihat óon jamapboó dei juibínit, bódicha caj yoh ñajnit, Diosdih biíc dih jwī úúbáp jī.

⁶ Pánih úúbh péanit, “Jwī bejna caá”, niijnít, queétdih pin teo péanit, jwī júóhniji jááj chóodihjeh mantih jwī jwúub waadáp jī. Jwī jwúub waadáchah en péanit, Jesúíhwā ĩih munná ĩ jwúub aab béjep jī.

⁷ Pánihna, Tiro tútchimant bej, Tolemaida wút jamni tútchina jwī chúuh juibínap jī. Caanná chúuh juibínit, Jesúíhwādih jwāáhnit, muj teo, biíc yeó jáap ĩjeéh jwī chāo jwúuhap jī.

⁸ Cheibit caán tútchimant bej, Cesarea tútchina aab juibínit, Felipe pebhboó jwī juibínap jī. Caán Felipe Jesúíh táini doonádih wēp naóhni ā jamap jī. Jerusalén tútchiboó Jesús ā naáwát tútnitdih teo wáacnit pínah siete neonádih ĩ ñío láa, Felipedihbat ĩt ñíwip wut jī.*

⁹ Ā weh yatá chéneña míic yaádh, áa wihcannit, Dios naáwát dih naóh yapanit ĩt jamap jī.

¹⁰ ĩjeéh daocánni yeó jáap jwī jam jwuhuchah, Agaboboó Judea baácmant júóhni ā dei juyáp jī.*

¹¹ Pánihna, jwī pebhna juinít, Pabloíh juyáát tōpdih ubnit, caan tōpjīh āih téihya āih jítchadihbat ā míic chéwep jī.

* 21:8 Hch 6.5; 8.5 * 21:10 Hch 11.28

—Nin pah Táini Espíritu ã niijná caá: ‘Jerusalén tútchidih moón judíowã nin juyáát tōp mínahdih ĩ chéobipna caá. Pánih chéonit, judío nihcannitdih caandih ĩ wāhbiipna caá’, ã niijná caá, Agabo ã niijíp jĩ.

¹² Páant ã niijíchah joinít, “Jerusalén tútchina ma bejca bojóó”, jwiít nihat Pablodih jwĩ wēp niijíp yuh jĩ.

¹³ Obohjeéhtih, Pabloboó jwiítidih nin pah ã niijíp jĩ:

—¿Dépanih tigaá ñi jūí? Weemdih ñi jĩgahaca bojóó. Jesúih túini doonádih wã naáwát jíib nemat mūúboó ĩ nemíhna, ĩ neme naáh. Weemdih ĩ mawíhnaabut, ĩ mawa naáh. Weémboó wã úamcan caá, ã niijíp jĩ.

¹⁴ Páant jwĩ naáwáchah yuhna, Pablo ã jepahcah ennit, jwĩ cádahap jĩ.

—Dios ã náahatdihjeh ã chāja naáh, jwĩ niijíp jĩ.

¹⁵ Túttimah, jwĩih bií déedih jwáub ámoh péanit, Jerusalén tútchina jwĩ aab béjep jĩ.

¹⁶ Bitá Cesarea tútchidih moón Jesúihwābut jwiítidih pej jum bejnit, Mnasón wāt jumni pebhna jwiítidih ĩ numah juibínap jĩ. Mnasón Chipre quewadih bóo jonjeh Jesúsdih jepahni át jumap wat jĩ. Pánihna, ã pebh jwĩ jumap jĩ.

Pablo Santiagodih enedih ã bejat

¹⁷ Jerusalén tútchina jwĩ juibínachah, Jesúihwā wēinit, jwiítidih ĩ jwāáh maj tewep jĩ.

¹⁸ Biíh yeó jáap Santiago pebhna Pablojĩh enedih jwĩ bejep jĩ. Nihat Jesúihwādih waóhnit ã pebh juibínit, ĩt páñap tajĩ.

19 Pánihna, Pablodih ï mʉj teo péanachah, judíowã nihcannitjeéh jʉm láa, Dios caandíh ded pah ã chãjat tútatjidih Pablo queétdih ã naóh beedánap jĩ.

20 Páant ã naáwáchah joinít, nihat bíícdih Diosdih búdí ï weñep jĩ. Túttimah, Pablodih nin pah ï niíj naáwáp jĩ:

—Jwĩ dée Pablo, ma joyoó. Dawá judíowãboó Jesúsdih táí jepahnit, Moisés ã wʉtatjidih páantjeh nihat ï jepahna caá.

21 Pánihna, bita nih yáanit, nin pah queétdih ït niíj naáwáp wʉt be. ‘Pablo judíowãdih bohéna, Moisés ã wʉtatjidih ãt jepahat tútcap wʉt be. Judíowãdih ï wehdih quehli nah yapat chóodih ãt bóodat tútcap wʉt be. Jwĩ nʉowãji ded pah ï chãjatjidih ãt chãjat tútcap wʉt be’, ït niijíp wʉt be.

22 Queét judíowã Jesúsdih jepahnit ninjĩh ma jʉyát doonádih ï joimí nacaá. ¿Pánihna, queét ï íjcat pínah niijná, ded pah tigaá jwĩ chãjbi?

23 Nin pah ma chãjaá: Jwĩjeéh moón chénena míic Jesúsíhwã ‘Nin pah wã chãjbipna caá’, Diosdih ït niijíp wʉt jĩ. Obohjeéhtih, páant niijnítji ï péa jwʉhcan caá.

24 Pánihna, queétdih nʉmah bejnit, Moisés ã wʉtatji pah ma chãjaá, ‘Queét túnit caá bʉca’, Dios ã niiját pínah niijná. Moisés ã wʉtatji pah, ï niiját péaat jútat pínah niijná, ï waó bojat pínah jíib meémboó ma jíib chãjaá. Meém páant ma chãjachah ennit, ‘Jwĩ joiní dooná yoobópdih ãt nihcan tagaá’, jwĩ déewã ï niíj jéihbipna caá. Páant niijnít, Moisés ã wʉtatjidih ma táí jepahatdih queétjeh ï jéihbipna

caá.*

²⁵ Obohjeéhtih, judíowã nihcannit Jesúíhwãboodíh ï jéihyat pínah niijná, jwiítjeh jwĩ jenah joyát dih jáantjeh nin pah queétdih jwĩ niíj daác wahap jĩ: ‘Pãpnidih wãhniiji jeémátdih ñi jeémpca bojoó. Meépdihbut ñi babhca bojoó. Nuñápwãdih jõp teonit maonidih ñi jeémpca bojoó. Ñi áa nihcannitjĩh ñi yéej chãjca bojoó’, queétdih jwĩ niijíp jĩ, Pablodih Jesúíhwã maáta ï niijíp jĩ.*

Dioíh muú díitna Pablodih ï tewat

²⁶ Páant ï niijíchah joinít, Pablo cheibit queét chénena míic neonádih numah bejnit, “Queét táinit caá”, Dios ã niiját pínah niijná, Moisés ã wutatjidih ï chãjap jĩ. Pánihna, Dioíh muúná waadnít, ï péaat pínah yeó jáapdih, Diosdih ï wãhat pínah yeó jáapdihbut sacerdotewãdih ït naáwáp wut jĩ.

²⁷ Moisés ã wutatji pah siete yeó jáap ï chãjat pínahdih ï péa jũúwáchah, biquína judíowã Asia baácmant caandíh ñuún jũóhnit, Dioíh muú díitna Pablodih ït enep wut jĩ. Pánih ennit, Pablodih ï íijat pínah niijná, dawá cãacwãdih ït yee naáwáp wut jĩ. Páant ï yee naáwáchah, Pablodih íjnit, ït tewep wut jĩ.

²⁸ “Yeéb jwĩ déewáá, jwiútdih ñi teo wáac jũúwá. Nin nihat baácboó jib bohéna, jwiít judíowãdih, Moisés ã wutatjidih, nin Dioíh muúdíhbut nihat cãacwãdih yeejép ãpĩ bohéna caá. Judíowã nihcannitdih buú Dioíh muúdíh numah waadnít, nindih ã yéejana caá”, ï niíj ñaacáp jĩ.

²⁹ Jãtíh Pablo judío nihcanni Trófimo wút jamni, Éfeso tãtchidih bóodih Jerusalén tãtchidih ã numah

* 21:24 Nm 6.2-21 * 21:25 Hch 15.29

jibichah, ït enep wut jĩ. Páant ã numah jibichah ennitji “Pablo judío nihcannidih Dioíh mûú díitna ãt numah waadáp tagaá”, ït niúj jenah joijí tagaá. Obohjeéhtih, páant ï niúj jenah joyát yoobópdih nihcap jĩ.*

³⁰ Páant ï niúj ñaacáchah joinít, nihat caán tútchidih moón íjnit, ñáo waad bėj, Pablodih teonit, Dioíh mûú díitmant ït wái bac bejep wut jĩ. Páant ï wái bac bejehahjeh, jěcdih ït ñûún nemep wut jĩ.

³¹ Pánih wái bac bejnit, caandíh mao yohíhna, túbít ï ñaacát dooná Romano soldadowã ï maáhdih ãt júbínáp wut jĩ. “¡Nihat Jerusalén tútchidih moón ñaac péet bejna caá ï chãjap!” ït niújíp wut jĩ.

³² Caán doonádih joinítjeh, Pablodih pûinit pebhna áih soldadowãdih ã numah ñáo jayúp jĩ. Pánihna, queét ï jayúchah ennit, Pablodih ï pûi cádahap jĩ.

³³ Queét pebhna jûinít, soldadowã ï maáh Pablodih nemat mûúboó nemat túut niijná, chéne ïtah tōpnajĩh caandíh ã chéwat túutap jĩ. Pánih chéonit, caandíh pûinitdih nin pah ã niúj úbh joyóp jĩ: “¿Déhe tigaá nin? ¿Dedé tibeé ã chãj?” ã niújíp jĩ.

³⁴ Biquína wáac jûinít mácah jûih ñaac, bita mácah ï jûih ñaacáp jĩ. Páant ï ñaacáchah, soldadowã ï maáh ded pah ï niujátidih ãt beh joicáp wut jĩ. Pánihna, yoobópdih jéihíhna, Pablodih fih mûú díitna soldadowãdih ã úb waad béjat túutap jĩ.

³⁵ Íih mûuná ï úb pûuh laab béjehah ennit, íjna, cãacwã caandíh ï teo bid ñûún péenap jĩ. Pánihna,

* 21:29 Hch 20.4

căacwã ã jwúub dúuc wáicat pínah niijná, páantjeh ã beo púuh laab béjep jĩ.

³⁶ Páant ã bejehah, dawá queédih ñúún péenit, “¡Caandíh ñi mao yohoó! ¡Caandíh ñi mao yohoó!” ã niij ñaacáp jĩ.

“Yeejép wã chãjcap be”, Pablo ã niiját

³⁷ Pánihna, Pablodih ñih múná ã ub waad béjehahjeh, Pablo soldadowã ã maáhdih nin pah át niijíp wut jĩ:

—Weém meemdíh bainí wã naáwíhna caá, Griego wéheatjĩh át niijíp wut jĩ.

—¿Dépah meém Griego wéheatdih jéihni níit?

³⁸ ¿Meém Egipto baácdih bóo jwĩ maátadih yohíhna, căacwãdih maonitdih múú wihcapboó cuatro milwã dúó wáini nihcan níit? soldadowã ã maáh Pablodih át niij úubh joyóp wut jĩ.

³⁹ —Caán nihcan caá. Weembút judío mun tigaá. Cilicia baácdih Tarso tútchidih bóo caá. Caán tútchi oboh jumni tútchi nihcan caá. Pánihna, queét căacwãdih weemdíh ma naáwát tútú, Pablo át niijíp wut jĩ.

⁴⁰ Páant ã niijíchah joinít, Pablodih át naáwáp tútup wut jĩ. Pánihna, Pablo púuh laab béjat cáyahdih ñuhnit, ã yayát pínah niijná, ãih téihyãjĩh ã júutup jĩ. Páant ã júutuchah, ã ñaac yayáchah ennit, Pablo queédih ñih wéheatjĩh ã naáwáp jĩ.

22

¹ “Yeéb wã déewãá, yeéb behnitbat ñi joyoó. Ded pah wã chãjatji yeebdíh wã naáwát túut caá”, Pablo ã niijíp jĩ.

² Pablo ñih wéheatjñh ã naáwáchah joinít, laiñcan-jeh ñ joi ñúhup jñ. Pánihna, Pablo nin pah queétdih ã niñ naóh yoobánap jñ:

³ “Weembút judío mun tigaá. Tarso tátchidih wãt cáac jumup jñ. Obohjeéhtih, Cilicia baácdih bóo yuhna, nin Jerusalén tátchidih wã behup jñ. Nihat Dios naáwátdih, Moisés ã wutajdih, jwñ nuowã ñ naáwátjdihbut Gamaliel weemdñh ã bohénap jñ. Nihat Dios ã wutap pah, yeéb ñi chãjat pahjeh mantih, weembút wãpñ chãjap jñ.*

⁴ Pánihna, Jesúsdiñ jepahnitdiñ eníñcan, queétdih mao ñúñ péena, queétdih búdí pohba wã moh yéjanap jñ. Queétdih ñúñ teo chéonit, neoná, yaádhdiñbut nemat muúboó wãpñ nemat tútup jñ. Bitadiñbut wãpñ mao yohat tútup jñ.

⁵ Pánihna, jwñih sacerdotewã ñ maáh, nihat bita jwñ maátabut páant wã naáwát pah mantih queétdiñ biic yoobó ñ naóhbiñna caá. Queétdiñ jñ Damasco tátchidih jumnit judiowã ñ maátadiñ wã jútat pínah papélah núodiñ weemdñh ñ daác wãhup jñ. Pánihna, caán núodiñ ubnit, caánboó jumnit Jesúhwãdiñ chéonit, wã ub jwáub júwáchah, queétdiñ ñ peéh chãjat pínah niñná, Damasco tátchina jwñ bejep jñ.*

*Pablo ded pah ã tút nuumátjdih ã naáwát
(Hch 9.1-19; 26.12-18)*

⁶ “Damasco tátchina toáh juibínachah, yeó jáap tac yoób, báadhajeh wēpép yeh iigát weemdñh ã yeh iig jáhanap jñ.

* 22:3 Hch 5.34-39 * 22:5 Hch 8.3; 26.9-11

7 Caandíh en wáhi bejnit, baácboó wã bũugúp jĩ. Pánih bũugnít, wéheatdih wã joyóchah, weemdíh nin pah áí niijíp jĩ: ‘¿Saulo, Saulo! ¿Dépanih tigaá weemdíh ma mawíh ñũún péé?’ ã niijíp jĩ.

8 Páant ã niijíchah joinít, nin pah wã niij jepahap jĩ: ‘¿Maá, meém déhe tigaá?’ wã niijíp jĩ. ‘Weém Jesús Nazaret tátchidih bóo ma mawíh ñũún péeni caá’, weemdíh ã niij jepahap jĩ.

9 Wã pej jumnit caán yeh iigát dihjeh ãt enep wut jĩ. Obohjeéhtih, weemdíh ã wéheatboodíh ãt joicáp wut jĩ.

10 Pánihna, nin pah wã jwúub niij úubh joyóp jĩ: ‘¿Maá, ded pah wã chãjatdih tigaá ma náah?’ Jesús dih wã niijíp jĩ. ‘Ma ñah ñũhũú. Damasco tátchiboó ma waad béjeé. Caanjíh ma jumuchah, ded pah ma chãjat pínahdih meemdíh naóhni ma pebhna ã juibíipna caá’, Jesús weemdíh ã niijíp jĩ.

11 Pánihna, caán wěpép yeh iigát dih enni jĩ wã jéih encah, wã pej jumnit weemdíh téihyamant wáinit, Damasco tátchina ã ub bejep jĩ.

12 “Caanjíh biíc newé Ananías wut jumni ãt jumap tajĩ. Caán Diosdih túi wěi úubhni, ni-hat Moisés ã wutajidih túi chãjni, caanjíh moón judíowã caandíh ã túi wěi enni tajĩ.

13 Pánihna, wã pebhna juí ñũhñit, caán Ananías nin pah weemdíh áí niijíp jĩ. ‘Wã dée Saulo, bũu ma jwúub enbipna caá, páant mantih’, ã niijíp jĩ. Páant ã niijíchahjeh, jwúub ennit, caandíh wã enep jĩ.

14 Nin pah Ananías weemdíh ã jwúub niijíp jĩ: ‘Jwĩ nũowã ã wěini Dios ded pah meemdíh ã náah yacat pínahdih ma jéihyat pínah, Jesús túini yoobát dih ma enat pínah, caandíh ma joyát

pínahdihbut, meemdíh ãt ñíwip taga.

¹⁵ Meémoó ãih doonádih nihát cáacwãdih bohéna, ma enatjidih ma joyátjidihbut ma naóhbiþna caá.

¹⁶ Pánihna, ¿dedédih pái jwuh tigaá ma chãj? ¡Ma ñah ñuhú! Ma yéejatdih cádahnit, Jesúsdiþ jepahni þumna, ma daabáát tútú’, Ananías weemdíh ã niijíp jĩ.

Pablo judíowã nihcannitdih ã bohéatjidih ã naáwát

¹⁷ “Túttimah, nin Jerusalén tútchina jwúub þuinít, Dioih muná úbúdiþ wã bejep jĩ. Páant wã úbát pónih, jáana yuhna, oo júmat pah Jesúsdiþ wã enep jĩ.

¹⁸ Páant wã enechah, nin pah weemdíh ã niijíp jĩ: **‘Nin Jerusalén tútchidih moón wíih doonádih ma naáwáchah, i joíhcan níit. Páant i joíhcah, nin tútchimant waicanjeh ma bac bejeé’**, Jesús ã niijíp jĩ.

¹⁹ Páant ã niijíchah joiná yuhna, nin pah wã jwúub niij jepahap jĩ: ‘Maá, játih weém wã déewã i míic wáacat munádih waadníit, míhwãdih nemat muúboó nemíhna, wã mawíh ñun péeatdih nihát queétjeh i jéihna caá.

²⁰ Bitá Estebandih i mawachah, wéi ennit, maonitíh jih i dúwát chóonadiþ wã páñap jĩ. Páant wã chãjatjidih jéihnit, weemdíh yeejép i chãjcan níit’, Jesúsdiþ wã niijíp jĩ.*

²¹ **‘Weemjéh tigaá meemdíh wã wahap, yúþ bóo baácnadiþ moón judíowã nihcannitdih wíih táini doonádih ma naáwát pínah niijná. Pánihna, þu**

* **22:20** Hch 7.58

weemdíh jepahnit, ma bejeé', Jesús weemdíh ã niijíp jĩ", Pablo queét íjnitdih ã niijíp jĩ.

Pablo soldadowã ã maáhjĩh ã míc wéheat

22 Páant ã niijíchah joinít, judíowã nihcannitdih ã naáwátji peéh joíhcan, nin pah ã niij ñaacáp jĩ: "¡Caandíh ñi mao yohoó! ¡Caandíh ñi mao yohoó! ¡Nin baácboó ã jumuchah, ã táican caá! ¡Caandíh mao yohatjeh caá náahap!" ã niij ñaacáp jĩ.

23 Nihat cãacwã búdí ã ñaacáp jĩ. Pánih ñaacnit, tũbit ã íjatdih júutna, biquína jih ã dawát chóodih ã too dug yohochah, bitaboó baác dih júinit, ã waáh yoh ñahanap jĩ.

24 Páant ã chãjachah ennit, soldadowã ã maáh ñih mää díitboó Pablodih ã ub waad béjat túutur jĩ. Caanná waad juibínit, Pablo yoobópdih ã naáwát pínah niijná, nuñáp chóa tōpnajĩh caandíh ãt puñat túutur wut jĩ. Judío wéheatdih beh joicán, "¿Dedé peéh tiguaá cãacwã caandíh ã jãih?" ãt niij jéihíhip wut jĩ.

25 ã maáh páant ã niijíchah joinít, ã puñat pínah jãtih soldadowã Pablodih ãt chéó dodhdop wut jĩ. Obohjeéhtih, Pablo ã pebh ñahni nump jumni soldado maáhdih nin pah ãt niijíp wut jĩ:

—Weém Roma baác dih bóo wã jumuchah, ded pah wã yéej chãjatdih jéihcan yuhna, ¿weemdíh ma puñat túutmi niít? ãt niijíp wut jĩ.

26 Páant ã niijíchah joinít, caán nump jumni maáh ã maáh pebhna juibínit, nin pah caandíh ãt niij naáwáp wut jĩ:

—¡Maá, ma túi chãjaá! Nin newé 'Weém Roma baác dih bóo caá', weemdíh ã niijíp be, ãt niijíp wut jĩ.

27 Páant ã niijíchah joinít, ã maáhboó Pablo pebhna juibínit,

—Weemdih ma naáwá. ¿Meém yoobópdih Roma baácdih bóo niít? át niijíp wut jĩ.

—Jújah, caanjĩh bóo tigaá weém, Pablo át niij jepahap wut jĩ.

28 —Weémboó Roma baácdih bóo jumíhna, queét maátadih búdí dinero wã wũhup jĩ, soldado maáh Pablodih át niijíp wut jĩ.

—Obohjeéhtih, weémboó jwíih cãac jumna, páant wãát jumup jĩ, Pablo át niijíp wut jĩ.

29 Páant ã niijíchah joinítjeh, ĩ maáh, caandih pũihnit soldadowãbut ĩt doo jwũub ñũhup wut jĩ. Pablo Roma baácdih bóo ã jumachah yuhna, ã chéwat tútatji peéh búdí át úumup wut jĩ.

Pablo judíowã ĩ maátadih ã wéheat

30 Ded pah Pablodih judíowã tubit ĩ jãihñatdih soldadowã ĩ maáh yoobát páantjeh át jéihíhip wut jĩ. Pánihna, cheibit nihat sacerdotewã ĩ maátadih, judíowã ĩ maátadih yah buca át míic wáacat tútup wut jĩ. Pablodih ub jũúwát tútunit, nihat wáac junít pebhna át ub waad béjat tútup wut jĩ.

23

1 Pablo queétdih jwãáh en ñũhnit, míic wáac junítidih nin pah át niijíp wut jĩ:

—Wã déewáá, Dios ã enechah, weém wãpĩ túi chãjap be, át niijíp wut jĩ.

2 Páant ã niijíchah joinít, sacerdotewã ĩ maáh, Ananías wut jumni, páant ã niiját peéh, Pablo pebh ñũhnitdih ãih jacdih át nem mawat tútup wut jĩ.

³ Páant ã chãjachah, Pablo caandíh nin pah ãt niíj jãihñap wat jĩ:

—Meém ma laiha bojoó. Dios meemdíh ã peéh chãjbipna caá. Ninjĩh chúdnit, ‘Meém Dios ã watatdih yap yohni caá’, weemdíh niijná yuhna, weemdíh páant mawat túutna, meémboó bácah ã watatdih chah yap yohni caá, ãt niijíp wat jĩ.*

⁴ Páant ã niijíchah, bita ã pebh ñuhnit Pablodih nin pah ãt niijíp wat jĩ:

—¿Sacerdotewã ã maáh Dios ã ñionidih meém yeejép niíj jãih niít ma chãjap? ãt niijíp wat jĩ.

⁵ —Wã déewãá, caán sacerdotewã ã maáh Dios ã ñioni ã jamatdih wã jéihcan beé. Jéhna, páant wãta niijcán tagaá. Dios naáwát dih naóh yapanit nin pah ãt niíj daacáp tajĩ: ‘Ñi maáhdih yeejép niíj wéhca bojoó’, ã niíj daacátjidih weembút jepahni caá, Pablo ãt niijíp wat jĩ.*

⁶ Queét míic wáac chúdnit biquína saduceowã, bita fariseowã ã jamatdih jéihnit, Pablo nin pah ãt niíj ñaacáp wat jĩ:

—Wã déewãá, weém fariseo wãúh jumna, weembút fariseojeh man tigaá. Nihat wãnnitji ã jwúub boo pud jũwát pínahdih wãpĩ páina caá. Caandíh wã bohéat jíib weemdíh nemat mũúboó nemíhna, ã tewep be, ãt niijíp wat jĩ.*

⁷ Páant ã niijíchah joinít, queétjeh ãt míic jũih jwúhip wat jĩ. Saduceowã fariseowãjĩh biíc yoobó ãt jenah joicáp wat jĩ.

⁸ Saduceowã nin pah ãt niijíchah caá: “Wãnnitji ã jwúub boo pud jũóhcan niít. Ángelwã, wãnnitih

* 23:3 Mt 23.27 * 23:5 Ex 22.28 * 23:6 Hch 26.5; Fil 3.5

caolih nabut ï wihcan caá”, ïpï niijná caá. Obohjeéhtih, fariseowāboó mácah jenah joinít, “Wannit ï jwúb boo pud jǎóhbirna caá. Ángelwā, wannitih caolih nabut ï jumna caá”, ïpï niijná caá.*

⁹ Pánihna, queét míc wáacnit tubit jühna, chah pohba ït míc jüh ñaacáp wut jï. Biquína Moisés ã wutajidih bohénit fariseowā ñah ñahnit, nin pah wēpép ït niij ñaacáp wut jï:

—Nin newé yeejép chājni nihcan caá’, jwiít jwï niij jenah joiná caá. Biíc wanniih caolih, biíc ángel caandih ã naóh dée caá. Páant ã naáwáchah, jwiít nindih peéh chājnit, Diosdih jwíta yap yoh tagaá. Pánihna, jwï peéh chājca boj jïh buca, ït niijíp wut jï.

¹⁰ Chah yeejép pohba ït míc jühñup wut jï. Páant ï míc jühñuchah ennit, soldadowā ï maáh umna, nin pah át niij jenah joyóp wut jï: “Pablodih yeejép ï chājmi dée caá”, niij jenah joinít, ï míc wáac juyápmant Pablodih ïih maná soldadowādih át ub waadáat túutap wut jï.

¹¹ Caan chéijeh Jesús Pablo pebh jíghnit, caandih nin pah át niijíp wut jï: “**Ma umca bojó. Wïih táini dooná Jerusalén tátchidih moondih ma naáwát pahjeh mantih Roma tátchidih moondihbut ma naáwáp**”, át niijíp wut jï.

Pablodih judíowā ï mao yohíhat

¹² Cheibitjeh, biquína judíowā míc bih wáac jwinít, nin pah ït niij míc wéhenap wut jï: “Jwiít Pablodih jwï maocah, jwiít dih Dios ã mawa naáh.

* **23:8** Mt 22.23; Mr 12.18; Lc 20.27

Pablodih jwĩ mawat pínah jǎtih, jeémpcan, jwĩ babhca boj jǎh”, ít míc niijíp wut jĩ.

13 Cuarenta judíowā chah pohba Pablodih mawíhnit páant niijnít wut jĩ.

14 Páant niijnít, sacerdotewā ĩ maáta, bita ĩ maáta pebhna juibínit, queédih nin pah ít niij naáwáp wut jĩ:

—Nin pah jwĩ niij míc wéhenap be: ‘Jwiít Pablodih jwĩ maocah, Dios jwiít dih ā mawa naáh. Pablodih jwĩ mawat pínah jǎtih, jeémpcan, jwĩ babhca boj jǎh’, jwĩ míc niijíp be.

15 Pánihna, jwiít judíowā nihat jwĩ maáta ñi míc wáacapoó Pablo ā jwúub júúwát pínah niijná, yeebjéh soldadowā ĩ maáhdih dooná ñi wahaá. Nin pah caandih ñi niijí. ‘Pablodih jwĩ jwúub úubh joíhna caá, páant mantih’, ñi niijí. Pánihna, jwiítboó míc bih páinit, ñi pebhna ā juyát pínah jǎtih, caandih jwĩ maobipna caá, ĩ maátadih ít niijíp wut jĩ.

16 Obohjeéhtih, Pablo jwan wúúh ded pah ĩ chǎjat pínah doonádih át joyóp wut jĩ. Pánih joinít, soldadowāih munná waád juibínit, ā joyátjidih Pablodih át naáwáp wut jĩ.

17 Pánihna, Pablo biíc namp jumni maáhdih bid bojnit, nin pah caandih át niijíp wut jĩ:

—Nin jáap behnidih ma maáh pebhna ma ub bejeé, ded pah ā joyátjidih caandih ā naáwát pínah niijná, át niijíp wut jĩ.

18 Pánihna, caán soldado ā maáh pebhna caandih át nambah bejep wut jĩ. Nambah juibínit, nin pah ā maáhdih át niijíp wut jĩ:

—Pablo nemat m^uboó jumni nin jáap behnidih ma pebhna weemdih ã n^umah j^uwát t^utup be, ded pah ã joyátjidih meemdih ã naáwát pínah ni-ijná, ãt niijíp w^ut jĩ.

19 Pánihna, ã maáh bita wihcapboó caán joiníjidih téihyamant teo wái bejnit, nin pah ãt niij ^ubh joyóp w^ut jĩ:

—¿Dedédih tigaá weemdih ma naáwih? ãt niijíp w^ut jĩ.

20 —Judíowã ã maáta cheibit meemdih Pablodih ã pebhna ã wah bojat t^utbipna caá, caandih jw^uub ^ubh joí enat t^ut niijná.

21 Obohjeéhtih, bita caandih mawíhna, ã míc bih p^uibipna caá. ‘Pablodih jw^u mawat pínah játih, jeémpan, jw^u babhca boj j^uih’, ãt míc niijíp w^ut be. Páant niijnítji ma jepahat pínahdih b^u p^uina caá ã chãjap. Pánihna, ã ^ubátdih ma jepahca bojoó, Pablo jwan w^uuh soldadowã ã maáhdih ãt niijíp w^ut jĩ.

22 —Weemdih ma naáwátjidih bitadih ma naóhca bojoó, soldadowã ã maáh ãt niijíp w^ut jĩ. Páant niij péanit, caán jáap behnidih ãt jw^uub bejat t^utup w^ut jĩ.

Maáh Félix pebhna Pablodih ã wahat

23-24 Pablo jwan w^uuh ã jw^uub bejat t^uttimah, soldadowã ã maáh chénewã ã n^ump jumnit maátadih ã pebhna ãt bid bojop w^ut jĩ. Páant ã bid bojnit ã j^uibínachah, nin pah queédih ãt niij naáwáp w^ut jĩ: “Doscientos soldadowã yáac ch^ui bejnit pínahdih míc wáacnit, ñi ámohat t^utá. Bitá setenta soldadowã caballowãj^uih bejnit pínah, bita docientos soldadowã ãtah t^uopdih ^ubnit pínahdihbut míc wáacnit, ñi ámohat t^utá. Pabloíh

caballowã pínahdihbut ñi ámoh wãhuú. Míc ámoh péanit, buu chei las nueve, púú Cesarea tútchi, Maáh Félix pebhna Pablodih ñi túi ub bejeé”, át niijíp wut jĩ.

25 Pánihna, caán maáh nin pah Maáh Félix dih át niij daacáp wut jĩ:

26 “Weém, Claudio Lisias meém wã maáh Félix dih wã daác wahna caá. ¿Ma túi jam niít?

27 Nin tútchidih moón judíowã nin newé Pablo wut jamnidih íjnit, caandih maona í chãjap be. Páant caandih í mao yohat déedih, í pebhna wíih soldadowãjĩh enedih wã bejep be. Caánboó Roma baác dih bóo ã jamuchah jéihnit, caandih í maocat pínah niijná, jwĩ dúuc wáyap be.

28 Páant í mawíhichah ennit, ded pah í jũih ñaacát dih jéihíhna, í maáta í míc wáacapboó caandih wã numah bejep be.

29 Caánboó jwĩ jamuchah, queét judíowã í wut atdihjeh í jũihñap be. Obohjeéhtih, dedé ã yéej chãjatji jíib wunat pínah, nemat muúboó nemat pínahbut caandih ã wihcan beé.

30 Bitá míc bih páinit mawíhat doonádih joinít, waícanjeh ma pebhna caandih wã wahap be. Pánihna, caandih naóh yacnit dih ma pebhna wã bejat tútchipna caá, meémboodih í naóh yacat pínah niijná”, soldadowã í maáh Maáh Félix dih át niij daacáp wut jĩ.

31 Queét soldadowã í maáh ã wut atdih joinít, chei Pablodih numah bejna, púú Antípatris tútchina ít juibínap wut jĩ.

32 Cheibit queét jítchajĩh bejnit soldadowã Jerusalén tútchina ít jwúub bejep wut jĩ.

Obohjeéhtih, bita caballowājīh bejnitboó Pablodih ĩt namah bejep wut jī.

³³ Pánih bejna, Cesarea tútchina juibí, Maáh Félix pebhna waád juibínit, ĩ maáh ā daácniĵi papélah núodih wāhnt, Pablodihbut caandíh ĩt wāhup wut jī.

³⁴ Pánihna, caán núodih en péanit, Félix Pablo ded baácdih bóo ā jumatdih āt wābh joyóp wut jī. Cilicia baácdih bóo ā jumatdih jéihna, nin pah Pablodih āt niijír wut jī:

³⁵ —Meemdíh naóh yacnit ĩ juyúchah, queétdih wā joibípna caá, āt niijír wut jī. Páant niijnít, caandíh ĩ wapat pínah niijná, Maáh Herodesjīh muaná Félix soldadowādih āt ub bejat túutur wut jī.

24

*Pablo Maáh Félix*dih “Wā yéej chājcan beé”, ā niiját

¹ Biícjīh bóo téihya yeó jáap túttimah, sacerdotewā ĩ maáh Ananías, bita judíowā maáta biícđih Cesarea tútchina ĩt ñuun déi juibínap wut jī. Roma baácdih moón ĩ maáta ĩ wutatdih jéihni Tértulo wut jumnibut ĩjeéh āt juibínap wut jī. Tértulo judíowā ĩ naóh yacatdih naóh yapani pínah wut jī. Pánihna, Pablodih ĩ peéh chājat pínah niijná, Maáh Félix pebhna ĩt waad juibínap wut jī.

² Páant ĩ waád juibíát túttimah, soldadowā Pablodih caanná ĩ ub waád juibínachah, Tértulobóo judíowā ĩ naóh yacatdih nin pah āt niij naóh yapanap wut jī:

—Meém túini maáh caá. Jwī maáh ma jumuchah, dedé tac buugát wihcan, jwī táí jumna caá. Túi

jéihni jumna, nihat jwĩih baácdih moondíh ma túi teo wáacna caá.

³ Pánihna, nihat jwĩih tútchidih moón meemdíh búdí jwĩ wěina caá.

⁴ Meém jĩgah enni ma jumatdih jéihna, meemdíh maatápdih tac buugáát túut páant jwĩ niijcán caá. Ma jéihyat pínah niijná, bainíjeh meemdíh jwĩ wéhehna caá.

⁵ Nin cáacwādhíh tūbit ā tac buugána caá. Nihat baácboó ded pah bohénit, judíowādhíh ĩ míic eníhcat chājna caá ā chājap. Jesús Nazaret tútchidih bóodih péenitdih waóhni caá.

⁶ Dioíh munná judíowā nihcannitdih numah waadnít, caán mūdíh ā yéjanap be. Páant ā chājachah ennit, caandíh teona, jwĩ nuowā ĩ wutatdih ā yap yohatji jíib jwĩ peéh chājíhip yah be.

⁷ Obohjeéhtih, maáh Lisias āih soldadowādhíh numah júóhnit, caandíh jwiítidih ĩ dúuc wáyap be.

⁸ Pánih dúuc wáiniji ma pebhna jwiítidih ā naóh yacat túutap be. Pablodih úbh joí enna, nihat jwĩ naóh yacat yoobópdih ā jumatdih meém ma jéihbipna caá, Tértulo Félixíh át niijíp wut yah jí.

⁹ Ājeéh jaibínit judíowābūt Pablodih bíic yoobó Félixíh ĩt yee naóh yacap wut jí.

¹⁰ Páant ĩ naóh yacat túttimah, Félixboó Pablo ā naáwát pínah niijná, caandíh át júut jáhanap wut jí. Páant ā júut jáhanachah ennit, Pablo nin pah át níij naáwáp wut jí:

—Dawá jópchina jwĩih baácdih moón jwĩ naóh yacatdih mapí túi joiná caá. Páant ma jumatdih jéihna, ma túi jéihyat pínah niijná, wěinit, meemdíh yoobópdih wā naóhbipna caá.

11 Doce yeó jáap jãtihjeh Jerusalén tútchina Diosdih weñedih wã jubínap be. Bitadiah ubh joiná, ma jéihbipna caá.

12 Biíhdih wãpĩ juhcap be. Dioih mudih mic wáacnitdih wã mic juhñat tútcap be. Judíowã ã mic wáacat mu diitna, tútchiboobát wã mic juhñat tútcap be.

13 Páant ã naóh yacachah yuhna, bitadiah ubh joí enna, ã yee naóh yacatdih meém ma jéihbipna caá.

14 Obohjeéhtih, bu meemdih yoobópdih wã naóhna caá. Dios jwĩ nuowãji ã wéinidih weembát wãpĩ wéina caá. Pánihna, Jesúsdi jephahna, weém Diosdih wã weñechah, ‘Mácah ã bohéna caá’, queét ipĩ niijná caá. Obohjeéhtih, wã bohéat mácah nihcan caá. Nihat Moisés ã wutatjidih jepahnit, nihat Dios naáwát dih naóh yapanit ã daacátjidihbut wãpĩ jepahna caá.

15 Dios nihat wannitdih ã jwub booaat pínah yeó jáapdih wãpĩ páina caá. Túinitdih, yeejépwádhbut biíc yoobó ã jwub boobipna caá. Páant ã booaat pínahdih nihat judíowábut biíc yoobó ipĩ páina caá.

16 Pánih páina, túinijeh wãpĩ chãjna caá, ‘Caán túini caá’, Dios weemdih ã niját pínah, cáacwábut biíc yoobó ã niját pínah niijná.

17 “Dawá jópchina biíh baácna jibniji wã déewã jĩgah náah jamnitdih dinerodih wáhat túut niijná, Diosdihbut wéi wáhat túut niijná, Jerusalén tútchina wã jwub jubínap be, páant mantih.

18 Pánihna, Diosdih wã wáhat pínah jãtih, ‘Caán túini caá’, Dios ã nij enat pínah niijná, ded pah Moisés ã wutatjidih wã chãjap be. Páant wã

chãjat túttimah, Dioih muú díitna jumna, caandih wã wuhuchah, bita judíowã Asia baácdih moón weemdih ït enep tabe. Páant ï enechah, wãjeéh míc wáacnit wihcan, míc juihñatbut ã wihcap be.

19 Pánihna, weém yeejép wã chãjatdih enna nihna, queét Asia baácdih moónboó ma pebhna naóh yacadih ï juúwú naáh.*

20 Jwí maáta wáac juinít, weemdih ï uúbh joí enechah, ded pah wã yéej chãjatjidih enna nihna, queétjeh naáwádih ï juúwú naáh.

21 Nin pahjeh ï niijmí nacaá: ‘Pablo jwí míc wáacapoó jumnit, nin pah ã niij ñaacáp jï: “Wunnitjidih Diosboó ã jwuub booaatdih jwípí páñatdih wã bohéatji jíb nemat muúboó weemdih ï nemat túutup jï”, ã niij ñaacáp jï, queét ï niijmí nacaá”, Pablo Félix dih át niijíp wut jï.*

22 Páant ã niijíchah joinít, Félix, Jesúh doonádih jéihnit, ï naáwát dih át cádahat túutup wut jï. Pánih cádahat túutnit, Pabloodih nin pah át niijíp wut jï:

—Maáh Lisias ã juyúchah, dedé peéh chãjat pínah ã jumuchah, meemdih wã naóhbirna caá, át niijíp wut jï.

23 Páant niij péanit, Pablodih ub juóhni soldadowã ï maáhdih nin pah át niijíp wut jï: “Maátaih muaná jwuub ub bejna, míh soldadowã caandih ï túi wapa naáh. Obohjeéhtih, ã náahat pah ã chãja naáh. Det ã chéenwãbut caandih teo wáacadih ï juyú naáh”, át niijíp wut jï.

24 Daocánni yeó jáap túttimah, Félix ãjeéh bóli Drusilajih ï míc wáacat tólihna át juibínap wut jï.

* 24:19 Hch 21.17-28 * 24:21 Hch 23.6

Drusila judío wili wut jĩ. Pánih juibínit, Jesúih doonádih joíhna, Pablodih át bid bojop wut jĩ.

²⁵ Páant ā bid bojochah, Pablo queétdih nin pah át niij naóh bohénap wut jĩ: “Bitadih táí chājat caá náahap. Yéj chājat jenah joyát dih yap yohat caá náahap. Cāacwā yeejép ĩ chājatjidih Dios búdí ā peéh chāj bipna caá”, queétdih át niijíp wut jĩ.

Páant ā niij naáwáchah, joí wáhi bejnit,

—Páant bóojeh tígáá. Ma bejeé. Biíh yeó jáap meemdíh wā jwúub bidbipna caá, páant mǎntih, Félix caandíh át niijíp wut jĩ.

²⁶ Pablo ā míc jíib chāj bacat pínah dinerodihbut Félix át bidip wut jĩ. Pánih bidnit, dawá láa Pablodih míc wéheat túut niijná, Félix ā pebhna át júúwát túutur wut jĩ.

²⁷ Obohjeéhtih, chéne jópchi túttimah, Félix maáh jumni át bacap wut jĩ. Pánihna, judíowādih weñáihna, Félix Pablodih nemat mǎúboojéh át cádahap wut jĩ. Porcio Festo wut jumni át jwúub túut nuúm maáh waadáp wut jĩ.

25

Pablo Maáh Festodih ā naáwát

¹ Caán baácna Maáh Festo juibíniji biíc peihcanni yeó jáap túttimah, Cesarea tútchimant Jerusalén tútchina át aab béjep wut jĩ.

² Caanná ā aáb juibínachah, queét sacerdotewā ĩ maáta, bita judíowā ĩ maáta biíc dih ā pebhna bejnit, Pablodih yeejép ĩt jwúub naóh yacap wut jĩ.

³ Caan pébhna ĩ bejat pínah jǎt ih queétjeh nin pah ĩt míc niijíp wut jĩ: “¿Pablodih mawat pínah niijná, cāacwādih míc bih pǎinit, mawat túut jíih?” ĩt míc

niijíp wut jĩ. Páant niij jenah joinít, nin pah Maáh Festodih ít niijíp wut yuh jĩ:

—Nin Jerusalén tútchiboó Pablodih ma wah aabá bojoó, ít niijíp wut jĩ.

⁴ Obohjeéhtih, Festo nin pah queétdih át niij jepahap wut jĩ:

—Pablo páantjeh Cesarea tútchidih nemat määboó ã jumna caá. Búutéh caánboó wã jwúub dei bejbipna caá, páant mantih.

⁵ Pánihna, Cesarea tútchina ñi maáta weemdih í pej jum dei bej jwuhna naáh, Pablo ã yéej chājachah nihna, caandih í naóh yacat túut niijná, át niijíp wut jĩ.

⁶ Ocho yeó jáap túttimah, Maáh Festo Cesarea tútchina át jwúub dei bejep wut jĩ. ã jwúub dei juibíni daanimant, í naóh yacachah joyát túut niijná, peéh chājnit í naáwápboó át waád juibí chúudap wut jĩ. Caánboó chúudnit, Pablodih át bid bojop wut jĩ.

⁷ Pablo ã pebhna ã juibínachah, Festojeéh Jerusalén tútchimant dei juibínit judíowã caán tãahmant ít ñuh páuda bojop wut jĩ. Pánih ñahnit, dawá yeejép dooná ít naáwáp wut jĩ. Obohjeéhtih, páant í naáwáchah yuhna, í yee naáwát dih Festo át jéihcap wut jĩ.

⁸ Páant í naáwáchah joinít, Pablo nin pah át niij naóh yoobánap wut jĩ:

—Jwiit judíowã jwĩ wutatdih, Dioh määdíh, Roma tútchidih moón í maáhdihbut yeejép wã chājcap be, át niijíp wut jĩ.

⁹ Obohjeéhtih, Festo judíowádih weñáihna, nin pah Pablodih átih niijíp wut yuh jĩ:

—¿Jerusalén tútchina ma jwúub aab béjíchcan niít? Caanná juibínit, míih doonádih jéihíhna, weemjéh tigaá wā jwúub joibíp. Yeejép ma chājachah nihna, ma yéejat peéh wā naóhbična caá, át niijíp wut jī.

¹⁰ Obohjeéhtih, páant ā niijíchah joinít, Pablo nin pah át niij jepahap wut jī:

—Maáh César ā wēpat ninjīh meém ma bíbohna caá. Pánih bíbohna, ninboó wā jumuchah, dedé wā chājatji peéh, ma jéih naóhna caá. Judíowādih dedé wā yéej chājcatdih ma táí jéihna caá.

¹¹ Pánihna, yéej chājna nihna, wā yéej chājat jíib weemdíh ī mao yohatdih wā úumcan caá. Obohjeéhtih, ī naóh yacat yoobópdič nihcah, weemdíh queétdih páantjeh ma wāhuchah, ā táican niít. Pánihna, Roma tútchi jwī chah maáh César pebhna weemdíh ma wahaá, Pablo Festodih át niijíp wut jī.

¹² Páant ā niijíchah joinít, Festo caandíh teo wáacnitdih míic wéhe péanit,

—Caán láa bácah, César pebhna meemdíh wā wahbična caá, át niijíp wut jī.

Pablo ā chājatjidih Festoboó Maáh Agripadič ā naáwát

¹³ Daocánni yeó jáap túttimah, maáh Agripa ā jwan Berenicejīh Festo jáap maáh ā waadácah, Cesearea tútchina caandíh muj tewedih ít dei juibínap wut jī.

¹⁴ Pánih dei juibínitji maatápdih ít jum jwuhap wut jī. Biíc yeó jáap Pabloíh doonádih Agripadič Festo nin pah át niij naáwáp wut jī:

—Félix nemat muúboó ā cádahniči, Pablo wūt jumni, ā jumna caá.

15 Jerusalén tútchiboó wã jubínachah, sacerdotewã ï maáta, bita judíowã ï maátabut caandíh wã peéh chãjatdih náahna, wã pebhna yeejép dooná naáwádih ï juyúp jĩ.

16 Obohjeéhtih weém nin pah queétdih wã niijíp jĩ: ‘Jwiít Roma baácdih moón ï maáta nin pah jwĩpĩ chãjna caá: Det naóh yacnitdih jwĩpĩ jwíih naáwát túutna caá. Páant ï naóh yacatdih joinít, ï naóh yacniboodíh jwah jwĩ jwúub naáwát túutna caá. Jwiít Romanowã páant jwĩ chãjcah, caandíh naóh yacnitdih jwĩpĩ wúhcan caá’, queétdih wã niijíp jĩ.

17 Pánihna, nin Cesarea tútchina wãjeéh ï juyát túttimah daanimant bóo yeó jáapjeh peéh chãjat naáwát múboó chúdnit, ï naóh yacnidih wã bid bojop jĩ.

18 ‘Queét judíowã búdí ã yéej chãjatjidih ï naóh yacmi dée caá’, wã niúj jenah joyóp yuh jĩ. Obohjeéhtih queét naóh yaquíhnitji buca dedé ã yéej chãjatjidih ï jéih naóhcap jĩ.

19 ‘Jwíih Dios ã wútatjidih biáboó caá ã bohénap’, niijnít, ï íjip jĩ. Biíc newé, Jesús wút jumni, wanniiji yuhna, ã jwúub boo pud júúwátjidih Pablo ã bohéatjidihbut ï íjip jĩ.

20 Weémboó nihát ï naáwátjidih wã beh joicáp jĩ. Pánih beh joicán, ‘¿Jerusalén tútchiboó ma aab béjhcan niít? Míih doonádih caanná wã joíhna caá, páant muntih’, Pablodih wã niijíp jĩ.

21 Obohjeéhtih, ‘Maáh César pebhna weemdíh ma wahaá, wíih doonádih caánboó ã joyát pínah niijná’, weemdíh ã niijíp jĩ. Páant ã niijíchah joinít, jwĩ maáh pebhna wahat túut niijná, caandíh nemat múboó soldadowãdih wã páñat túutur jĩ, Festo

Agripadih ãt niijíp wut jĩ.

22 Páant ã niijíchah joinít, Agripa Festodih nin pah ãt niijíp wut jĩ:

—Ã naáwát dih weembút wã joíhna caá, ãt niijíp wut jĩ.

—Cheibit caandíh ma joibípna caá, Festo Agripadih ãt niijíp wut jĩ.

23 Pánihna, cheibit Agripa Berenicejĩh búdí míic wáacat tólihna jubínit, ãt waad béjep wut jĩ. Páant ã waad béjehah, nihat cáacwã queétdih ennit, búdí ãt weñep wut jĩ. Nihat soldadowã ã maáta, nihat caán tútchidih moón maátabut caán muuná ãjeéh ãt waad béjep wut jĩ. Túttimah, Festo Pablodih ãt ub jũúwát túutup wut jĩ.

24 Pánihna, Pablo ã waad jubíát túttimah, Festo queét míic wáacnit dih nin pah ãt niij naáwáp wut jĩ:

—Maá Agripa, nihat yeéb jwĩjeéh jumnitbut nin newédih ñi enna caá. Jerusalénboó wã jumuchah, ninboó wã jumuchahbut, nihat judíowã weemdíh nindih búdí ã naóh yacap jĩ. Tubit ñaácnit, ‘Caandíh ma mao yohoó’, chah pohba ã niijíp jĩ.

25 Obohjeéhtih, weémboó ded pah ã yéej chãjatjidih wã jéihcap jĩ. ã yéej chãjatji júb mao yohat ã wihcap jĩ. Pánihna, caanjéh tibeé jwĩ maáh Césardih naáwát túut niijná, ã pebhboó ã bejat pínahdih ã úúbup jĩ.

26 Obohjeéhtih, jwĩ maáh Césardih ded pah wã naóh daacát déedih wã jéihcan caá. Pánih jéihcan, yeéb nihat, Agripa bíicdih ñi pebhna caandíh wã jũúwát túutup be. Pánihna, caandíh joinítji jwĩ míic wéheat túttimah, ded pah caandíh wã naóh daacát pínahdih wã jéihbipna caá.

27 Ded pah ã yéj chãjatjidih naóhcah, nemat maáboó jamnidih César pebhna wã jéih wahcan caá, Festo queétdih át niijíp wut jĩ.

26

Ded pah ã chãjatjidih Pablo Maáh Agripadih ã naáwát

1 Túttimah, Maáh Agripa Pablodih nin pah át niijíp wut jĩ:

—Buu míih doonádih jwiútdih ma naáwá, át niijíp wut jĩ.

Páant ã niijíchah joinít, Pablo maátadih uúbhna, áih téihyajĩh át júut ñahanap wut jĩ. Pánih júut ñahanit, áih doonádih át naóh jwíhip wut jĩ.

2 “Maá Agripa, wã déewã ì maáta yeejép weemdih ì naóh yacatjidih wã naóh yoobáát pínahdih buu meém ma joyát pínahdih wã wëina caá.

3 Nihat jwiít judíowã ded pah jwĩ chãjatdih, ded pah jwĩ bohéatdihbut meemjéh ma túi jéihna caá. Pánihna, nihat wã naáwát pínahdih ma túi joyoó”, Pablo át niijíp wut jĩ.

Pablo Jesúsdi h ã jepahat pínahjãtjih ded pah ã jam jwuhatjidih ã naáwát

4 “Nihat judíowã wíih baácboó ì cãtíh wébít jam jwuhna, ded pah wã jamatjidih ì jéihna caá. Túttimah, Jerusalénboó ded pah wã jamatjidihbut ì túi jéihna caá.

5 Maatápdih fariseowãjeéh wã jamup jĩ. Jwiít fariseowã Moisés ã wutajtidih chah jepahnit jwĩ

jumna caá. Páניהna, queét judíowã naáwíhna, ‘Yoobópdih caá ã niiját’, íta jéih niij tágaá.*

⁶ Dios jwĩ n̄owãdih ‘Nihat cãacwã ã boo pud jũóhbiṗna caá’, ã niijátjidih wã páñat jíib, b̄uu ã naóh yacni ninboó wã ñ̄uhna caá.

⁷ Nihat jwiít doce judíowã poómpbut ã naáwátidih joinítji jwĩ páina caá. Yeó jáap, cheibut Diosdih jwĩpĩ táí wēi wãhna caá. Páניהna, Maá Agripa, jwĩ maátaboó caandíh wã páñat jíib weemdíh ã naóh yacap jĩ.

⁸ ¿Dépanihna ‘Dios w̄annitdih ã jéih jw̄uub boocan niít’, ñi niij jengah joí?

⁹ “Jon jãtíh ‘Jesús Nazaret tãtchidih bóodih jepahnitdih weemdíh cádahat tãtat caá náahap’, wã niij jengah joyóp jĩ.

¹⁰ Páant niij jengah joinít, Jerusalén tãtchidih moón dawá Jesúsdiḥ jepahnitdih teonit, sacerdotewã ã maáta ã w̄atdih joinít, nemat m̄uúboó wã nemat tãtatup jĩ. Páניהna, queétdih ã mao yohíhichah, weembút biíc yoobó wã mao yohat tãtatup jĩ.

¹¹ Maatápdih jwiít judíowã jwĩ míic wáacat m̄uúdíh Jesúíhwã ã míic wáacachah, waadní, queétdih wã jígah náah chãjap jĩ. Jesúsdiḥ ã jepahatdih wã cádah tãtatup yah jĩ. Páניהna, búdí íijna, biíh baácna jweí peétnit Jesúíhwãdih ñ̄uannít, wã moh yéjanap jĩ”, Pablo át niijíp wut jĩ.*

*Jesús caandíh ded pah ã niijátjidih Pablo ã naáwát
(Hch 9.1-19; 22.6-16)*

* 26:5 Hch 23.6; Fil 3.5 * 26:11 Hch 8.3; 22.4-5

12 “Pánih Jesúíhwãdih ñuunná, sacerdotewã ï maáta ï wēpatjĩh ï wutatji pah chãjat túut niijná, biíc yeó jáap Damasco tãtchina wã bejep jĩ.

13 Yeó jáap tac yoób namáboó jwĩ bejehah, yeó ã yeh iigát chah jeámant yeh iíg jéenanachah, jwĩ enep jĩ. Weemdih, wãjeéh bejnitdihbut ã táí yeh iig yóh jwejep jĩ.

14 Páant ã yeh iiguíchah, en wúhi bejnit, jwiít nihat baácboó jwĩ buug ñájap jĩ. Pánih buug ñájnit, wéheatdih wã joyóp jĩ. Jwĩh wéheatjĩh nin pah weemdih áí niijíp jĩ: ‘Saulo, Saulo, ¿Dépanihna iijnit, wĩihwãdih mawih ñuún péé tigaá ma chãj? Wĩihwãdih pánih chãjna, weemdih caá páant ma chãjap. Pánih chãjna, meemjéh míic yéejana caá ma chãjap. Nuñúpdih ñi chéwechah, iijnit, míic tãpána, ã míic yéejat dée pah meembát ma míic yéejana caá’, ã niijíp jĩ.

15 ‘¿Maá, meém déhe tigaá?’ wã niijíp jĩ. ‘Weém Jesúskeh tigaá, ma ñuún mawih péeni.

16 Buu ma ñah ñuhúú. Weemdih teo wũhni ma jummat pínah niijná, meemdih wã jíghna caá. Ma enatjidih bitadih ma naáwát pínah niijná, meemdih wã ñíona caá. Ded pah wã jummatdih meemdih wã jwáub jéihyaat pínahdihbut ma naóhbična caá.

17 Buu meemdih jíghnit, judíowãdih, judíowã nihcannitdihbut wĩih doonádih ma naáwát pínah niijná, meemdih wã wahna caá. Pánih wahnit, ï jéih yéej chãjcat pínah niijná, meemdih wã táí wapbipna caá.

18 Judíowã nihcannitdih ma naáwáchah, queét dupúát panhipboó jumnitji ï yéej chãjatdih cádahnit túut nuumná, baabát panhipboó ï

bejbipna caá. Pánihna, Satanás ã maáh jumupmant queétdih ub bacanit, Dios ã maáh jumupboó wã waadábipna caá. Pánih chãjnit, weemdih jepahnitdih ï yéejatdih wã yohochah, queét Dios ã ñionitjeéh ï jumbipna caá', Jesús weemdih ã niijíp jĩ", Pablo át niij naáwáp wat jĩ.

Pablo Jesúsdiã ã jepahatjidih ã naáwát

¹⁹ "Páant Jesús ã naáwáchah joinít, caandih wã yap yohcan jĩ.

²⁰ Pánihna, Damasco tútchidih moondih wã jwíh naáwáp jĩ. Túttimah, Jerusalén tútchidih moondih, Judea baácđih moondih, judíowã nihcannitdihbut naóhñit, 'Ñi yéejatdih cáđahñit, Diosdih bidñit, ã náahat pahjeh ñi chãjaá. Pánih chãjnit, "Yoobópdih Diosdih jepah tiguaá ï chãjap", bita ï niijbípna caá', wãpĩ niijíp jĩ.*

²¹ Páant wã niij bohéatji peéh nit judíowã Dioíh maá díitna weemdih teonit, ï mao yohíhip yah jĩ.

²² Obohjeéhtih, jon, bñubut Dios weemdih ã teo wáacac be. Páant ã teo wáacachah, weém ninjĩh ññhñit, nihat maátadih, oboh jumnitdihbut yoobópdih wã naóhna caá. Moisés ã watatjidih, Dios naáwátđih naóh yapanit ï daacátjidihbut wãpĩ bohéna caá.

²³ Nin pah ït niij daacáp tajĩ: 'Cristo Dios ã wahní pínah yeejép yapñit, ã wñnbipna caá. Pánih wñnniji, ã waóh boo pñđ jũóhñit, yeh iigní panihni nihat judíowã, judíowã nihcannitbut ï yéejat peéh iiguípna ï bejat déedih túi ubni pínah ã jumbipna

* 26:20 Hch 9.20,28-29

caá', ìt niij daacáp tajĩ.* Páant ì niij daacátji pah weembát biíc yoobó wãpĩ bohénap jĩ", Pablo át niijíp wut jĩ.

Pablo Agripadih Diosdih ã jepahat tútat

24 Páant Pablo ã naáwáchahjeh, Festo nin pah át niij ñaacáp wut jĩ:

—¡Pablo, meém náhni joyát buud béjni caá! Maatápdih ma bohéatji jíib, náhni joicánni caá buca, át niij ñaacáp wut jĩ.

25 —Nihcan caá, Maá Festo. Náhni joicánni nihcan caá weém. Yee wéheni nihcan caá. Yoobópdihi tigaá wã naáwáp.

26 Nin Maáh Agripa nihat wã naáwát dih ã beh joiná caá. Pánihna, úumcanjeh caandih wã naóhna caá. Nihat wã chãjat bih naáwát nihcan beé. Nihat ded pah wã chãjatji doonádih Agripaboó átát joijí tagaá, át niijíp wut jĩ.

27 Páant niij péanit, Agripadih jwuh nin pah át jwúb niijíp wut jĩ:

—Maá Agripa, meémboó Dios naáwát dih naóh yapanit jon jãtih ì daacátjidih 'Yoobópdihi tigaá', ¿ma niij jenah joí niít? Páant ma jenah joyát dih wã jéihna caá, át niijíp wut jĩ.

28 —¿Ma naáwátjĩh waícanjeh weemdih Jesús dih ma jepahat tútíh niít? Agripa Pablodih át niij jepahap wut jĩ.

29 —Waícanjeh ma jepahachah, túttimah ma jepahat doonádihbut joiná, wã wëibipna caá. Meém Jesús dih ma jepahat pínah, yeéb nihat buu weemdih joinítbut caandih ñi jepahat pínah dih wã náah yacna caá. Pánih náah yacna, Diosdih

* 26:23 Is 42.6; 49.6; 1Co 15.20

yeebdih wāpī uúbhna caá. Weém wā jummat pah yeéb niहतbut ñi jummat pínahdih wā náah yacna caá. Nin itah tōpdih wā dawat pah niijná wā chājcan caá, át niijír wut jī.

³⁰ Páant ã naáwáchah joí péanit, Maáh Agripa, Berenice, Maáh Festo, caánboó chúudnitbut ñah ñahnit, biíc dih ít bac bejep wut jī.

³¹ Pánih bac bejniti nin pah ít niúj míc wéhenap wut jī:

—Nin newé ã chājatji jíib, mawat, nemat múúboó waadáatbut caandih ã wihcan caá, queétjeh ít míc niijír wut jī.

³² Maáh Agripa Maáh Festodih nin pah át niúj naáwáp wut jī:

—Maáh César pebhna Pablo ã wahat túutcah ni-hna, jwīta jéih baca tagaá. Obohjeéhtih, caanná ma wahat pínahdih ã uúbat túttimah, caandih jwī jéih bacacan caá, Festodih át niijír wut jī.

27

Pablodih Roma tútchina ñ wahat

¹ Roma tútchidih moón ñ Maáh César Italia baác dih át jummap wut jī. Pablodih, bita nemat múúboó jumnitdihbut Festo soldadowã ñ maáh Julio wut jumnidih át wapat túutap wut jī. Pánihna, johlitjīh bejni jāáj chóojīh queétdih Italia baácna Julio ã namah bejep jī. Caán Julio cien soldadowã ñ maáh ã jumuchah, ñih soldadowã César Augustoihwã wut jumnitbut ñ bejep jī.

² Pánihna, weém Lucasbut Pablojeéh wā bejep jī. Aristarco, Macedonia baác Tesalónica tútchidih bóobut jwiít dih ñ pej jum bejep jī. Pánihna, Adramitio wut jumni tútchimant júóhni jāáj chóodih jwī

waadáp jĩ. Caán chóo Asia baácđih bóo jělitna yoobó aab béjni chóo pínah tajĩ.

³ Pánih bejnit, cheibit Sidón wūt jumni jělitna jwĩ juibínap jĩ. Julioboó Pablodih en daoná, ã túi chãjap jĩ. Pánih túi chãjnit, caanjĩh moón ã chéenwã dedé ã náahatđih ĩ wãhat pínah niijná, ĩ pebhboó Pablodih ã aabát túutap jĩ.

⁴ Caanjĩh aabnítji jwúub dei júnít, caán chóodihjeh muntih jwúub waadnít, jwĩ bejep jĩ, páant muntih. Jwĩ bejat déemant johlit ã jwãáh johochah, Chipre wūt jumni quewa ã túi jãhat pínah niijná, caan quéwadih wáyámant bóo bawámant jwĩ en yap bejep jĩ.

⁵ Caan quéwadih yap bej, chúuh bejnit, Cilicia baác ñaj deyatđih yap bej, Panflia baác ñaj deyatđihbut yap bej, Licia baácđih jumni Mira tútchina jwĩ juibínap jĩ.

⁶ Jwĩ bejni chóo caán tútchidih ã chãwát pínahđih jéihnit, Julio biih jãáj chóo, Italia baácboó bejni pínah chóodih át bid juyáp tajĩ. Caán ã bid juní chóo Alejandría wūt jumni tútchimant jũóhni chóo tajĩ. Pánih bid junít, caán chóoboó jwiítđih ã namah waadáp jĩ.

⁷ Johlit ã jwãáh joh buug lájachah, páant muntih, wěpép jéih bejcan, chaíhjah jwĩ bejep jĩ. Pánih bejnit, Gnido wūt jumni tútchidih jwĩ tóah juibínachah, johlitboó jwiítđih tacboó ã ub joh púud baca bojop jĩ. Pánihna, yoobópdih bejcanjah, Salmón wūt jumni pióh ñajatđih yap bejnit, Creta wūt jumni quewadih jéihyepmant bóo bawámant jwĩ en yap bejep jĩ.

⁸ Pánihna, johlit páantjeh yeejép ã johochah, caan

quéwa b̄wádih chaíhjuh bejnit, Táini Jélitna páud bacardih jwī chão páh jwuhup jĩ. Caán jélit Lasea wūt jumni tátchi pehbbit ã jumup jĩ.

⁹ Pánih chaíhjuh jwī bejchah, mah noój láa, jááj chójih bejat tobohat láa ã tóah j̄úwáp jĩ. Pánihna, jwiít dih numah bejnitdih Pablo nin pah ã níj naáwáp yuh jĩ:

¹⁰ —¡Weemdih ñi joyoó! B̄u jwī bejchah, ã túican níit. Mah noój láa ã jumuchah, nin jááj chóo ã b̄udbípna caá. Pánihna, nihat ñi ub bejnibut, jwiítbut jwī daáb b̄udbípna caá, ã niijp jĩ.

¹¹ Obohjeéhtih, caán chóo mínah, caán chódih íoh teonibut Pablodih í jepahcap jĩ. Juliobut Pablodih joyáh bojnit, queétboodih ã jepahap jĩ.

¹² Caán í chãoní jélitboó mah noój láa jááj chóo ã chãwáchah, ãpĩ túicap wut jĩ. Pánihna, nihat caán chódih bejnit caan quéwadihjuh tih biíh tátchi, Fenice wūt jumni tátchi jélitna í bejíhip yuh jĩ, mah noój ã yapatdih juibí pã jwuhat túut niijná. Fenice jélitdih yeó dei bejepmant jááj chóo waadát át jumup wut jĩ. Pánihna, “Caánboó juibínit, mah noój láa jwī túi pã jwuhbipna caá”, í níj jenah joyóp wut yuh jĩ.

Búdí mujdih nolihat ã j̄úwát

¹³ Chóop yapapmant johlit ã túi j̄úwáchah, caán chódih teonit í túi bejat pínah niijná, í yoh báhani chodóp dahdih í jwúb ub yacap jĩ, páant mantih. “Jwī túi jéih jááj juibíbipna caá”, níj jenah joinít, jwiít dih í numah bejep yuh jĩ. Pánih bejna, Creta quewa pebhjuh jwī jáaj béjep jĩ.

14 Obohjeéhtih, túttimahbitjeh caan quéwa chúuhup yoób yeó aáb jũúwápmanť johlit búdí ã joh jũúwáp jĩ.

15 Caán johlit jwĩih jãáj chóo buwámant tũbit ã joh jãhanachah, jwĩ bejatji dée yoób jwĩ jéih bejcap jĩ. Pániť johna, caán chóodih ã pãah joh pũud baca bojop jĩ.

16 Pániťna, Cauda wũť jũmni quewadiť jéihyepmant bóo buwámant jwĩ yapap jĩ. Caan quéwa jwiítđih chibít johlitđih ã jãhap jĩ. Páant ã jãhachah, jwĩ wáini bainí jãáj chóodih, búdí chóo díitna ĩ Ʃb yacap jĩ. Johlit nolihatjĩh páantjeh búdí ã tobohochah yũhna, ĩ jéih Ʃb yacap jĩ.

17 Caán chóodih ámoh yac péanit, búdí chóo ã búuh bejcat pínah niijná, queét jãáj chóodih teonit buujcánni tũpnajĩh caán chóodih ĩ nah chéwep jĩ. Pániť nah chéo péanit, “Libia baácboó jwĩ jũibími dée caá. Caanjĩh óon yehbenibit Sirte wũť jũmapboó buug lájat jwiítđih tũbit tobohna caá”, niij jenah joinít, jãáj chóo wěpép ã bejcat pínah niijná, johlitđih teoni búdí yégueh chóodih ĩ Ʃb deyanap jĩ. Páant ĩ Ʃb deyat túttimah, jãáj chóodihjeh johlit ã Ʃb joh bojop jĩ.

18 Caán johlit dedé ã yaicáp jĩ. Pániť joh yaicán, chah pohba ã yoób johop jĩ. Páant ã johochah, nolihat búdí jũóhniť, jãáj chóodih tũbit ã buug lájap jĩ. Pániťna, jih buugjéh ã pahat pínah niijná, túttimah bóo yeó jáapđih ĩ Ʃb bejniji bíi déedih ĩ yoh báaha jwĩhip jĩ.

19 Túttimah bóo yeó jáapđih johlit teoni yégueh chóona, chéwat tũpna, máa nahnadiťbũť ĩ yoh báhanap jĩ.

20 Maatápdih yeodíh cúiwādhbut jwĩ encap jĩ. Johlit nolihatbut dedé noón yaicáp jĩ. Yeó jáap jummat pah chah pohba ã tobohó jĩ. Páant ã tobohochah, “¿Nin búdí majboó jwiít jwĩ buudmí naniít?” jwiítjeh jwĩ niij jenah joyóp jĩ.

21 Pánihna, búdí teona, maatápdih ĩ jéih bid jeémpcap jĩ. Páant ĩ bid jeémpcatdih enna, Pablo ĩ cātíh juí ñhñnit, queédih nin pah ã niij naáwáp jĩ:

—Wã naáwáchah, yeéb ñi joicán beé. ‘Cretamant jāaj béjcat caá náahap’, wã niijíp yah be. Jwĩ jūóhcah, nin pah āta yapcan tagaá. Jwĩ jūúwátji jībjehe nin pah ã yapna caá.

22 Obohjeéhtih, buu yeebdíh wã jwúub naóhna caá, páant muntih. Ñi úumca bojoó. Jwiít jwĩ buudcán niít. Obohjeéhtih, nin jāáj chóo pohba ã búuh peét bejbipna caá.

23 Dios wã maáh wã wēini weemdíh ã jéihyaat pínah niijná, āih ángeldih āt wahap tabe. Caán ángel weemdíh buu chei jíghnit, jwĩ buudcát pínahdih ã naáwáp be.

24 Wã pebh junít, nin pah ã niijíp be: ‘Pablo, ma úumca bojoó. Meém Romanowã ĩ maáh César pebhna jubínit, ded pah ma chājatjidih ma naóhbipna caá. Dios túini jumna, ma bejni jāáj chóodih moondíhbut biíc yoobó ã wapbipna caá’, weemdíh ángel ã niijíp be.

25 Pánihna, ñi úumca bojoó. Diosdih túi jenah joinít, ‘Ángel ã niiját biíc yoobó ã yapbipna caá’, wã niij jéihna caá.

26 Obohjeéhtih, jwĩih jāáj chóodih johlit biíh quewāboó ã ub joh dodhbipna caá, queédih Pablo ã niijíp jĩ.

27 Pánih johna, chéne semana wēpép ã johat túttimah, chei, Adriático wāt jamni búdí mājdiḥ jwī jwaoh cháuh bejep jī. Pánih bejna, chei tac yoob póhba caán chóodih teonit “¿Yehbenapboó jwī jaiḥími naniít?” queétjeh ít níj jenah joyóp tajī.

28 Pánihna, “Débóo cah ninjīh ã namah”, niijná, í jenah enep jī. Páant í jenah enechah, treinta y seis metros pohba caanjīh át namahap wāt jī. Maátcanbitjeh í jwáub jenah enechah, veintisiete metros caanjīh át namahap wāt jī.

29 Páant ã yehbe bejehah ennit, búdí ít áumap wāt jī. “¿Quewa páud bacapdiḥ bóo jeenádiḥ jwī buug lájmi naniít?” ít níj jenah joyóp tajī. Pánihna, caán chóo ã bejcat pínah niijná, chénena míic chodóp dahna méimant í yoh daabánap jī. Pánih yoh daabánit, “Waícanjeh ã baabá naáh”, queét í niijjéhep jī.

30 Biquína caán chóodih teonit, jweíhna, caán bainí chóodih chéwat tōpdih watnit, í wat deya pahanap jī. Pánih chájnít, nin pah í yee niijíp jī: “Caán bainí chóodih waadnít, bíih chodóp dahnadih wawápmant jwī yoh daabábipna caá”, í niijíp jī.

31 Obohjeéhtih, soldadowã í maáhdih, soldadowãdihbat Pablo nin pah ã niijíp jī:

—Nit nin chóodih teonit í bejehah, yeebbát ñi daab wánbipna caá, ã niijíp jī.

32 Páant ã niijíchah joinít, teonit í jweicát pínah niijná, soldadowã bainí chóodih chéwat tōpnadiḥ í dúuc bóodop jī. Páant í dúuc bóodochah, caán chóo ã daabáh bejep jī.

33 Baabát pínah jãtíh, Pablo queédih nin pah ã

niij naáwáp jĩ:

—Yeéb náhni dahwanit ñi jeémpcah, chéne semana ã yapna caá.

³⁴ Pánihna, buu yeebdíh búdí wã jeémát túutna caá, ñi túi wēp yaáát pínah niijná. Ñi náhninaá, biíc jwĩ buudcán niít, ã niijíp jĩ.

³⁵ Páant niijnít, Pablo pandih ubnit, “Paá, jwiít dih nin jeémát dih ma túi wãhna caá”, Diosdih niijnít, jwiít nihat jwĩ enechah, pandih ã jeémép jĩ.

³⁶ Páant ã jeéméchah ennit, jwiítbut wēinit jwĩ jeémép jĩ.

³⁷ Jwiít caán chóodih jumnit doscientos setenta y seis cãacwã jwĩ jumap jĩ.

³⁸ Pánih jeémp péanit, nihat jwĩ wud jumát túttimah, caán chóo ã chodcat pínah niijná, páantjeh jumni trigo wuh wuúhnadih búdí mujboó ï yoh báaha beedánap jĩ.

Pablowã ï jumni jááj chóo ã daabát

³⁹ Túttimah, baáb jéenechah, pehbbit jumni baác dih beh encan yuhna, túi óon ñaj dei páud bac jãúwát, jee dáhna wihcapdih ï wēi enep jĩ. Pánih ennit, “¿Con óonna jwĩ buug ñáj juibí jíh?” ï niijíp jĩ.

⁴⁰ Pánihna, jááj chóo ã túi bejat pínah niijná, chodát dahnadih chéwat tōpnadih ï dúuc bóod yohop jĩ. Páant ï dúuc bóod yohat pónih, íoh tewat túut niijná, bitaboó íoh tewat pínah meenát naanádih chéwat tōpnadih ï wat deyanap jĩ. Caán túttimah, waáwápmant bóo johlit teoni bainí yégueh chóodih ï wái aabánap jĩ. Pánih bejna, caán óon coahna ï juibíhip yuh jĩ.

41 Obohjeéhtih, jwĩ bejep yoób yehbenibit biíh óon poómp át jumup tajĩ. Pánihna, jwĩih jãáj chóo waáwápmant bóo caán óondih ã báagh yoh bejep jĩ. Páant ã báagh yoh bejehah, búdí nolihat ã buug lájachah, jwĩih jãáj chóo méimant ã búuhah bejep jĩ.

42 Páant ã búuhuchah ennit, queét soldadowã nemat muddih moonjí ĩ yaáh jweicát pínah niijná, queétdih ĩ mao yohíhip yuh jĩ.

43 Obohjeéhtih, soldadowã ĩ maáh Pablodih túi chãjihna, soldadowãdih queét nemat muddih moonjídih ã mawat túutcap jĩ. Pánihna, jwěejna ĩ yaáh ñáan bejat pínah niijná, jéih yaáhnitdih ã jwíih ñaáp báahaat túutap jĩ.

44 Jéih yaáhcannitdih jãáj chóodih bóo máa naanádih teonit, ã yaáh ñáan bejat túutap jĩ. Pánih bejnit, nihat jwĩ túi yaáh ñáan juibínap jĩ.

28

Pablo Malta wũt jumni quewaboó ã jummat

1 Páant jwĩ ñáan juibínachah, caan quéwadih moón jwiít dih jwãáh muj teo péanit, “Nin Malta wũt jumni quewa caá”, jwiít dih ĩ niij naáwáp jĩ.

2 Caan quéwadih moón jwiít dih túi teo wáacnit, páantjeh mah ã buugúchah, jwĩ cúbuhachah ennit, ĩ tuu cáo wũhup jĩ.

3 Queét ĩ tuu wawachah ennit, Pablobut tuu wawadih bejnit, ã juí cáwap jĩ. Páant ã cáwachah, tuu chãha bac jũóhni mai Pabloíh téihyadih ã chãacáp jĩ.

4 Páant ã chãác ñuhuchah ennit, caan quéwadih moón nin pah ĩ míic niijíp jĩ: “¿Nin newé cáacwãdih mao jweiní naniít? Pánih tigaá búdí nolihatdih ã jweí jũúwúchah yuhna, ã mao jweyátji jíib caandih

peéh chãjna caá ã chãjap. Pánihna, bũũ ã wũnbipna caá”, ĩ míic niijíp jĩ.

⁵ Obohjeéhtih, Pabloboó caán maidih tũũ cúutna ã wimp yoh cáwap jĩ. Pánihniji ã tũbacap jĩ.

⁶ Páant ã chãjachah ennit, caanjĩh moón nin pah ĩ míic niijíp yah jĩ: “Caandíh ã chalanachah, ã wũn bũũgbípna caá”, ĩ niijíp jĩ. Obohjeéhtih, maatápdiĥ ĩ en ñũhũchah yũhna, dedé ã tũbacap jĩ. Páant ã tũbacat enna, ĩ jenah joyátdih jwũũb túut nũũmnít, nin pah queétjeh ĩ míic niijíp jĩ: “¿Caán jwĩpĩ pãp uũbhni poómpdiĥ bóona níit?” ĩ niijíp jĩ.

⁷ Publio wũt jumni, ãih jummat jwĩ aabápmant bah-nibitjeh át jumap jĩ. Publio caanjĩh moón ĩ maáh tajĩ. Pánihna, caán jwiítđih dooná ã wahachah, ãih mũũná jwĩ aab béjep jĩ. Caanná jwĩ jũibínachah, jwiítđih ã túi wēi jwãááp jĩ. Pánih wēi jwãáhnit, biíc peihcanni yeó jáap ájeéh jwĩ jumũchah, jwiítđih ã túi chãjap jĩ.

⁸ Publio íp pahat yoyóp wũnna, ã lajachah, Pablo caandíh enedih ã bejep jĩ. ã pebh jũibínit, teo jáha uũbhnit, caandíh ã booanap jĩ.

⁹ Páant ã booaat doonáđih joinít, bita caanjĩh moón wũnnit, ã booaat pínah niijná, Pablo pebhna ĩ jumúp jĩ. Pánih jumínitđihbut teo jáha uũbhnit, ã booanap jĩ.

¹⁰ Pánihna, búdí wēinit, jwiítđih ĩ túi teo wáacap jĩ. Túttimah, caan quéwamant jwĩ bejat túut chãjachah, jwĩ bejni pínah jááj chóodih dedé jwĩ náhatđih wũhna, ĩ túi yac beedánap jĩ.

Pablo Roma tútchina ã jũibíát

¹¹ Biĩh búdí jááj chóo Alejandría tútchimant jũóhniji caan quéwadiĥ mah noój láa át chão jwũhũp

tajĩ. “Nin jǎáj chóodih teonitdih wapnit pínah”, níj jenah joinít, caán chóo wúúcdih chéne ĩ pǎrniĵi Cástor, Pólux wút jumnidih ĩ búúdhnit ĩ ñúhup ĵĩ. Pánihna, caan quéwadih jwiít biíc peihcanni widh jumnitji, bejna, caán chóodih waadnit, jwĩ chúuh bejep ĵĩ.

¹² Pánih chúuh bejnit, Siracusa wút jumni tútchidih jubínit, biíc peihcanni yeó jáap jwĩ chǎo jwúhup ĵĩ.

¹³ Caán chóodih jwúub waadnit, púú Regio wút jumni tútchina yoobópdihjeh jwĩ chúuh jubínap ĵĩ. Cheibit chóop yapapmant joh jǔóhni johlit jwiítđih ã túi ub bejep ĵĩ. Chéne yeó jáap túttimah, Puteoli wút jumni tútchina chúuh jubínit, jwĩ aab béjep ĵĩ.

¹⁴ Caanjĩh moón Jesúíhwǎ jwiítđih wěi jwǎáhnit, ĩjeéh jwiítđih biíc semana ĩ chǎo jwúhat túutap ĵĩ. Biíc semana túttimah queéđih cádahnit, Roma tútchina jwĩ yoób aab béjep ĵĩ.

¹⁵ Roma tútchidih jwĩ tóah bejehah, Roma tútchidih moón Jesúíhwǎ jwĩ bejat doonáđih joinít, biíc poómp Foro de Apio wút jumni jíib chǎjatboó jwiítđih jwǎáat túut niijná, ĩt juí páñap tajĩ. Túttimah, biíh poómp Romadih moonbát Tres Tabernas wút jumni úwat pebhboó ĩt juí páñap tajĩ. Pánih queéđih jwǎáhnit, búdí wěina, “Paá, weemđih ma túi chǎjna caá”, Pablo Diosđih ã niijp ĵĩ.

¹⁶ Roma tútchidih jubínit, Julio ã maáđđih Pablodih ã wúhup ĵĩ. Caánboó Pablodih nemat muúboó nemcanjeh, biíh muúboó ã jummat túutap ĵĩ. Obohjeéhtih, ã jweicát pínah niijná, biíc soldadodih ã wapat túutap ĵĩ.

Pablo Roma tútchidih moondíh Jesúh doonádih ã naáwát

¹⁷ Biíc peihcanni yeó jáap túttimah, Pablo caanjíh moón judíowã ã maátadih ã pebhna át bid bojop wut jĩ. Páant ã míic wáac juyúchah, Pablo queétdih nin pah át niij naáwáp wut jĩ:

—Wã déewãá, weémboó jwĩ déewãdih wã yéej chãjcap jĩ. Jwĩ nãowã ã wutajidihbut yeejép wã niijcáp jĩ. Obohjeéhtih, Jerusalén tútchiboó wã jamuchah, biquína jwĩ déewã weemdíh teonit, Romanowã ã maátadih nemat mũúboó ã nemat túutap jĩ.

¹⁸ Pánihna, weemdíh mũbh joinít, queét Romanowã ã maáta weemdíh ã bacaíhip jĩ. “Nin newé ã yéej chãjatji peéh mao yohat ã wihcan caá”, ã niijíp jĩ.

¹⁹ Obohjeéhtih, jwĩ déewã ã maáta weemdíh ba-caat túutcan, íijnit, Romanowã ã maátadih ã jepah-cap jĩ. Páant ã jepahcah ennít, nin pah Romanowã ã maátadih wã niijíp jĩ: “Maáh César pebhboó weemdíh ñi wahaá”, wã niijíp jĩ. Obohjeéhtih, weémboó wã déewãdih wã naóh yaccan niít.*

²⁰ Pánihna, yeebdíh eníhnit, ñijeéh míic wéheíhna, wã bid bojop be. Jwiít judíowã jwĩpĩ páini Cristo ã boo pud jũúwátdih wã naáwát peéh nin chéoni ítah tōpdih wã dũoná caá, át niijíp wut jĩ.

²¹ Páant ã niijíchah joinít, queét caandíh nin pah ít niij jepahap wut jĩ:

—Conmant moón jwĩ déewã míih doonádih jwiítidih daác wahcan, dedé yeejép doonádihbut ã naóhcan be.

* **28:19** Hch 25.11

22 Obohjeéhtih, nihat tútchinadih moón Jesúsdih jepahnitdih ĩ ĩj enatdih jwiitboó jwĩ jéihna caá. Āih jáap bohéatdihbut yeejép ĩpĩ naóhna caá. Pánihna, dedé ma naáwát pínahdih jwĩ joíihna caá, Pablodih ĩt niijíp wut jĩ.

23 Biíh ĩ jenahni yeó jáapdih dawá Roma tútchidih moón judíowã Pablo ã jamni muaná ĩt juibínap wut jĩ. Páant ĩ juibínachah, túi cheibitjeh jwíih naóh jwíihniiji púú cheyehna Pablo queétdih át naóh cádahap wut jĩ. Moisés ã wutatjidih, Dios naáwátdih naóh yapanit ĩ daacátjidihbut át naáwáp wut jĩ. Pánih caandih naóhna, Dios ã wahní, judíowã ĩ pãini Jesús ã jamatdih jéihna, caandih ĩ jepahat pínahdih queétdih át náah yacap wut jĩ.

24 Biquína ã naáwátdih ĩt jepahap wut jĩ. Obohjeéhtih, bitaboó ĩt jepahcap wut jĩ.

25 Pánihna, ĩ bacat pínah jãtíh, queétjeh ĩ míic ĩjanachah ennit, Pablo nin pah queétdih át niij naáwáp wut jĩ:

—Jon jãtíh jwĩ nɔowã ĩ jepahcatji biíc yoobó yeebbút ñi jepahcan caá. Dios naáwátdih naóh yapani Isaíasji, Túini Espíritu ã jéihyanachah, nin pah jwĩ nɔowãdih át niij naóh daacáp tajĩ:

26 ‘Nit pebhna bejnit, queétdih ma naáwá: “Maatápdih joiná yuhna, ñi beh joicán niít. Maatápdih enna yuhna, ñi beh encan niít”, ma niijí.

27 “Maatápdih wã naáwáchah yuhna, joíihcan, yoobópdih ĩ beh joicán caá. Queétdih wã booanachah, enna yuhna, ĩ beh encan caá. Jéihíhna nihna, yoobópdih ĩta beh en tagaá. Pánih beh enna nihna, ĩ jenah joyátdih ĩta

túut nuum tágaá. Páant ï túut nuumúchah
 nihna, queétdih ï yéejatdih wāta yoh tagaá”,
 Dios ā niijná caá’, Isaías āt niij daacáp tajī.
(Is 6.9-10)

Yeebbát biíc yoobó jepahcannit ñi jamna caá.

28 Pánihna, yeéb wā déewāá, nindih ñi jéihyeé. Buu
 Dios cāacwā ï yéejat yohat pínah doonádih judíowā
 nihcannitdih ā wahna caá. Pánihna, queétboó
 caandíh joinít, ï jepahbipna caá, queétdih āt niijíp
 wut jī.

29 Páant ā niijíchah joinít, íjna, míc wéhenit, queét
 judíowā ït bac bejep wut jī.

30 Páant ā yapat túttimah, chéne jópchi caanjīh
 Pablo ā jamap jī. Dedé ā náahatnadih caanjéh ā jíib
 chāj beedánap jī. Pánihna, nihat caandíh enedih
 jaiibínitdih wēinit,

31 Dios maáh ā jumat doonádih, Jesucristoíh
 doonádihbút úumcanjeh, āpī naáwáp jī. Ded
 caandíh naáwát túutcanni ā wihcap jī.

Páant bóojeh tigaá wā naáwát.
 Lucas

Dios ã jáap naáwát tólih New Testament in Cacua

copyright © 2008 Wycliffe Bible Translators, Inc.

Language: Cacua

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cacua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 18 Apr 2025 from source files
dated 29 Jan 2022
34c9543b-57a6-5290-ab7b-4fa15529a7e2